

豐潤縣志卷之四

郝增祐受山

知縣牛昶煦諱如甫纂輯

周晉堃鐵珊

文苑上 碑 記 序 賦 雜文

典論曰文章經國之大業隋書序曰文章為政化黼黻考治績采風謠當不以一邑遺也予謂此事誠難士君子果以其事存乎制度尚已乃欲以撰述與古作者並垂苟非道德充積上下數千年而率爾操觚則亦猶夫好音過耳草木飄風焉耳雖欲備志乘之掌故輜軒之採錄不可得矧其為經世行遠哉志文苑

豐潤縣碑記

元孫慶瑜

古薊界曰永濟務左控孤竹國右接無終縣溟海浮於前醴泉鎮於後其民勤儉而功稼穡有田廣遠而極膏腴所出絲枲魚鹽所宜稻粱黍稷山明水秀登高望遠臨流賦詩以助騷人勝士超逸不羈之興若夫事隙之際秋風橫空溷水紺碧放舟南下浮流浴洩縱其所往紫蟹金鱗隨意而得盡興而返雖大郡旌節之貴軒冕之榮未足多也聞之父老云在昔金大定間始



改務爲縣至大安初避東海郡侯諱更名曰豐閏地方數百餘里戶不啻二萬有奇民物豐衍賦入繁阜爲薊郡諸縣之最承安中以懷遠大將軍夾谷習捏來宰是縣我本朝開創以來庚辰之歲改縣爲閏州以李公充鎮國上將軍行節度使因幹往西京輟病以歸乃不克抵任遂以同知張公就充節度使大豪咎公由縣令陞宣差燕京路越支鹽使時人號咎半州是也厥後石抹公亦首任此縣後陞宣差年灤路廉訪鹽權使薊州達魯花赤蓋爰昔迨今來爲守令者非鉅功耆德未易處此至元初大選天下官吏黜陟有差號令一出制度章章以遠從近省併諸司移節官吏人自爲躋之於唐虞之世將邑并又玉田未及週歲邑人咸曰豐閏實東西要衝相去玉田地里遼遠民有星火訴訟之急奔走控告大所不便有耆舊李君信之慨然首倡懷牒詣省部陳理遂蒙允可縣治得仍舊於今積有年矣前縣尹張公主簿牛公世宦豐閏縣尹楊公自玉田來蒞是邑皆淵通物理剴裁平允百姓信服治績有稱達魯花赤脫出蒙古人也賦性醇謹深達時事主簿范公閱閱相承用廢歷治真定武強所至爲循良之吏僕世業農桑叨忝縣宰自慚魯純不足此數日以簿書爲念特愛其山川形勝有稽阮登臨之樂課其風俗好惡有龔黃布政之宜故因修完廳事落成之日寫之翠琰庶幾來者尙有考於斯云至

於謀度經始之事葺理興造之勞乃吏之常役遂闕而不書

創建兩廡碑銘序

元張 勗

溷陽豐潤縣古號名郡遼金以降爲州爲縣載在沿革茲不多贅其地東鄰碣石西接漁陽南
矚滄溟北鄰白霄沃壤數百里魚鹽之利棗栗之饒甲於東方天兵革命之後邑之儒宮鞠爲
茂草遺跡不存至元十二年春邑中耆老相與謀曰吾夫子之道涵育斯民如天之日星人之
穀帛也人之所賴以生者蓋以此也然吾之所以報本者春秋祭祀而已此之不修是豺獾之
不若也乃鳩錢千萬卜日而經營之不期月創構大成殿設聖像於中宇列亞聖十哲於左右
春秋祭祀使諸儒拜趨其下瞻之仰之得展其誠敬皆邑中耆老之力也於今四十餘載兩廡
諸賢之立尙猶闕然延佑三年夏四月翰林椽史耿公承事來尹是邑下車之日政之蠹民者
削而去之事之便民者舉而行之扶植良善退斥姦邪勸課農桑禁止游惰興舉學校養育人
材獄中無淹禁之囚境內絕盜賊之警強梁跋扈者畏威而逃去孱弱悞者懷惠而得安行
之再期人民大悅因以暇日遊於芹宮與同僚監郡哈海敦武主簿趙將仕及只兒瓦反進義
縣尉宋登仕典幕李翼等謀曰吾來是郡甫三周星每春秋陪祭於殿下觀兩廡之不搆無以

續七十二賢及歷代名儒之像歎然有愧於心非敢怠遑以口力不給未暇及之吾欲興滯補弊以繼前人之功諸公以爲何如耳諸公同聲應曰唯唯惟公命之乃出錢數千萬緡鳩工募材經始於延佑五年秋八月落成於是歲冬十月未嘗役民之力斂民之財賴此數公宣我國家崇儒重道之義興學養士之方相與戮力而共趨之告成之日邑中耆老楊質等欲刻諸石以傳永久學官楊齊賢請予辭而銘之予不愧荒菲謹撫其實而爲之銘銘曰惟豐潤之爲邑兮在溲之陽土沃民饒兮獨甲於東方首善自京師兮化四洽而洋洋惟都邑之承流兮皆設序而開庠賴有其人兮而能上繼前人之光大啟聖人之宇兮闢聖人之門牆使息於斯游於斯者得闔奧而升堂材成德毓兮大爲棟而小爲梁上以副聖朝興學養士之意下以塞承流宣化之責繫斯人之芳譽兮彌久而彌彰

越支塲重立鹽塲碑記

元徐世隆

海上之國鹽爲寶蓋天地之富藏邦家之鉅產民之所常食不可缺者也昔夙沙氏佐神農烹海水以食人人始知味厥後帝王繼作因民所嗜俾恣取之而無籠權之禁逮管子相齊乃請桓公煑渠展之鹽征而積之糶之梁趙宋衛諸國獲成金無算權其輕重以成霸業由漢以來

廢置不一凡主國計者必以管子致齊富強之書爲言時君多從之豈非事之與古殊而度之倍百與其加賦於民孰若收山澤之利之爲便鹽之有官其以是歟幽州置鹽始見於後魏歷唐以迄遼金地屬京圻生齒旣繁炊鑊益衆嘗設提舉司於寶坻秩視五品以重其選所轄諸場越支課居其半特除管勾一員以蒞之國初草創鹽政未立任土之貢一付京官時土豪張進輩被府檄鳩遺民數十戶集越支之宋家營以居復事煎造聚落未成京使已旁午令大償巨價債緡鞭笞逼急田野爲之騷然未幾以鹽司隸徵收課稅所衆稍息肩自鬻課之令行提領諸路者旣自詭增倍鎔山爨海搜羅殆盡其徵輸入官者須厚賄乃獲歸且以所費取償於其屬大抵用直十錢之物嘗估以當數十錢之屬而工本又稽時不給給則克減自是灶民困矣中統元年改分十道宣撫爲外臺悉革前弊然禁甚嚴下之估罔利者陰虐無告民猶爲病至元二年詔以大中大夫禮部侍郎倪德政爲中都路轉運使提領稅司事荅木丁同知使事寶坻鹽使崔岩臣副之倪公敦厚廉平且練財穀稔知民苦計會同僚公議凡場戶入鹽卽給仍純支寶鈔不折諸物其尤貧窶者預貸工資以贖之存恤百姓於是富者起逋者還乏者足惰者勤擔者車步者騎僑者籍秤量平牒訴息獄犴空倪公倡之同僚和之曾不三歲鹽課以

盈席袋山積瓦廬相連牛馬蔽野熙熙然如在春臺和氣中咸曰自再立鹽司以來幾五百年未有如今日之安靜無擾者也耆老翟安仁暨士人數百衆口一辭願樹監司石以紀政績介故人曹君世傑來乞文余謂人知監司之賢不知相臣擇監司之賢人知相臣能擇人之賢又不知天子能擇相臣之聖上下惟各得其人故能利人之病富人之貧樂人之樂憂人之憂使諸路鹽司皆能如倪公輩之心將澤遍天下又豈特越支一場而已哉若是當有國家考績之法此不必喋喋特采其廉平安寧與人稱頌者爲之書

重建社學號舍射圃記

谷九鼎

古昔先王之世大臣君子皆身兼文武之資所以久安長治至今以爲首稱我國家法古立政內京師外郡縣罔不建學蓋學爲王政之本以階聖功以端士習以程藝能賢士出而文武資之王政備矣故有社學豫養正也有號舍專肄業也有射圃重觀德也卽建學之意固將以文事武備望天下之賢士其爲王政慮何肫切哉然而倡率化導之機則在賢有司加之意耳豐潤爲畿服首善之地其社學號舍射圃蕪廢有年遞相因循無能舉者迨隆慶己巳縣令王君廉介有爲明察以斷政通務舉境內肅然乃視學缺典慨然有感曰是何以稱朝廷造士立政

之意哉遂欲飭典申教特列狀請上時巡撫都憲劉公督學侍御陳公偕以爲然爰捐罰錢若干貨氓廬以傭工昉於歲之季夏竣於孟秋社學射圃號舍巍如翼如矣美哉斯作風教於是乎振諭教李君志學司訓王君鑰陳君士華因命鼎紀之以示永久且曰王君之建學校匪徒事虛文已也既能善治又能善教先擇端朴能文者以爲社學師令民間童子俱習小學隨時講論考課以作登名甲科之士又每朔望率諸生於射圃較射獎戒以儲安內攘外之才行以實心期以實效其祇奉朝廷德意尤可書也鼎曰學有廢缺有司責也胡先令於是者弗知所重哉可以觀政矣多士際此自慶千載一時盍思自振相與刻勵磨淬則德行道藝登之鄉書射策決科陟爲世用庶無負於聖朝建學育才之意亦足以副諸公今日作養之盛心也縣令王君諱納言武進人能擅厥美鼎因紀績以彰厥美後賢考之可不思繼續其績以媿厥美乎

建造豐盈倉碑記

明官 廉

薊州永平山海爲我國家畿東要地蔽京師而引遼海故自開國以來宿重兵命大將統之關營城堡犬牙相制守戍惟謹計其歲支月費四十二萬石有奇仰給於海運之粟者蓋居強半外則屯田民賦之人焉然而海運在國初導海入灤達於永平繼以風波之險乃亂海入梁沂

沾達於薊去永平山海遠甚宣德間嘗令軍民於秋冬農隙由陸轉運以繼尋又以勞且弊而罷嗣是以來凡薊州東戍卒疲於奔命供餽徒有虛名而上下交病焉成化辛丑廉承乏督餉之命至則竊以爲憂詢於衆謂豐潤之還鄉河可通漕永平之東盈倉可移置而海運之粟可分貯以便永平山海之餉乃建議請於朝下戶部檄鎮守太監趙公永巡撫都御史李公田總兵官僉都督事李公銘會同體量之維時羣公究心相度詢謀僉同肆如初議以上聞可之賜倉名豐盈張官置吏以司出納羣公乃發丁夫鳩工作濬河之堙導泉之源塞防之缺運東盈之材擇爽塏之地採薪蒸磚煉灰琢石經之營之視如家事而惟懷永圖選文武屬吏之才者分董其役木以根記二萬四千有奇磚以塊瓦以片灰以劬計者各四十萬米石計者八千五百有奇鐵石薪蒸麻章墳之需稱是河之役萬七千人工閱月疏濬以里計者三十有五關以丈計者十有五深視闊十之一倉之役一千五百餘人工踰時爲倉以間計者三十間十有三架食給於官民效厥力落成有日羣公顧謂廉曰是役也利益一方重且大矣不有以記其顛末後將來者安保其無墮耶矧議自君建其勿辭竊聞之天下之事成於同而敗於異始廉之建是議也惡勞者樂困循奸利者憚更張或公議於朝或私議於野紛然難之而羣公獨灼有

定見挺然排羣議而矢於必成役不怨之勞成不費之惠是則羣公之所同者非苟同也公也衆人之所異者非自異也私也公則同私則異異則敗同則成理勢然耳繼自今轉虛名爲實惠收永逸於暫勞興大利於小費而上下無復交病之虞則向之紛然自異者亦未必不化爲同矣疇復有敗乃公事者哉夫羣公膺明天子千里寄托之重握一方廢置之權矚安危休戚之機而能不惑羣議叶心同道以成是役可謂無負上下者矣惜乎斂惠一方偏而不周安得羣公數十輩環布天下或訂謨廟堂則生民不患不安朝廷何復有四顧之憂耶至於葺理是承不隳厥緒則又將來撫鎮是土者責也雖然向使羣公素無以取信於上而或任之弗專而或異者之言得以間之亦未敢要其必成也書不云乎元首明哉股肱良哉庶事康哉其斯之謂乎廉濫竽從羣公後敢以是爲來者告若凡有勞於是役者則題銜姓名於碑陰台峯曰是役也勞而無益徒以病民當時初未成功浮文恐猶誤後故錄而斷之以杜病源

義豐驛新遷碑記

明楊維傑

國朝設驛以待天下之賓器御夫馬之屬自有定制愛民之意固亦有在焉豐潤之爲驛有二曰永濟去縣治西四十里曰義豐去縣治東僅二十里東西相距未及百里使客之往來遠人

之朝貢軍機之奏報駐節至再未免淹至之憂且廩餼頻復服役是二驛者又城居多饋餉奔走無時少息民亦深以爲病焉嘉靖癸未或以是聞諸巡撫中丞孟公春孟遂詢諸兵備觀察使熊公相熊曰先是下店公樂嘗有遷并三河之舉茲當革其一遷其一餘縣治矧按志國初永濟驛原隸縣治之南關茲特復其初是豈無稽之爲哉乃會巡按御史郭公楠具疏以聞報可責令義豐永米養廉董之維時署縣事爲州吏目王堂主簿王瑾典史戚鸞與協力捐地城之東南徙義豐撤永濟之材以補之中連正廳五楹東西耳房十楹後堂如正廳之數廂房如耳房之數大門則砌以磚石架鼓樓於上儀門左隅設馬神一祠廨舍一所廨後草場廣闊周遭繚以巨垣大門之南更治屋數十間以爲服役者之居其他如廡如庫如倉戶牖器用樹木之屬靡一不備且衆不知勢財無所費始經於癸未之秋僅一年而厥功告成矣繼是文縣張公獻以知縣事至謂養廉曰易窮則變變則通興作之役春秋必書茲舉通變之宜也興作之常也可無聞諸後乎養廉謀諸郡人鄉貢進士王君濟民體民走書徵言於予予曰先天下之事者在乎見成天下之事者存乎勤義豐之併行者利焉無滯濡之憂居者安焉省供億之費眞王制之大有弼國家不淺矣然非中丞公輩固不能知其所當爲非養廉輩又孰能成其所

當爲之速且備哉數公之見之勤皆可見矣體民與予同年且告曰永濟作治縣南且爲豐潤故號併驛猶名永濟可也必曰義豐者以存養廉故也遂爲之記

新建順成廟碑記

明王納言

嘗讀禮至祭統所載有功德於民則祀之能爲民禦大災捍大患則祀之古人之爲民至故凡民所利賴無間巨細皆以專祠祀之其敬鬼神者其務民義者也去年冬予以鐫級承乏豐邑職與民爲親迨抵任後因徧索境內諸神凡可爲民禱禳弭災爲祥者若干輒飭其蠹而新之若龍王馬神二廟葺其覆庇增其門堂已秩然起矣既舉祀事及蜡廟則由宏法寺紆曲而入廢址一隅地不盈丈置神主於欵欵葦廠中掃地行事乃愀然曰胡神之不奠至此耶闕宮有洫鬻辜告虔而市譁逕焉積穢蒸焉神其能安乎遂卜地於新建東關遞運之北出所積贖金僦工市材百用咸備爲堂三楹前崇一軒中堂則肖像正位冠以大門繚以周垣復置二室於堂之巽隅居道人之有戒行者給香火役經始於歲之五月浹四旬而落成厥時蝗飛蔽空分越他境不殃民田人咸歸功於神而嘉其禦災捍患因顏其匾曰順成廟焉適余以內艱謝事董是役者進曰廟制一新無言以記歲月可乎予時情事總總涕泣不知所云請益懇乃俯首

而思曰是請也得非民將託此以識吾名乎雖不文奚以辭爲易曰天地之大德曰生而農則生人之本也災患至而農罔有秋豈曰天地不與聖人同憂而果於忘情斯民哉天地無爲而凡神之各致其能以效其靈者卽所以終天地之功也神能爲民禦災爲民捍患其功德不可泯民循故典如禮祀之以致其報則所以報神之功者亦孰非所以報天地之功也昔伊耆氏始爲蜡主先嗇祭司嗇曰農曰陞表畷曰貓虎曰坊曰庸曰昆蟲無遺靈焉蜡之日索蓋言合聚萬物索而祭之也惟神功德在人均之能禦災捍患以終天地之功故不問巨細法得咸秩其爲民全而祀之也固宜予以庸瑣臨民無功德可述而民所利賴之神祭統所記載者復不能修舉廢墜使吾民禱禳無所則曠瘠孰甚焉茲廟之建也神安其居民狎其野而豐年穰穰與豐潤之名義允協則後之令茲邑者或尙知所報賽云遂援筆記其原起以授請者并系以詞曰民天在食惟神是司秩垂祀典祭祀以時宜稼於田靈旣在茲旱乾水溢變置因之爲祥爲災神其繹思

重建東關遞運所碑西

明張守中

豐潤在薊東南二百餘里密邇邊陲諸屬國入貢旁午於道即能吏往往難之銓部以武進王

君納言宰是邑固慎選也君甫至卽訪求民瘼并興革事宜百務俱舉遠邇翕然稱治邑東關
遞運所歲久頽廢官吏僦居民舍遠人道經者無寧所輒入城謀居民不安堵衆咸苦之君目
睹其弊嘆曰何以觀遠而廣德哉乃慨然思更新之白於大中丞白川劉公報可遂飭材工鳩
以贖金董其役閱兩月而成規制嚴整煥然一新正廳南向冀以兩廓冠以大門廚舍廩厠咸
備統官吏房其計二十二間爰徵余文以記歲月余惟在下者未嘗無任事之人而或不獲於
上在上者未嘗無興事之心而或不獲於下上下相遇之難也久矣王君以勵精任事大中丞
以勤恤成功一振舉間居者有定舍行者有常館而民得以無擾焉是豈尋常興繕者可比哉
昔周單子聘楚過陳見其道穢而川澤不陂梁客至不授館羈旅無所寓遂知其不競蓋城郭
道路旅舍寄寓皆三代爲政之法周官尤重之王君之是舉也安遠寧邇勞不及民費不勤官
百年之廢興於一旦同心濟事卽周官旅舍之設無愧焉率是道也異日和衷以相大事所謂
在朝廷則朝廷重在邊鄙則邊鄙重何古今人不相及乎余無文喜君之有爲而賢大中丞之
相與以有成也僭爲之記

重修天宮寺碑記

唐壽朋

梵宇之最名勝而可傳久遠者其故有二焚修也游觀也焚修之要處僻壤則乏供奉近城市則多喧囂富厚則生驕惰儉薄則易流散酌遠近豐嗇之中則名宿可以卓錫矣游觀之宜清曠而後可以開襟孤高而後可以舒眺遠挹山色則俗念消近狎波光則道心淨擅林泉臺榭之奇則高賢可以怡情矣然是二者每相需而難相兼兼之者其豐之天宮寺乎寺居邑坤地前人謂浮圖秀聳適以補地形之缺而像殿古樸境宇軒廠寺之踞平地者邑人呼爲下寺周垣數百步可居僧徒百餘人履其境者令人蕭然自遠前人有句云五國風煙存古栢諸天鐘磬靜寒宵可以想其幽寂矣其西北爲塔院築層塔十三級於高臺之上邑人呼爲上寺北望羣山鳳翥龍驤青紫間色南顧平湖萬頃秔稻菰蒲與芰荷間如錯繡前人有句云水勢欲浮層塔去山形如擁數峰來足以盡其佳勝矣然寺頽廢既久燐火遍於荆榛蛇鼠竄於瓦礫千百年選佛場幾於一敗塗地矣曹封翁見而傷之作禪室五楹於殿後以居焚修之僧又作客堂五楹於塔院之上以棲游觀之客而嗣君冠五公偕熙齋劉公又作側堂於右鞏圖谷公復建側堂於左於是戒僧踵至衆善雲集而歲進士韓公有一文學劉公新甫復合上下寺爲一而以漸更新之又率衆置田飯十方僧爲久遠計嗟乎世人日泊沒昏濁中三毒六塵浸燥心

隨牢不可拔而諸公獨觀昭曠之原游心世法之外其賢愚豈可以尺丈計哉今者百廢漸興人天共悅嘖唱徹於晨夕游屐多於市廛凡焚修之福皆其福也游觀之樂皆其樂也豈必舌長青蓮心懸皎月而後爲先登覺岸者哉余故樂爲之記

重修關帝閣碑記

曹鼎望

若稽帝王釐定祀典以勞定國者祀之以死勤事者祀之能禦大災捍大患者祀之祀不可廢廟由是興雖曰酬功報德有舉莫廢亦以神道設教入廟思敬輔禮樂刑政所不及其有裨於世道人心匪淺也然而在一邑者香火一邑在一郡者焮赫一郡未有仰威靈而起慕如關帝者也吾邑關帝閣建自唐太和六年迄今幾千年矣歲時伏臘邑人祇事甚虔水旱癘疫有禱輒應明季兵燹繁興彈丸小邑介居孔道頻危復安卒免破巢毀卵之禍非人力乃神祐也歷年久遠柱礎傾頽丹青剝落已巳夏邑令三原孫公捐俸首倡紳衿父老翕然從之鳩工庀材不三月而鼎新僉謂余曰是烏可以無記夫以帝之普天率土戶祀家祝昭彰於歷代之封册表揚於文人之贊頌者不啻詳且悉矣余何容記亦何能記惟記帝之捍衛於邑與邑人之虔事夫帝者如此亦足見靈應之不爽矣是役也肇工於五月而落成於八月凡用銀五百六十

有奇其經營而任勞者則張起鱗其首倡也例應並載以爲好善者勸

移建忠武廟碑記

吳慎

嘗讀宋史至岳忠武傳輒掩卷雪涕不忍終篇夫忠武以中興名將百戰雄威震起一時卒以金牌召促獄陷風波有臣如此擠之死此宋室所以不競而千百世猶唾恨於賊臣之悞國也浙之杭爲南宋故都忠武之墓在焉癸亥之冬予閩歸經由曾一展禮土人傳當日軼事若欲生之齒頰豐於宋爲金地猶敵國也而亦祠之耶此可以知感召之故矣邑舊有忠武廟在西門內不知始建何年城守翟君創議移建南門之甕城以捐以募邑尉白君協力成之經始於乾隆十九年三月落成於六月向之湫溢者今爽塏矣向之頽唐者今整齊矣舊設營署於城之南街去廟不過數武將弁得以時瞻仰而能貌之衆出入必式忠義之氣有不勃然而興起者耶此固翟君之心也翟君詩酒鳴琴有儒將風而遇事激昂義形於色詩有之高山仰止景行行止其宗仰固得所主歟

創建留養局碑記

吳慎

嘗攷周禮地官司徒遺人掌邦國都鄙田野鄉邑之委積以濟艱阨而恤羈旅命醫師時其疾

疫而治療之道里有廬有室有宿有候館飲食以周乏困蓋先王之恤民隱計生全者其宗理微密雖至纖細而未嘗或遺如此第法久寢息鮮克修舉道路之間無告者遂衆矣我

國家承平百餘年政成化浹治具畢張凡含生負氣之倫莫不得所又令天下郡縣設養濟院以周土著之疲癯殘疾孤老無依者亦猶遺人委積之法而仁厚則過周遠甚今

制府復參伍法制謂居者固處衽席之安行者猶多漂泊之感非所以宣布德澤而推廣

恩意也故飭有司設局通要以養行旅之貧且病者慎於調豐之明年捐俸五十金爲首倡紳士

商民咸相感悅共輸八百餘金置局有四其一爲縣南關因廢寺以葺治凡屋九間其次縣西沙流河建屋五間次則縣南北宣家庄左家塢各建屋如沙流河皆堅固完好足蔽風雨其厨竈牀簣蓐食寢處之具則視屋廬爲多寡費工九百七十錢五萬八千一百有奇市月而竣事繼慮隨時補苴經遠必敝乃以餘銀七百五十二兩置地三頃六十四畝於縣東北之胡家庄歲租糧四十九石五斗爲留養者衣食炊爨藥餌棺斂之需贏則附貯縣倉登記檔案以杜侵漁且入交替庶不流爲虛名乃能歷久不廢是役也不費公家不取貧民分富者之毫芒濟行道於急難在我無損於彼甚益則載

憲德以去者且千萬里矣豈直溱洧之乘輿而喫咻之脯豆哉况行路之難千古同慨當其山河阻絕獨旅難歸奔室家已弗及復邦族而未由風露浸淫乎肌膚呻吟不聞於妻子授趾無門疴痒誰恤呼吸之間存亡莫保黃沙漠漠白骨未埋一旦到局如家因留得養溝中之瘠且自此而起將無一夫不得其所無一人不被其澤矣非甚盛舉歟局成勒石以紀善政之槩并列捐者於碑陰後之君子尙其遵守而勿替焉

重修溆陽書院碑記

乾隆戊申

沈亦然

書院之設所以集境內俊髦而督其專攻於舉業者也何言之家有塾黨有庠非不可口講而指畫也然瑗瑗姝姝人奉一先生言守乎此而失乎彼矣膠乎古則戾乎今矣安必其折衷之皆當而觀風之盡善乎書院之師一而已矣有程式以一其風氣有友朋以資其切磨有甲乙以定其優劣然後惰者勤愚者勉向往有方而獲效甚速其所係不綦重哉豐潤書院之廢久矣余蒞任之明年乃與邑之賢士大夫各捐輸焉以爲之勸修垣牆葺庭宇別廚溷設几榻規模已略具矣筆黑之資一飯之費亦差足以給則諸生之敬業樂羣其自茲始乎雖然名與實之不可不辨焉有扃門關徒以課期爲故事而於詩文終不一觀者謂之名有不畏風雨寒暑

必竭其一日之思力爭雄角勝而不屑居人後者謂之實吾願諸生之務爲其實而勿徒存其名可矣非然者程式不足以範之友朋不足以助之甲乙不足以勵之安見書院之設必勝於塾與庠耶

改置溇陽書院碑文

知豐潤縣
事滑縣人王仲槐

閩州左控孤竹右接藍田枕燕山環溇水形勢之壯甲於畿東而又蒙

聖朝之文教沐先哲之德輝以故科第蟬聯人文蟻絡都人士每快談之余嘗按羣書披縣志見

自魏元以來如楊景文之博通古籍張孝卿之領袖斯文谷霖蒼之著作成編曹和石之明經立教皆其彰明較著者至若名列鄉賢傳入文苑以孝友忠義光家乘而載國書者筆不勝述斯固靈秀之特鍾實賴栽培之有自然則書院之設其有裨於世教人心非淺矣邑舊有溇陽書院建立營守之旁其創立不知幾經年所而雨蝕霜摧傾圮殆盡豈盛衰興廢之適然歟抑保護維持之不力歟余於丁亥歲來尹是邑心嘗惜之夫士居草茅潛修閉戶非不可奮志功名然或囿於一偏或拘於一格師心自用半近疎狂至寒峻之儒又或艱於資斧未能負笈從師以故聰明特達不得博科名登甲第者蓋十八九矣且作養人材建興學校有司事也以畿

輔之近文物之鄉而令英姿淪落俊秀不升可乎爰集合邑紳士共勸義舉購谷氏舊宅而重
整焉地居縣署之南院設學宮之北公事之暇庶得與學師院長講論其間記日相觀而善之
謂摩於諸生或不無小補云惟是經營伊始膏火無多姑將首事樂捐諸人先勒於石以爲將
來者勸後之君子踵事而增不更蒸蒸日上哉雖然書院之設非徒博令名循故事已也鵝湖
講學接往聖之心源鹿洞傳經明人倫之要旨近乃多尙浮詞不求實義非以肄業開資緣之
漸卽以私交起標榜之嫌而聖賢大公無我之懷幾於不講此流弊所以日生儒林反致多僞
也曷思士習爲民風所係文章與品行相關惟願來茲學者以孝弟忠信爲本以節廉禮讓爲
先勿以小害大勿以私廢公勿以朋爲黨勿因名譽而視己過高勿鄙愚蒙而責人太刻勿矜
情於浮薄勿役志於紛華爭自琢磨互相勸勉出爲有用之才處爲無瑕之品上不愧 國家
養才育德之隆下不負師長舉善勸能之意彬彬爾雅務思嫺美於前型則余之所厚望於同
志也夫因爲之記

建修韓城鎮義倉碑記

王仲槐

義倉之制昉於開皇之時令民家出粟麥以貧富爲之差輸之當社委社司檢校以備凶年民

利賴之後世師其法而行之者皆有備無患焉方今

聖天子慈惠黎元周恤民隱偶有災祲不惜帑金巨萬以爲蠲賑

帝澤之渥有加無已而於民間之能出粟濟貧者復時加獎勵蓋圖匱於豐上爲民計不若民爲民計之有實惠無虛糜也數年來直隸州縣莫不以勸捐義穀爲兢兢所在皆有成效豐潤爲神京左翼枕燕山襟滄海灤河洩溪環繞其間自古稱爲沃土丁亥夏余自束鹿調任茲土勾稽簿牒其義倉之舉已井井有條雖未蕝其事而前令之規畫及都人士之好義以勸厥事者可觀也邑之南爲韓城鎮因倉成請余爲之記以垂諸後余可之且得悉其巔末蓋中門莊向有義倉以貯韓城各村之義穀乾隆間不戒於火儲積無少遺且地處窪下積數十年未能興復近有吳君壯基者獨慷慨董其事登高而呼一唱百和共捐穀豆四百二十五石復因故址之湫隘謀遷諸爽塏乃擇於韓城關帝廟之西偏建正房八間廂房五間以爲之倉鳩工庀材覆以甍瓦整齊黝窒規制爲之一新矣夫魏李悝之平糶究屬權宜宋趙抃之完城非能常舉獨義倉之舉歷久而可行者良以民輸之民理之朽蠹之患無聞侵漁之謀難試故其數均其惠溥今韓城之倉旣落成收永逸於暫勞興大利於小惠自今以始歲其有後之君子踵事

而增將見陳陳相因出其賫者取之甚便食其利者享之無窮使豐邑之民無惡歲於以凝天
麻而廣德意也亦誰謂今之人不古若哉是爲記以鐫諸石

初建德星橋碑記

即石盤 遷安 鎮橋

馬恂

甲申夏五石橋功告成四建啟路五洞通流居者永賴常依鐵廠之鄉行者孔安不慮銀潢之
限德深事重功鉅用繁蓋惟豐邑冠家寨鑲白旂漢軍候補都閫陳公恆一印安平者善自因
心事非集腋乃獨成盛舉焉緣以膏車而屆適隔迎津倚棹以歌莫招舟子日至月至覺跋履
之維艱經之營之實人已之俱利顧茲鷗波作漲去公則猶記六程馬迹周流而歲而未嘗一
踐何其念征人之厲揭惠我無私創普建之規模爲善最樂未提記鎡化成百尺之虹白水權
緡達彼四方之駕回憶昔者值一溪之繫路寔百里之畏途未融春雪淺不勝舟甫接夏霖深
幾滅頂寒水減而依舊寒裳層冰結而拖以懸溜推馬難前驅車恐後紅泥沒髀沾濡則賦甚
於膠白石妨行破碎則堅真如鐵而橋之既建也凌虛幾桁彼岸遄登跨水一弓迷津莫失坐
擁安車惟臨流以策驥力堪扶杖詎脫袴而呼禽是以鄉之人利橋之便戴公之恩將奉揚其
仁風以發抒其德澤緬穎川之族推太邱之賢皦然不滓好音式化於鳴鸞偶爾出游太史已

占夫元象因思德星之聚自古有稱今公傾囊恤衆道以廣而能周卽險營橋惠以寔而可大前徽斯在芳躅可追爰額其橋曰德星橋德在益人非古今不相及星應降福自先後之同符勒諸貞珉快茲同志嗚乎成非鞭石共溲水而同新長可臥波與燕山而並峙因厥功之甚偉用援筆以直書是爲記

乾癯和尚碑記

董崑

縣南富家莊藥王廟西偏室舊有乾癯遺骸一蛻和尚名來秀號涵宏於康熙三十九年二月十八日圓寂寺僧就其跌坐處置龕逾二年餘煙火自發於鼻口中光燄照徹殿宇僧衆驚救煙火息而遺蛻完好如故乃爲位奉其蛻於素所居之方丈朝夕事之如生迄今二百年矣村中父老猶有約略言之者和尙爲雲貴人不知其姓氏或曰明末進士直隸人懷宗殉國矢志不仕至我

朝順治初其同年友薦之和尙乃避而遠遁焉又爲州縣所搜求吏胥所譏訪遂脫髮爲僧厥後其妻攜子徧尋於山林間舉無所得將至寺之前日和尙預知之戒其徒嚴閉寺門不許一人出入次日妻與子至將從前所服之衣履及薙髮一束命人從牆上擲與之妻與子繞寺號泣

三日始去嗚呼吾於和尚悲其志矣使斯人出而仕也必有可觀之事業焉不幸窮而在下則傳道授徒闡孔孟程朱之緒手著一書壽之名山傳之無窮使其言行爲天下後世法即不然或耕於寬閒之野釣於寂寞之濱如韓昌黎所云大丈夫不遇於時者之所爲泯泯以沒其世焉是亦斯人之不幸矣而奈何棄乃常道變乃形體銷聲滅迹逃其身於空虛寂滅之中若不稍自愛惜焉豈潔其身而不顧行者耶何矯矯若是也崑於道光丁酉歲與翟子觀光讀書寺中顧瞻遺像見其灑然跌坐眼綻青蓮容輝滿月非寶相莊嚴金色微妙者乎又時檢其遺篋有手著法華涅槃等經解及詩偈等稿皆殘毀不全然於一言半偈之間尋其理致晶瑩透澈是能參最上之乘傳初祖之鑑者矣蓋其心性高明智慧堅定任所向而皆可造極設使尋常俗士當之既能進士必不能和尚即能和尚必不能圓成識不真守不固斯聲華奪之矣有熊道士者指一破鼓謂余曰此涵宏和尚手製也鼓圍丈餘上有二孔大者如盃小者如拳擊之聲隆隆聞數里外又二十年余至寺中熊道士已羽化矣寺僧謂余曰君猶記破鼓之孔乎今已無矣余熟視之舊革果暗相合而無迹可尋抑何奇也嗟夫西山之薇蕨方榮古寺之遺骸不朽文章事業盡付菩提日用彝倫變爲衣鉢豈斯人之心哉居今日緬想高風惟存一蛻得

勿令人俯仰低徊再三歎息而不能自己也耶噫

重修八蜡廟碑文

孟昌第

天子大蜡八主先嗇而祭司嗇饗農及郵表睨迎貓迎虎祭坊與水庸合聚而索饗之所以除水旱備凶荒祈年順成衛民天而固邦也伊耆氏創之歷代因之祀典煌煌有舉無廢禮至重矣我

朝邵農是務倍極尊崇自通都以及下邑廟貌隆然規模整肅春祈秋報俎豆莘莘蓋隱然爲萬民託命之區焉豐邑八蜡廟舊在城中明隆慶間邑侯王公納言因地基偏窄遷於城外東北

隅

國朝以來李公文林吳公執中姜公之瑜沈公振鵬數大令先後重修次第整理神靈爰式憑焉歲月流遷風霜剝蝕檐楹垣宇漸就傾欹今邑侯瑞卿謀父母見而傷之諭令修葺因人心之大同鼓舞勸辦不日而成輪奐重新有嚴有翼可以妥神靈矣自今伊始土返其宅水歸其壑昆蟲毋作草木歸其澤使我年常順成而八蜡亦永無不通也民得所天 國培其本不亦懿

歟

大遼景州陳宮山觀雞寺碑銘 遼大安九年九月九日建

維三宗教孕源於竺邦後千餘年寢流於震域東漢之金人兆夢經象以之始興全吳之舍利
飛靈塔寺於焉競作歷晉宋而下迨隋唐以還派行蔓延周及華夏我鉅遼啟運奄有中土始
武功以戡世亂力拯乾綱中文德以葺王猷模恢帝業尙慮前緣未曉寧分貴賤之殊後報或
迷安息戰伐之役繇是誠堅信力誕布宗乘遵一音垂囑之專固萬葉匡維之盛俾民知信嚮
免仁暴以參滄化助修明極邇遐而敬畏浮圖爲勝可得而言故今昔相沿歷朝所尙城山在
處列刹交望廠設精廬侶棲泊靜且鄰都邑定苦騷煩觀雞寺者離垢遠塵之蘭若也按幽州
土地記薊城東二百里陳宮山觀雞寺土俗傳說曾觀山蜂有金雞之瑞因以名焉載考剏修
不詳何代地方沃爽路概虛通北依遵化城寔前古養馬之監南鄰永濟院乃我朝煇耀之場
九峪十峰縈回左右甘泉仙洞濬列東西而况寶塔靈應之山鎮其形勝龜鏡佑國之寺翼乃
標奇信絕世之福田幽巖之殊致矣寺塲邊外繚以石垣固崩圯也佛立當前藏諸貝牒備閱
講也嚴其正殿所以擬瞻依也敞厥後堂所以延講侶也啟闢典庫藩利息而資費也治葺庄
園事播植而供億也仍擇乾位別置淨居虛白其堂用棲僧衆夫誠修則事應道在則緣成雖

有真寂之鄉苟無滄潔之士則山坊雅秀徒爲樵牧之資院宇幽閒曷積薰防以業主張有在
必賢良能當寺故堂上律儀精檢爲衆所稱者曰雲慶雲璨雲行皆儉素秉常誦焚厲操宴寂
巖室六載不違其邀轉讀蓮經方過將終其志或凝寒徒步履臘雪以無艱或常住總提取秋
毫而不犯噫生而必滅報身雖盡於先因代不乏賢餘慶其鐘於後嗣今講經律論傳菩薩戒
諱瓊奧善從宿種郤葷血以非嘗戒自性成曾譏訶而求玷日六時禮誦常三昧觀緣道德相
高緇俗共仰聿遵懿軌克肖先風講經律論諱可回學瞻輩流識超物表以宣傳而自任負才
幹以時推衆祈住持兼命提點計術有取威愚胥均積庫錢僅五千緡廣庄土逮三千畝增山
林餘百數頃樹果木七千株總佛宇僧房泊廚堂舍次兼永濟院屬寺店舍共一百七十間聚
僧徒大小百餘衆物產豐美惟附舊以增新謀畫指令凡一倡而百和後來居者宜守成規事
毋滋繁繁則疎於廣弊衆毋乖競競則致於睽離用能踵接乎昔蹤適足保安平常住向與予
道交有素義解潛通不以才職非長猥以銘述見託噫使後葉知此際興崇之力防未來隳失
之尤勤於貞珉期作永計延厓慵是癖筆削無能承禮命以彌恭屢遜避而不恕覲塞其請強
爲之銘曰

懿彼能仁 迦維降神 挺生粹表 溥接迷倫 恩及動植 慈等恕親 示歸寂滅
遺付王臣 我朝建國 嗣纂金輪 三教助化 千齡在辰 法流借潤 澤浸生民
焚宮創飾 率土彌綸 惟觀雞寺 隸清安軍 崇修紺宇 棲息高人 藉產股贖
堂皇都新 檀維信向 居衆和均 齋肅齊軌 誠明見真 常親是守 利行咸陳
期令後葉 不墜芳塵 慮清高岸 庸刊翠珉

大金薊州玉田縣永濟務大天宮寺記

金趙 攄

國朝故事凡寺名皆請於有司給授勅額其異恩者特加大字以冠之所以別餘寺也雖京師
名利相望而得賜是額者殆亦無幾然則永濟大天宮寺其名豈碌碌者哉初務之西南不遠
二里俗謂南台頭有岡隆隆然泉注其下縈紆環擁右斜而去泉岡之間氣象幽勝甲於其境
舊遼清寧之元有鹽監張公日成者愛其地以爲可起梵宇爲鄉邦依歸之境迺出金售之經
始基構中則正殿三楹塑彌陀像置大經藏越南北則堂各五楹繪本尊四智菩薩西序則僧
堂三楹隅則鐘鼓及內外山門次焉環則周廡百區寺僧千指有奇至於粥魚齋鼓物物完具
一皆獨辦不資衆化而舊有馬鞍山師弟法定者以名德聞於遼主嘗被召對講經稱旨賜爲

演教大師乃請爲之宗主功始告成而東道公逝矣幸而其嗣從宜有父風度清霽八年於寺
乾隅甃磴浮圖一十三級奉安舍利構堂三楹繪先賢容像築庵二區延致諸方道人在寺及
永濟務各施息庫一又施墅地二千四百畝南墅地一千五百畝用給齋廚之需俾演教大師
攝度徒衆以立常住鄉人初以南塔院目之壽昌三年賜極樂院額乾統五年改爲天宮寺及
本朝命元臣諸帥經略大人受進方物行府寓此寺數年故天會五年八月勅加大天宮寺以
酬之且示其旌表也逮正隆間二墅之地籍隸佛土凡傳受本宗有勅牒券記在焉一日寺僧
相與謀刻諸石迺狀其事請文於攄攄曰物之興替陰有緣數非偶而然者異時茲地榛棘蕪
焉狐兔遊焉歲月不爲不多矣一旦長者公子基之承之則紺園華闕梵聲潮音化爲選佛道
場此莊嚴殊勝之因緣也夫創之者勞居之者逸僅一再傳則廢者多矣且兵火之餘佛廟丘
墟十所而九是獨爲國相大臣擁庇保全自起至今幾百餘歲愈久而愈熾此住持定力之因
緣也即是因緣以觀之則從來大士耆德主持法門之意爲不負矣嘻士之謀道者或槁形灰
心於山谷間自非天龍送供爲納衣饘粥之計不能無外擾也口口居不謀而安食不求而給
其於從道也豈不口且口歟敢告後之居者一切口口常作是念當傳授精進不墜家風且歲

時香火以無忘檀施之力則予之斯文何愧焉

冷心亭記

徐崇熙

冷心亭者故蘇州刺史曹先生別業也亭之外環以石池轉轆轤注井水其中種藕蓄魚清冷活潑可愛池之外爲園廣袤數百步春花滿枝新菜盈畦秀可餐美可茹也園之外爲田高宜黍稷粟麥卑可粳秔稻粱旱乾水溢不足爲其災田之外爲天宮寺殿閣參差鐘聲夜動樹木蒼鬱塔影孤圓園之右爲燕山翠滴煙浮峰廻石起園之左爲豐潤縣治烟火千家鷄鳴犬吠居然城市山林氣象予晨夕登眺其上自亭而池而園而田而山川大地寺觀村落風雲月露晴暝霜雪人物鳥獸草木四時之勝無不於心頭眼底了了盡之無餘未幾此中恍然似有所得而不能言也又俟之一年乃知山川大地寺觀村落風雲月露晴暝霜雪人物鳥獸草木四時之勝可舉而攝之皆入田中田之勝可舉而攝之皆入園中園之勝可舉而攝之皆入池中池之勝可舉而攝之皆入亭中亭之勝可舉而攝之皆入心中亭之善如此其曰遣心可也賞心可也曰見心洗心無不可也而何以冷心名乎哉夫先生以選士歷部曹官二千石豈猶有所不足於心而志慨與或曰先生官旣罷年旣衰而心始冷也或又曰先生蓋借以愧夫時之

熱中於榮利者而故顏是亭以寄意也是烏知夫先生逆知百年後有不佞真冷心人來遊是園憩是亭而預蓄此名以相贈乎若是則先生冷之於前而不佞冷之于後也則謂之冷心亭也固宜

贈太學生石大用詩序

明陳敬宗

太學生石大用薊州豐潤人自邑庠登太學有年處六館諸生間恂恂謹飭惟強力植志務學不少自銜故自祭酒司業以下皆不甚知其爲人正統甲子夏祭酒李先生坐困首木於太學三日不解炎暑蒸鬱先生耄昏不能勝大用蹙然號於衆曰師猶父也父師權難而弟子奚忍坐視旣而察衆志不與己同乃退去閉戶疏奏懇請自代先生亟遣人止之弗聽同輩亦沮之大用奮然作色言朋友急難詩歌脊鴿况師乎亦弗聽竟挾所奏走謁銀臺銀臺難之且懼之以法大用曰生以義死亦以義何懼之有銀臺知其不可抑遏遂以其請聞於上蒙并釋之於是廷文武縉紳莫不歎息曰此前代之所僅有而近世之所絕無者也爭欲求識其面予聞唐德宗貞元十四年國子監司業陽城坐送薛約貶道州刺史太學生何蕃季償王魯卿李謙等二百人頓首闕下請留城守闕數日爲吏遮抑不得上蕃等皆涕泣餞送立石已得集賢正

字柳宗元致書蕃等賀之以爲昔李膺嵇康時太學諸生叩闕執訴僕謂迄千百年不可復見乃在今日卓卓如此予亦謂自蕃後迄五百年不可復見乃在今日也以蕃等伏闕數日卒不得通與大用誠意惻怛能感動天聽排釋難困於時刻之頃則其賢似有過古之人也夫師固不與五倫而五倫弗得弗明故於三事之道均焉凡天下之爲師爲弟子莫不知有是道也而謂迄千百年不可復見者蓋以師之爲教無實德弟子之爲學無實心上下名分依稀典故而已而於三事之道視之爲虛器焉固無怪其不可復見也先生秉仁迪義凡所以施教於太學無非實德大學生恒三千人而陶鑄醇懿涵煦粹美者甚衆大用至是發其所積奮勇不顧利害惟義是蹈此固出於大用之素稟然亦先生漸漬之極致然也先生之於陽公大川之於蕃等皆可無愧而凡天下之爲師爲弟子者豈不亦有聞風而興起者哉是歲大用以書經顯擢京闈鄉試高等說者或以爲積善報理或然矣是用播諸歌咏以爲後世名教勸詩曰有偉石生義激於衷陳厥惻怛徹聽宸聰帝曰釋茲復厥章服用顯名教維新化育簪纓紹璫爰及儒紳合詞贊頌卓哉斯人樸棫菁我名士攸同翹楚錯薪穎脫奏功惟初倡議衆且望望爰播頌聲能弗泚頹三事道均云胡弗尊茲焉弗篤慚負聖門師道岌圯延平植之陶煦醅懿名教在

茲左右高徒前後國士衆人之中大用崛起山有鉅材羣木蔽之貢琛明堂公輸忸怩天佑善類靡德弗報顯擢高科斯又有耀昌黎紀傳集賢致書我作詩歌永揚令譽

資生臺序

羅景泐

帝京之東枕燕山襟滄海灤河溼溪遠近紆迴於左右者豐之爲邑也邑西南三里殿廡壯麗而龍象蹴踏者天宮寺也寺西數武可級而上者臺臺之中高百餘尺聳然突矗穿雲而碍日者臺上之浮屠也寺建自遼而浮屠亦自是建焉故自遼迄今五六百年間凡遊客之往來及士大夫之讌飲未有不過止於天宮寺者至寺亦未有不登臺四望徘徊於浮屠之下者予治豐之四年歲在癸酉仲秋邑中士大夫因塔北舊有屋數楹年久頽圯各願捐資修飭擇吉鳩工於墻壁之漶漫者新之磚瓦之缺損者增之窓牖之不便於觀覽者開豁而洞達之工成携酒挈榼邀予來遊於此酒數巡有執爵而言曰老子有云我無欲而民自安豐雜旗民俗尙力悍自吾子爲政率多歛跡故我輩得從子遊非所謂無欲之表乎請爲吾子壽予曰否否又有執爵而言曰豐當遼海衝區猶憶明季干戈之際轉輸供應雜派七十餘種民疲於奔命爲令長者日事催科豈有寸晷寧哉自

本朝定鼎萬方寧而四海一苛政除而吏治清民生安常樂業養生送死四外不知有事則是吾輩之得以相從遊憩於茲皆

朝廷恩德休養生息之所致也請爲

國家祝予曰唯唯又有執爵而言曰生民者將出其賦稅以供上宗廟山川百神之祀以備兵革不庭不虞之患者也豐比年來嘗全復其租矣又停其半矣又蠲其十之二三矣是上之造我豐民有加無已如慈母之哺其幼子如長江大河之直流東注凡小澤大陂無不盈滿又如四時之風雨霜露資潤萬物無靳惜也無何水旱蝗蝻頻仍爲災以致貢稅不入縱上不我責我能不愧於心乎凡此皆歲之不登爲之也請爲歲祝於是予避席而歌曰臺之中浮屠挿空臺之北燕山秀巖臺之南滄海渺茫臺之側士夫讌集維臺之所兮鎮邑之坤坤之爲德兮萬物資生祐我年歲兮拯我熒熒早魃斂跡兮商羊不行三時無害兮黍稷繁榮含哺鼓腹兮大有賡千秋萬歲兮共嬉遊於我

皇之大清歌畢因以資生名臺至於斯臺四時之景山川之秀人物之盛猶有望於同遊諸君賦

之

資生臺頌

徐文駒

西江羅亦潭先生爲冢宰文莊公後裔文章學問嗣守前人尤精心吏治所至春溫秋肅卓卓有聲庚午秋謁選銓曹得順天豐潤豐固衝邑也右輔

帝京左控山海郵亭絡繹奔命不遑而先生處之裕如一以潔己愛民興利革奸爲務政之暇日則又論文課士酌酒賦詩相與討今古之源流攬山川之秀麗揮毫灑墨落紙雲煙驚其奇者咸以爲太白仙才復見今日面先生夙興夜寐神情所注時時在民瘼間卒不以吟咏故廢事也邑西南三里舊有大天宮寺寺創於金天會年自元訖明以逮我

朝幾五百載背山面海老松如戟先生顧而樂之寺西畔有臺臺中有塔亭亭直上突兀橫空雖塔不甚高而臺基助之遂成穿雲礙日之勢蓋豐邑之偉觀也臺上老屋數楹日久傾圮先生從而修之邑中士大夫賢者踵和其事整齊黝甍規置一新遂使前後玲瓏八牕洞達近瞻遠眺無所不宜南望滄海之氣與天一色回首北望則羣山環峙晴嵐翠色近撲戶牖於是置酒落之觴旣作士大夫合辭進曰今茲之遊樂矣顧臺未有名願求所以名此臺者先生曰唯

聖天子建置守令之職所以撫字元元某不敏朝夕唯不稱是懼况豐邑爲

神京左翼畿輔要地尤與遐方僻壤輕重不同而比年以來歲屢不登意政實有闕今此臺之建其位在坤坤土也萬物之所養也物莫不生於天而成於地故曰至哉坤元萬物資生乃順承天又曰乾爲父坤爲母今豐邑之望歲也如望慈母焉用敢徼福於山川以塞予牧民之責請以資生命之可乎諸君曰善先生遂自爲文序之比次年風雨以時寒暑不忒蝗不入境物無疵厲歲則大有嘉禾瑞麥日異月新蓋臺成於癸酉之秋而甲戌遂食其報天人感應之速若是其不爽毫髮耶夫自有此寺卽有此臺閱五百年未有名之者名之自先生始則謂造物靈異之氣至此而始一洩焉可也且夫水亭山榭珠宮貝闕間爲遊人所吟賞者何限卽茲臺未修甯無携觴挈榼徘徊坐詠於其中者而卒無人焉勤勤欸欸以不忘民事爲念則夫先生謀國之切愛民之誠咸於資生一名見之矣鬼神有靈能無默爲之相乎其歲之豐宜也非倖也往庚午之秋予晤先生於鄒舍人坐次鄒君指先生謂予曰此吾鄉之望也予心識之今年辱以令嗣慎調守默受經於予適遇歲和年豐與有榮幸且樂豐民之歌德於先生也爰爲資生臺頌以紀之至其景物之美人地之盛予雖蕪陋請俟異日賦焉頌曰神京奕奕北枕燕山

右爲馮翊庚水之灣維此溷陽盧龍古塞既拱

帝城又通關外旗民雜處繡錯如碁羽書載道竭其脯資民曰我勞疲於供應誰實字之遂生復性福星炳照庚午之秋怙我恃我天子賢侯名族大家豫章爲最理學文章軼倫超類文莊蔚起瑞鳳祥麟程門嫡系朱子傳人聖學宗風困知有記先生繼之象賢不替性情風雅寤寐詩書才雄八斗學富五車湧浪驅濤倚天拔地錯節盤根乃占利器滇南浴下歌者載途況於畿輔忍急追呼吾土吾家我民我子植其芝蘭鋤其荊枳一天明月百里清風左攜青史右引絲桐時雨乍滋枯苗頓起鼠雀無爭婦子燕喜政成之暇較藝論文進我髦士督課愍勲更以餘閒登高作賦周覽山川徘徊煙樹歐陽豐樂逸少蘭亭此風猶在媲美千齡邑之西南巋然有寺梵閣珠宮峇峩聳峙方廣百尺寺西之臺臺中有塔寶鐸聲來俯視紅塵仰超碧落映日干霄蛟騰龍攫由今遡昔垂五百年垣頽室敝蘚剝苔斑先生顧之慨然歎息此實勝區胡爲寂寂乃捐清俸爲邑士先疎櫺曲牖花竹交妍前望海濤水天一色雁落沙邊鷺眠池側後觀山岫蒼翠千層晴嵐雲繞暮雨煙凝先生曰嘻茲臺有助位在坤方克勩乾父萬物之母生生不窮九宮八卦五數居中其色則黃聿稱中德光大含弘重維稼穡爲民祝歲命以資生化工有

待洩此精英癸酉之秋甫告成事人傑地靈遽膺天賜前此四載水旱多虞屢沾

聖德薄賦蠲租甲戌之春陰陽時若甘雨和風宜耕宜鑿雲鋪萬隴浪捲千原高低色秀遠近聲
喧九穗呈祥兩岐薦瑞物阜民康百昌咸備父老子弟樂此有秋誰實致之德我賢侯侯不自
居善歸

天子曠蕩

皇恩宜蒙多祉輔相之力厥在山川鬼神默相臺與並傳予謂年豐天休不易三善齊臻卓然可

記維

主則聖維臣則賢陰扶地德臺亦有焉我作此辭式風有位仁政仁心萬年弗墜

明紀事本末序

谷應泰

通鑑紀事本末者創自建安袁樞而北海馮琦繼之其法以事類相比附使讀者審理亂之大
趨迹政治之得失首尾畢具分部就班較之旨左之編年則包舉而該洽比之班馬之傳志則
簡練而隳括蓋史外之別例而溫公之素臣也沿及明代迄無成書蒐釐條貫蓋其難哉余謬
承學政之役兼值

右文之朝夙夜兢兢廣稽博采勒成一編以補前史緬維高皇智勇天錫成祖雄姿英毅撥亂反正風驅電掃可不謂隆歟仁宣之間綱舉目張吏治蒸蒸明良洽歌詠太平繼體之休風也英宗御極耆舊罷政閣豎擅權遂至翠華輕出乘輿北狩自非樞臣畫謀景帝踐祚則虞淵之日墜地而已及乎南內奪門忠直被誅宗社卒賴焉寶宗嗣服不修諸怨更加謚號寬身之仁也乃愉相柄權大璫羅織祈於登明亦云惡矣孝皇帝恭仁莊敬虛懷納諫朝多盡臣野無兵革至其晚年尤勤宣問歷選列辟稱郅理焉武宗巡游無度寵任逆瑾晚乃芟除寘鐫宸濠禍變接踵顛而不亡亦其幸爾世廟藩服入纂綜核察察奸輔蔽之僅乃獲鋤國體傷矣穆宗守文俺答封貢乃輟朝日久中旨竊叢無足數也神皇乘豫大豐亨征徭既繁百工叢脞探厥亂源所自來爾光宗危懼之餘克膺大寶善政初舉天命不佑良足悲也熹廟拱手權歸宦寺元黃之戰毒流縉紳胚胎禍亡於斯酷矣懷宗冲齡手剪凶貂父老喁喁聿觀厥化乃以數乘陽九寇弄潢池僚窠營私將士懼懦及乎刃及宮闈身殉社稷則庶幾亡國之正也嗟乎周治盛於文武漢道大於高光此前世之所以興隆也孔子傷心幽厲武侯痛恨桓靈此後世之所以衰微也綜觀明政何獨不然昔湯臣進規鑒於有夏姬朝作諷戒在殷商惟我

皇清開天初造攬勝國之惠逆察已事之明驗保世滋大母亦於斯鏡見焉余不敏泛瀾衆家編綴是書比於九齡之千秋金鑑德秀之大學衍義雖材智不逮亦復竭其愚忠云爾

映山堂詩集序

徐崇熙

今之握管爲詩者所在多有而詩卒以亡何哉彼蓋於格調聲韻體貌形似間求詩而不得其本也夫人無天分不可以言詩無學力不可以言詩無血性不可以言詩無氣骨不可以言詩無眼界不可以言詩無胸襟不可以言詩無經濟抱負不可以言詩無閱歷愁苦不可以言詩詩之爲道談何容易予生長盈川山水之邦日觀富春花鳥之勝年始童冠志在典墳方其渡錢塘跨吳會而北也於齊尋泰山渤海之觀於魯謁闕里杏壇之盛於燕趙求慷慨悲歌之士中間困頓折辱者十七年於茲矣海內知名之士不下千有餘人大半翱翔雲路各得其欲以去胡爲乎搔首行吟獨無故鄉之感也然而獄底檻車聲出金石邊隅陋巷思入風雲志本激昂苟披劍即龍飛心無係累視奪官如蟬蛻浩浩落落何嫌何疑則斯集也蓋亦有本而然矣嗟乎士君子豈欲以文章名士也哉不得已而以文章亦寄焉耳况乎吾少也賤我生不辰長流孤竹之鄉飽飫首陽之蕨哭二聖於清風臺畔投七字於溷水河邊鄙可寬薄可敦頑可興

儒可立也古之人皆用之予何爲獨不然若夫漢魏之古鬱六朝之清麗唐宋元明之盡態極妍或轉相摹倣或競出體裁雖膾炙人口乎自知道者視之則固可束之高閣存而不論者矣

四書尋真序

劉所說先生著
原序三錄一

宋 梅

吾師永菴劉夫子理學宿儒彙四書講義纂輯成書名曰尋真爰命梓人刊刻問世工甫興而沒世兄起翰力成先志三年告竣囑余作序余何能序謹將夫子真之一字約略言之天地之真流行於兩間者亘萬古而不息人心之真發見於日用者歷萬變而不磨四子之書其所以闡天地之道明人心之理要皆以真意主宰乎其中上接堯舜湯文之統下啟濂洛關閩之傳所以繼往而開來者其理乃有所宗而陽儒陰釋騎牆牴角之說不得而亂其真也有宋名儒輩出闡發精蘊至朱子而集大成有集註有章句有或問語類而孔曾思孟之真傳遂朗然如日月之經天江河之行地厥功懋哉其後非不代有發明然紛紜同異鮮所折衷顧令四書真義歧出於是非離合之中而學者莫知所適從今

聖天子重道右文誕敷教化其扶人心而明理學者日新月盛異域殊方之士咸識微言山陬海澨之儒共明奧義道學之昌明亘古來未有如今日者也第恐幾微疑似致有浮光掠影之說擇

之也不精語之也不詳理解之不真昌黎兩言盡之矣此有志者所當入程朱之堂戶窺四子之闔奧而不得僅視爲帖括之資已也我夫子生而雋異長而明經言法乎先正行準乎先民去世俗之浮靡而一歸真樸卓哉大雅儒宗而造就後學尤其本志於四書講義時兢兢焉夫詠白文玩朱註此固讀四書者之準的而先儒講義毫釐千里不無微茫之辨我夫子嚴剖是非精晰離合折衷衆論而外復斷以己意其時出特解皆體驗有得之言而與朱子相發明庶乎天地人心之真四書發之四書之真朱子發之朱子之真吾夫子發之則是有四書不可無朱子有朱子而吾夫子之尋真洵經傳之羽翼紫陽之功臣也蓋我夫子殫慮苦矣研思精矣一生心血萃於理窟者垂六十餘年而始入其室而窺其奧略其貌而取其神竊願與海內文人學士共證之也學者取是書而平心味之章句則綱領中其要節旨則脈絡通其神序講則實理虛神胎而合發明則爬梳剔刮切而當原原本本瞭若指掌識其真詮而疑似不淆得其真義而影響盡去學深養邃漸以成一代真儒則是書爲之階梯豈淺鮮哉以梅之淺陋何能窺程朱於萬一自受業夫子門領其講說玩其指歸稍知書有真理理有真解因不禁切高山仰止之慕云爾於是乎書

吾彖編序

編乃先生
選政文集

魯克恭

吾鄉地介幽并古稱豪傑慷慨而隋志謂自前代以來多文雅之士盧植張華酈道元盧照鄰賈島劉蕡韓知古等類以經學詞章冠冕中原獨制義一道不知濫觴何人流及至今相率而趨於平熟淺陋嗜其所嗜而莫知正味信有如莊生所云者間有談及先輩大家輒掩耳咋舌曰吾生平未曾學是吾父兄亦未嘗以是教也何習俗移人至是余自束髮受書抗心矯首於時下靡靡鮮有當意醮筆伸紙慘淡經營柳子厚所謂不敢以矜心掉躁心嘗者竊有志焉歲己酉鄉試受知潘南城先生先生謂予可與道古招余就館舍往復指授由國初上溯天崇余素所嗜慕者盡爲啟其扃而發其鑰蓋先生之論制義也曰不從 國初五家入不能實諸所無不從西江五家入不能空諸所有斜月青鐙薰鑪茗盃先生與余譚斲輪之疾徐操刀之節簇余旣心解而神契之年來捫危履虛掉臂於孤潔幽祕一路里中一二高明者忻然有慕謁吾徒而來請浸淫灌注嚮往者日益衆驚訝反走者徐徐安之味外之味有同嗜今且曾食滿堂也日課月程并遠近同志之作得若干首覆而視之大概以西江五家爲宗而非時下靡靡之謂一縷靈光能得聖賢之真諦大則天空海闊細則繭絲麟毫極騰身汗漫之樂而未嘗蹉

過蔥嶺間露其醜郁蓋由染指於

國初五家之鼎自與世俗鹽醋迥異未知於先生所謂實諸所無空諸所有者何如而正味森森已盡洗平熟淺陋之習用是嘉諸子之雅志能嗜吾之所嗜且以誌先得其所同然者如飲水不忘其源也刻既成因以吾炙名其編云

陶魯相詩序

朱滋年

薊圃先生少含英氣綽有父風化離任昉之孤密邇涓陽之舅母勤荻畫兒警機絲當終賈之年擅土楊之技而乃方痛手澤又嗟杯棬弃孺腸摧臬魚骨立根本至性發言爲詩自寫心聲真聞天籟得母情能生文幾忘哀無過禮歟觀夫冰清衛玠玉冠潘安黃絹詞新碧紗句好北平應試受知於學使吳稷堂先生空北野之羣重南金之目于人謂俊一軍皆驚其補博士弟子員已冠冤多士矣今夫道務及時身先有用少年捧檄才子之官辭燕市之簫聲訊江城之梅信眺煙嵐於皖口雁汊橫秋紛輸穀於舒州龍山放曉甫瞻節鉞旋荷光塵望蔡易衣中郎倒屣隴水醉尉彼何人哉智鏑才鋒試可乃已於是馬蹏南北鴻爪東西楚山峨峨淮水浩浩浦奏箏笛鳴鳳凰驛問紅心城登金斗橋霜店月帽影鞭絲吟成原隰皇華唱徧曉風楊柳古

錦囊於以富焉行祕書於以繁焉有若人上天都山從而起九九蓮花拔地六六玉筍參天觸石雲興浮天海立蛟宮貝闕珊瑚木難長魚穹鼇頃刻萬狀擲筆天外異想飛來嗟乎竹馬歌喧予小子前塵安在甘棠影密先大夫手澤猶新不禁過故府而傷懷仰崇碑而隕涕焉已爾乃一行作史環滁皆山客集如雲門喧若市咄嗟而辦條理秩然時則姬調寶瑟妾織流黃春山笑多嫩月眉小立鶴則佳兒阿紹折花則嬌女平陽且也笏支拜石之庭甌汲澆花之井芳草扶屐遠峰捐人青蘿挂衣古雲流席松花吹而錦鞍卸竹露淨而茗盃香山鳥喧而翠琰飛銀荷張而銅鉢擊側理騰藻陶泓溢輝蓋已極稽古之盛遊嗣歐蘇之遺韻矣若夫二分明月六代煙華三篙桃葉之波一覺揚州之夢綠搖畫舫紅壓珠簾什贈鴛鴦杯傾鸚鵡舞裙歌扇檀板銀笙香霏杏子之衫墨染梅花之袖則又畫壁下雙鬢之拜朱絃傳三疊之聲也盛矣哉筆由天授詩雜仙心履綦雅南鼓吹騷選長袖善舞振采欲飛更上強臺蔚爲大國烏能測其所至耶臣今老矣文何以爲桐尾已焦佛頭恐汗雖壯心未已猶顧盼於新息之鞍而大敵誰當已退避乎夾漈之舍

演蹟賦

北魏陽 固

紹有周之遐軌兮初錫世於河陽建甸侯而列爵兮與王室而並昌遭季葉之紛亂兮仍矯迹於良鄉棄衛侯之楨躬兮乃植根於幽方自祖考而輝烈兮逮余躬而翳微懼堂構之頽撓兮恐崩毀其洪基心惴惴而慄慄兮若臨深而履薄登喬木而長吟兮抗幽谷而靡託何身輕而任重兮懼顛墜於峻壑憑神明之扶助兮雖幽微而獲存賴先后之醕德兮乃保護其遺孫伊日月之屢遷兮何四時之相逼知年命之有期兮概幹流之不息傷艱蹟之相承兮悲屯蹇而日臻心惻愴而不擇兮乃有懷於古人或垂綸於涓涘兮有背靡於傅巖既應繇而赴兆兮作殷周之元鑒孔栖栖而不息兮終見黜於庶邦墨馳騁而不已兮亦舉世而不容有鸞孤而爭國兮有讓位而探薇有躍馬而赴會兮有棲遲以俟時曹納辛而袁亡兮袁戮田而曹盛鮑授州而得時兮韓棄牧而失性趙堯門而誕聖兮終天隱而不繁衛泯軀於世難兮啟洪業於宣元釋臯繇之法憲兮見蓼六之先亡練疑枉於怨獄兮寤于公之獨昌明禍福之同門兮知休咎之異塗尋倚伏之無源兮或先誦而後舒賜憑軒而策駟兮撫清琴而自娛憲服敝於陋巷兮蘊六藝於蓬廬勃計行而致位兮錯謀合而身傾蕭功成而福集兮韓勳立而禍并紛回平而綿結兮亮未識其幽情有積毀而恩昵兮有積譽而寵衰或形乖而意合兮或身密而志離

情與貌而紛競兮體與識而交馳旦流言而見今疑先緣謗而益信樂食子而中疎兮巴放麇而

日進或舉世而稱賢兮偶不合於主心或居鄉而三黜兮獨爲時之所欽或負鼎而干主兮或

杖策於幽林或望旗而色阻兮或臨危而撫琴道有大而由小兮義有顯而必微理貴在於得

要兮事終成於會機每一日而三省兮亦有念而九思孰有是而可是兮孰有非而可非石育

子而啟夏兮駝遺卵而孕殷鳥藉冰而存棄兮虎乳孩以字文發昇舟而魚躍兮季潛軀而覆

雲或揮戈而爭帝兮或洗耳而辭君道曲成而不一兮神參差而異兆竝聖達之未明兮豈前

脩之克了迷白日之近遙兮方有關於天表且臨海而觀瀾兮何津源之杳杳文遷繹而身徂

兮景守節而災移湯改祝而革命兮靈投策而詬龜圍據胎而爲巨兮友發文而自相風吹鷗

而相墜兮神壓紐而平王彼羸縮之由人兮信吉凶之在已或勤憂以減齡兮亦安樂而獲祉

弟成師而害兄兮父純臣而烹子識同命於三君兮兆先見於喬姒始樓桑而發輝兮終變龍

於巴庸繞閩門而吉慶兮鬱蟬蛻於三江水浩浩而襄陵兮竊息壤而瘠之鯀殛死於羽山兮

禹宣力而營之鑿龍門以通河兮疎九江而入海總九州以攸同兮甄五都之所在雖父子之

同氣兮乃業行之不改以患蹇爲福兮痛比干之殘軀以佞諛爲獲安兮哂宰嚭之見屠以舉

士而受賞兮悼史遷之腐刑以進爲無益兮見鄂秋之專城以仁義爲桎梏兮信指讓之勞瘁以放曠爲解懸兮傷六親之乖離哀越種之被戮兮嘉范蠡之脫羈欽四皓之高尙兮歎伊周之涉危望仗鉞而先鋒兮光安車而勿顧求封賞於寸心兮夢台袞於遠慮或忌賢而獨立兮或纂君以自樹旣思匿而名揚兮亦求清而反汙見衆兆之紛錯兮覩變化之無方心營營而擾擾兮乃探衷而準常儼端坐於敝筵兮始拂龜而整策冀靈鑒之祐余兮願告余以忠益龜發兆以施靈兮利去華而守約著布列而成卦兮保龍潛而勿躍踵嘉遯之元蹤兮追考盤於巖壑登山以恬澹兮辭朝市之紛若奉貞吉於占繇兮翻夕警而晨裝捐許公於箕嶺兮諮夷齊於首陽瞻嵩華之嵒嶢兮眺恒碣之磔礧陵江湖之駭浪兮昇醫閭之尙羊乘元虬之奕奕兮鳴玉鑾之瑤瑤浮滄波而濯足兮入三山而解裳謁伯禹於塗山兮詰三苗於三危登蒼梧而遐眺兮訪二妃於有媯追祝融於荊芊兮問洛宐於馮夷陵回飈而上驤兮窮深谷而下馳泝扶水而遠矚兮見虞淵之威微乘閭風之峻岷兮覲王母於崦嵫昇瑤臺而奏歌兮坐瓊室而賦詩託赤水以寄命兮附光風以傳辭出琨珣之崢嶸兮入汜林之杳鬱採鍾山之玉瑛兮收珠澤之珂城攜羽民而遠遊兮探長生之妙術騰雲霧而窈冥兮變域中之穢質望元闕

之寂寥兮過寒門而懷悲指若士於霄際兮求霧塵於海湄憑帝臺而肆眺兮歷層冰而風馳
越弱水之滄溟兮躡不周之峻巘屑瓊蘂以爲糧兮斟玉液以爲漿結秋蘭以爲佩兮攬白蜺
以爲裳聳景雲而上征兮撫閭闔而啟扉肅百神而警策兮奏中皇於紫微聆鈞天而九變兮
耽廣樂而忘歸忽心移而志駭兮戀舊京而依依握招搖以爲旂兮巡天漢而下遊建雲旗之
逶迤兮御固風之瀏瀏策王良以斂轡兮命風伯以挾軻符屏翳以清路兮告河鼓以具舟聊
右次於析木兮遙回駕於青邱訪古人以首陽兮亦問道於鸚鳩觀三韓之累累兮見卉服之
悠悠瞻維常之鬱鬱兮貢楛矢之啾啾心怊怊而惕惕兮志憫憫而綿綿伊五嶽之埶埶兮何
四海之涓涓瞻九河其如帶兮觀三江其沈然夫五都之摠摠兮尙何足以遊盤彼八方之局
促兮殊無可以達觀方吞霞而棄粒兮亦屑玉而鍊丹漱醴泉以養氣兮吸沆瀣以當餐陰建
木之長柯兮援木禾之修莖咀玉髓而充渴兮嚼正陽以長生參松喬而撫翰兮侶倅邱而上
征嗟域中之默默兮詎攄寫其深情情盤桓而猶豫兮志狐疑而未決久放蕩而不還兮心惆
悵而不悅憶慈親於故鄉兮戀先君於邱墓回遊駕而改轅兮縱歸轡而緩御僕眷眷於短術
兮馬依依於跬步還故園而解羈兮入茅宇而返素耕東臯之沃壤兮鈞北湖之深潭養慈顏

於婦子兮競獻壽而薦甘朝樂酣於濁酒兮夕寄忻於素琴誦風雅以導志兮蘊六籍於胸襟
敦儒墨之大教兮崇逸民之遠心播仁聲於終古兮流不朽之徽音進不求於聞達兮退不營
於榮利泛若不之繫舟兮澁若不用之器不潔其身兮不屑於位不拘小節兮不求曲備資靈
運以託已兮任性命之遭隨既聽天而委化兮無形志之兩疲除紛競而靖默兮守冲寂以無
爲寄後賢以籍賞兮寤怨時之弗知辭曰稟元承命人最靈兮天壽否泰本天成兮體源究道
歸聖哲兮隨化委遇能達節兮顯親揚名德之上兮保家全身亦厚量兮趣世浮動違性命兮
鑿始究終同水鏡兮志願不合思遠遊兮陵虛聘志從所求兮周歷四極騰八表兮形勞志沮
未衷道兮反我遊駕養慈親兮躬耕練藝齊至人兮

文苑中

列傳

雜文

徐樂傳

漢班固

徐樂燕郡無終人也上書曰臣聞天下之患在於土崩不在瓦解古今一也何謂土崩秦之末世是也陳涉無千乘之尊尺土之地身非王公大人名族之後鄉曲之譽非有孔曾墨子之賢陶朱猗頓之富也然起窮巷奮棘矜偏袒大呼天下從風此其故何也由民困而主不恤下怨而上不知俗已亂而政不修此三者陳涉之所以爲資也此之謂土崩故曰天下之患在乎土崩何謂瓦解吳楚齊趙之兵是也七國謀爲大逆號皆稱萬乘之君帶甲數十萬威足以嚴其境內財足以阜其士民然不能西攘尺寸之地而身爲禽於中原者此其故何也非權輕於匹夫而兵弱於陳涉也當是之時先帝之德未衰而安土樂俗之民衆故諸侯無意外之助此之謂瓦解故曰天下之患不在瓦解由此觀之天下誠有土崩之執雖布衣窮處之士或首難而危海內陳涉是也况三晉之君或存乎天下雖未治也誠能無土崩之勢雖有疆國勁兵不得還踵而身爲禽吳楚是也况羣臣百姓能爲亂乎此二體者安危之明要賢主之所留意而深察也間者關東五穀數不登年歲未復民多窮困重之以邊境之事推數循理而觀之民宜有

不安其處者矣不安故易動易動者土崩之勢也故賢主獨觀萬化之原明於安危之機修之廟堂之上而銷未形之患也其要期使天下無土崩之勢而已矣故雖有疆國勁兵陛下遂走獸射飛鳥宏游燕之囿淫從恣之觀極馳騁之樂自若金石絲竹之聲不絕於耳帷幄之私俳優朱儒之笑不乏於前而天下無宿憂名何必夏子俗何必成康雖然臣竊以爲陛下天然之質寬仁之資而誠以天下爲務則禹湯之名不難侔而成康之俗未必不復興也此二體者立然後處尊安之實揚廣譽於當世親天下而服四夷餘恩遺德爲數世隆南面背依攝袂而揖王公此陛下之所服也臣聞圖王不成其敝足以安安則陛下何求而不得何威而不成奚征而不服哉

田疇傳

晉 陳 壽

田疇字子泰右北平無終人也好讀書善擊劍初平元年義兵起董卓遷帝於長安幽州牧劉虞歎曰賊臣作亂朝廷播蕩四海俄然莫有固志身備宗室遺老不得自同於衆今欲奉使展效臣節安得不辱命之士乎衆議咸曰田疇雖年少多稱其奇疇時年二十二矣虞乃備禮請與相見大悅之遂署爲從事具其車騎將行疇曰今道路阻絕寇虜縱橫稱官奉使爲衆所指

名願以私行期於得達而已。虞從之。疇乃歸。自選其家客與年少之勇壯慕從者二十騎俱往。虞自出祖而遣之。既取道。疇乃更上西關。出塞。傍北山直趣朔方。循閒徑去。遂至長安。致命詔拜騎都尉。疇以爲天子方蒙塵。未安。不可以荷佩榮寵。固辭不受。朝廷高其義。三府並辟。皆不就。得報馳還。未至。虞已爲公孫瓚所害。疇至。謁祭虞墓。陳發章表。哭泣而去。瓚聞之大怒。購求獲疇。謂曰。汝何自哭劉虞墓而不送章報於我也。疇答曰。漢室衰頹。人懷異心。唯劉公不失忠節。章報所言於將軍。未美。恐非所樂聞。故不進也。今將軍方舉大事。以求所欲。既滅無罪之君。又讐守義之臣。誠行此事。則燕趙之士將皆蹈東海而死耳。豈忍有從將軍者乎。瓚壯其對。釋不誅也。拘之。軍下祭其故人。莫得與通。或說瓚曰。田疇。義士。君弗能禮。而又囚之。恐失衆心。瓚乃縱遣疇。疇得北歸。率舉宗族他附從數百人。掃地而盟曰。君仇不報。吾不可以立於世。遂入徐無山中。營深險。平做地而居。躬耕以養父母。百姓歸之。數年間。至五千餘家。疇謂其父老曰。諸君不以疇不肖。遠來相就。衆成郡邑。而莫相統一。恐非久安之道。願推擇其賢長者以爲之主。皆曰。善。同僉推疇。疇曰。今來在此。非苟安而已。將圖大事。復怨雪恥。竊恐未得其志。而輕薄之徒。自相侵侮。愉快一時。無深計遠慮。疇有愚計。願與諸君共施之。可乎。皆曰。可。疇乃爲約束。

相殺傷犯盜爭訟之法法重者至死其次抵罪二十餘條又制爲婚姻嫁娶之禮興舉學校講授之業班行其衆衆皆使之至道不捨遺北邊翕然服其威信烏丸鮮卑並各遣譯使致貢遺疇悉撫納令不爲寇袁紹數遣使招命又即授將軍印因安輯所統疇皆拒不納紹死其子尙又辟焉疇終不行疇常忿烏丸昔多賊殺其郡冠蓋有欲討之意而力未能建安十二年太祖北征烏丸未至先遣使辟疇又命田預喻指疇戒其門下趣治嚴門人謂曰昔袁公慕君禮命五至君義不屈今曹公使一來而君若恐弗及者何也疇笑而應之曰此非君所識也遂隨使者到軍署司空戶曹掾引見諮議明日出令曰田子泰非吾所宜吏者即舉茂才拜爲舊令不之官隨軍次無終時方夏水雨而濱海洿下溝滯不通虜亦遮守蹊要軍不得進太祖患之以問疇疇曰此道秋夏每常有水淺不通車馬深不載舟船爲難久矣舊北平郡治在平岡道出盧龍達於柳城自建武以來陷壞斷絕垂二百載而尙有微徑可從今虜將以大軍當由無終不得進而退懈弛無備若嘿回軍從盧龍口越白檀之險出空虛之地路近而便掩其不備蹋頓之首可不戰而禽也太祖曰善乃引軍還而署大木表於水側路傍曰方今暑夏道路不通且俟秋冬乃復進軍虜候騎見之誠以爲大軍去也太祖令疇將其衆爲鄉導上徐無山出盧

龍歷平岡登白狼堆去柳城二百餘里虜乃驚覺單於身自臨陣太祖與交戰遂大斬獲追奔逐北至柳城軍還入塞倫功行封封疇亭侯邑五百戶疇自以始爲君難率衆遁逃志義不立反以爲利非本意也固讓太祖知其素心許而不奪遼東斬送袁尙首令三軍敢有哭之者斬疇以嘗爲尙所辟乃往弔祭太祖亦不問疇盡將其家屬及宗人三百餘家居鄴太祖賜疇車馬穀帛皆散之宗族知舊從征荊州還太祖追念疇功殊美恨前聽疇之讓曰是成一人之志而虧王法大制也於是乃復以前爵封疇疇上疏陳誠以死自誓太祖不聽欲引拜之至於敷四終不受有司劾疇狷介違道苟立小節宜免官加刑太祖重其事依違者久之乃下世子及大臣博議世子以疇同於子文辭祿申胥逃賞宜勿奪以優其節尙書令苟彘司隸校尉鍾繇亦以爲可聽太祖猶欲侯之疇素與夏侯惇善太祖語惇曰且往以情喻之自從君所言無告吾意也惇就疇宿如太祖所戒疇揣知其指不復發言惇臨去乃拊疇背曰田君主意殷勤曾不能顧乎疇答曰是何言之過也疇負義逃竄之人耳蒙恩全活爲幸多矣豈可賣盧龍之塞以易賞祿哉縱國私疇疇獨不愧於心乎將軍雅知疇者猶復如此若必不得已請願效死勿首於前言未卒涕泣橫流惇具答太祖太祖喟然知不可屈乃拜爲議郎年四十六卒子又早

死文帝踐阼高疇德義賜疇從孫續爵關內侯以奉其嗣

程普傳

晉 陳 壽

程普字德謀右北平土垠人也初爲州郡吏有容貌計略善於應對從孫堅征伐討黃巾於宛鄧破董卓於陽人攻城野戰身被創夷堅薨復隨孫策在淮南從攻廬江拔之還俱東渡策到橫江當利破張英於麋等轉下秣陵湖熟句容曲阿普皆有功增兵二千騎五十四進破烏程石木波門陵傳餘杭普功爲多策入會稽以普爲吳郡都尉治錢唐後徙丹陽都尉居石城復討宣城涇安吳陵陽春穀諸賊皆破之策嘗攻祖郎大爲所圍普與一騎共蔽扞策驅馬疾呼以矛突賊披策因隨出後拜盪寇中郎將領零陵太守從討劉勳於尋陽進攻黃祖於沙羨還鎮石城策薨與張昭等共輔孫權遂周旋三郡平討不服又從征江夏還過豫章別討樂安樂安平定代太史慈備海普與周瑜爲左右督破曹公於烏林又進攻南郡走曹仁拜裨將軍領江夏太守治沙羨食四縣先出諸將普最年長時人皆呼程公性好施與喜士大夫周瑜卒代領南郡太守權分荊州與劉備普復還領江夏遷盪寇將軍卒權稱尊號追論普功封子咨爲亭侯

陽固傳

北齊魏 收

陽固字敬安性倜儻不拘小節少任俠好劍客弗事生產年二十六始折節好學遂博覽篇籍有文才太和中從大將軍宋王劉昶征義陽板府法曹行參軍假陵江將軍昶嚴暴治軍甚急三軍戰慄無敢言者固啟諫并面陳事宜昶大怒欲斬之使監掌攻道固在軍勇決志意閑雅了無懼色昶甚奇之軍還言之高祖年三十餘始辟大將軍府參軍事署城局仍從昶鎮彭城板兼長史俄以憂去任裴叔業以淮南內附世宗詔平南將軍廣陵侯元衍與司徒彭城王勰同鎮壽春勰固爲衍司馬還除太尉西閣祭酒兼廷尉評上改定律令議除給事中出爲試守平北太守甚有惠政久之以公事免後除給事中領侍御史轉治書劾奏廣平王懷汝南王悅南陽長公主及使懷荒鎮將萬貳望風逃走劾恒農太守裴粲免官時世宗廣訪得失固上讜言表曰臣聞爲始不在多方在於力行而已當今之務宜早正東儲立師傅以保護立官司以防衛以係蒼生之心攬權衡親宗室疆幹弱枝以立萬世之計舉賢良黜不肖使野無遺才朝無素餐孜孜萬幾躬勤庶務使民無謗讟之響省徭役薄賦歛脩學宮遵舊章貴農桑賤工賈絕談虛窮微之論簡桑門無用之費以存元元之民以救飢寒之苦上合昊天之心下悅億兆

之望然後備器械脩甲兵習水戰滅吳會撰封禪之禮襲軒唐之軌同彼七十二君之徽號協定鼎嵩河之心副高祖殷勤之寄上與三皇比隆下與五帝齊美豈不茂哉臣位卑識昧言不及義屬聖明廣訪敢獻謇言伏願陛下留神少垂究察初世宗委任羣下不甚親覽好桑門之法尙書令高肇以外戚權寵專決朝事又咸陽王禧等並有釁故宗室大臣相見疎薄而王畿民庶勞敝益甚固乃作南北二都賦稱恒代田漁聲樂侈靡之事節以中京禮儀之式因以諷諫辭多不載世宗末中尉王顯起宅既成集寮屬饗宴酒酣問固曰此宅何如固對曰晏嬰湫隘流稱于今豐屋生災著於周易此蓋同傳舍耳唯有德能卒願公勉之顯嘿然他日又謂固曰吾作太府卿庫藏克實卿以爲何如固對曰公收百官之祿四分之一州郡賦贖悉入京藏以此克府未足爲多且有聚斂之臣竊有盜臣豈不戒哉顯大不悅以此銜固又有人問固於顯顯因奏固剩請米麥免圍官肅宗即位除尙書考功郎奏諸秀孝中第者聽叙自固始大軍征碣石勅爲僕射李平行臺七兵郎中平奇固勇敢軍中大事悉與謀之又命固節度水軍固設奇計先期乘賊獲其外城軍罷太傅清河王懌舉固除步兵校尉領汝南王悅郎中令尋加竊遠將軍時悅年少行多不法層近小人固上疏切諫并面陳往代諸王賢愚之分以感動悅

悅甚敬憚之。憚大悅，以爲舉得其人。熙平二年，除洛陽令。將軍如故在縣，甚有威風。丁母憂，號慕毀病，杖而能起。練禫之後，猶酒肉不進。時固年踰五十而喪，過於哀鄉黨親族咸歎服焉。神龜末，清河王懌領大尉，辟固從事中郎。屬懌被害，元乂秉政，朝野震悚，懌諸子及門生吏寮莫不慮禍隱避不出。素爲懌所厚者，彌不自安。固以嘗彼辟命，遂獨詣喪所，盡哀慟哭。良久乃還。僕射游肇聞而歎曰：「雖纒布王脩何以尙也？」君子哉！若人及汝南王悅爲太尉，選舉多非其人。又輕肆撻撻，固以前爲元卿，雖離國猶上疏切諫。事在悅傳。悅辟固爲從事中郎，不就。正光二年，京兆王繼爲司徒，高選官寮，辟固從事中郎，加鎮遠將軍、府解除前軍將軍。鎮遠如故。又典科揚州勳賞，初硤石之役，固有先登之功，而朝賞未及。至是與尙書令李崇訟勳，更表崇雖貴盛，固據理不撓。談者稱焉。四年九月卒。時年五十七。贈輔國將軍、太常少卿。諡曰文固。剛直雅正，不畏彊禦，居官清潔，家無餘財。終歿之日，室徒四壁，無以供喪。親故爲具棺斂焉。初，固著緒制一篇，務從儉約。臨終，又勅諸子：「一遵先制，固有子三子長休之。武定末，黃門郎休之弟詮之、字子衡，少著才名，辟司徒行參軍，早爲門生所害。時人悼惜之。」

榮毗傳 附榮建緒

唐 魏 徵

榮毗字子謨北平無終人也父權魏兵部尙書毗少剛鯁有局量涉獵羣言仕周釋褐漢王記室轉內史下士開皇中累遷殿內監時以華陰多盜賊妙選長吏楊素薦毗爲華州長史世號爲能素之田宅多在華陰左右放縱毗以法繩之無所寬貸毗因朝集素謂之曰素之舉卿適以自罰也毗答曰奉法一心者但恐累公所舉素笑曰前者戲耳卿之奉法素之望也時晉王在揚州每令人密覘京師消息遣張衡於路次往往置馬坊以畜牧爲辭實給私人也州縣莫敢違毗獨遏絕其事上聞而嘉之賚絹百匹轉蒲州司馬漢王諒之反也河東豪傑以城應諒刺史丘和覺遁歸關中長史渤海高義明謂毗曰河東要害國之東門若失之則爲難不細城中雖復煩惱非悉反也但收桀黠者十餘人斬之自當立定耳毗然之義明馳馬追和將與協計至城西門爲反者所殺毗亦被執及諒平拜治書侍御史帝謂之曰今日之舉馬坊之事也無改汝心帝亦敬之毗在朝侃然正色爲百寮所憚後以母憂去職歲餘起令視事尋卒官贈鴻臚少卿毗兄建緒性甚亮直兼有學業仕周爲載師下大夫儀同三司及平齊之始留鎮鄴城因著齊紀三十卷建緒與高祖有舊及爲丞相加位開府拜息州刺史將之官時高祖陰有禪代之計因謂建緒曰且躊躇當共取富貴建緒自以周之大夫因義形於色曰明公此旨非

僕所聞高祖不悅建緒遂行開皇初來朝上謂之曰卿亦悔不建緒稽首曰臣位非徐廣情類楊彪上笑曰朕雖不解書語亦知卿此言不遜也歷始洪二州刺史俱有能名

盧庸傳

元脫脫

盧庸字子靈薊州豐潤人大定二十八年進士調唐州軍事判官再調定平縣令庸治舊堰引涇水溉田民賴其利補尙書省令史除南京轉運副使改中都戶籍判官察廉遷禮部主事累官鳳翔治中大安三年徵陝西屯田軍衛中都以庸簽三司事主兵食至潞州放還屯田軍庸改乾州刺史入爲吏部郎中至寧元年改陝西按察副使夏人犯邊庸繕治平涼城池積芻粟團結土兵爲備十一月夏人掠鎮戎陷涇邠遂圍平涼庸矢盡募人取夏兵射城上箭以濟急用出府庫賞有功者人樂爲死平涼賴以完貞祐二年庸移書陝西行省僕散端大槩謂慶陽平涼德順陝西重地長安以西邠爲阨塞當重兵屯守詔賞平涼功庸進官四階遷按察轉運使三年詔諸道按察司講究防秋庸陳便宜曰自鄜延至積石雖多溝坂無長河大山爲之屏蔽恃弓箭手以禦侮其人皆剛猛善鬪熟於地利夏人畏之向者徙屯他所夏人即時犯邊此近年深忠也人情樂土且耕且戰緩急將自奮又曰防秋之際宜先清野又曰掌軍之官不宜

臨時易代兵家所忌將非其人屢代何益無何有言庸老不勝任者卽罷之未幾改定海軍節度使山東亂不能赴按察司劾之當奪兩官審理官直之庸以病請求醫藥致仕興定三年卒

韓刺史傳

曹鼎望

韓刺史諱祥字五雲邑之五圖人補博士弟子員明崇禎丙子登鄉薦庚辰捷南宮懷宗召進士魏藻德等四十人於文華殿問平寇雪恥之策祥對曰寇衆者民饑故也欲平盜必先撫民寇不平者兵弱故也欲平寇必先養兵撫民莫如輕徭薄賦養兵莫如增餉簡將如此則寇可平恥可雪矣上嘉納之除曹州刺史值歲饑多方賑濟民免流亡賊首號小袁者寇山東勢甚猖公詣賊營宣布朝廷恩德賊感泣率衆降撫按嘉之薦於朝將大用會

大兵圍其城力竭遂以死殉嗟乎士大夫奉命守土城亡與亡理也職也然有一死而名垂青史者亦有一死而泯沒無傳者刺史死節於明恤典不及余故筆之以表忠云

李莒州傳

曹鼎望

或問曹子曰李州判也何吾子以莒州予之也曰判攝州而死於州予之以州何不可之有唐張巡真源令耳睢陽被圍許遠告急於真源巡起兵入睢陽許以太守讓之守城力竭死至今

稱張睢陽不聞稱張真源予判以州亦猶定矣又問李之守莒何時死莒何狀願聞其詳曹子曰居吾語汝李諱昌濳字於瀾邑巨族也博學明大義明崇禎壬午冬以拔貢授莒州判十二月二日抵任先是

大兵入邊牧馬至山東將及莒州縣牧謀解餉避他所委李攝州篆視其城上惟老弱存乃入而語其妻若子曰民可逃官不可逃民可不死官不可不死我志決矣夫人何氏曰君能忠妾豈不能節其子爾璣曰臣盡忠子盡孝兒其何說之辭迨二十六日忽傳

大兵至李衣冠坐堂上露刃置印旁侍側者子與僕郭登雲而已數騎至州門斧而入登雲射之斃二人獨力拒門兵愈衆攻愈急李知不能支遂自刎登雲死門下碎其屍何夫人自經爾璣死於堂側衙以內無一存者何其烈哉考唐書贈張巡爲揚州大都督贈許遠爲荊州大都督立雙忠廟以祀之而以南霽雲雷萬春配焉李之死不亞於張許登雲更慘於霽雲余是以重其人悲其遇而以莒州予之紀實也癸未春凶問達豐潤其長子光斗徒步走莒州尋得其父母與弟屍具車輛扶柩歸而葬於祖塋若光斗者亦可謂能子矣或聞之色然駭歎息而退余乃記其答問之辭而爲之傳

谷大中丞傳

曹鼎望

余自成童時聞邑中父老稱述中丞不置口心竊慕之後從家乘中讀其遵旨陳時弊一疏其義正其言切忠君愛國不避忌諱然後歎先輩典型非近今所可企及也中丞姓谷氏諱嶠字惟升號聚庵早補邑庠爲文力追秦漢嘉靖辛卯舉於鄉戊戌成進士尹江都仁聞播遐邇擢御史直聲震當宁疏寢廟祧計殲倭賊而直陳時弊一疏尤其彰明詳切者矣且也正以持已不拜貴幸之祠嚴以律躬不受時宰之餽其剛毅之性類如此上念三楚重地特簡巡撫鄖陽以封御史春秋高辭爵歸養再疏而後得請六十而慕又於中丞見之矣萬歷改元詔求耆舊廷臣交章薦之中丞曰吾老矣彼二疏何如人哉終不起緣野怡情青燈教子厥後科第綿綿久而愈茂則皆中丞積累之遺矣

劉振世傳

吳慎

劉振世字左軒邑之坊市里人萬歷戊午舉人性穎異博學能文生平以大節自矢丁父艱結茆墓側三年不干外事知縣相大成旌爲孝廉真品七上公車不第教諭歛庠復補新河所至崇文教厲士節嘗勗人以忠孝之事且曰讀書須躬行實踐乃得究竟美言欺人德之賊耳崇

禧十一年陞鄧州刺史時流寇縱橫土賊竊發鄧當張猷忠破後地方殘缺歲且浚饑良善通
亡靡有子遺振世甫受事招徠流離之衆歸者如市鄰郡之民亦相觀感爲設歸仁里以處之
力請貸口糧牛種人心稍固十四年十一月李自成羅汝才既陷南陽舞陽旋及鄧州孤城援
絕賊勢猖披振世度不支乃設伏於巷率老弱城上爲誘敵計而賊營礮發風火而至城陷被
執迫降不從脅至新野密檄鄧人討賊事洩遂以身殉吏目李國璽千戶余承蔭李錫諸生丁
一統張五美王鍾王子章海寬傅彥皆抗節死按明史振世與舞陽知縣潘宏合傳方賊陷舞
陽時潘宏諭士民共守諸生慮屠城至開門縛宏以獻宏怒罵乃支解之何鄧州之獨異於舞
陽歟僚屬殉義惟恐不及諸生授命懷慄如生向非振世固不克有丁一統諸人也哉簡夫氏
曰州縣爲守士臣僚屬其手足也諸生其腹心也平日無血脉之關通臨難而欲手足之我從
腹心之不潰不可得也有張巡後有南霽雲雷萬春有田橫後有五百人吾故於李國璽余承
蔭諸人之死愈信振世之能率屬訓士也嗚呼賢矣

趙登高傳

吳慎

昔歐公修五代史不爲韓通立傳蘇子瞻譏之然公亦不因其言而復作蓋爲尊者諱寧于清

議而不辭也予讀豐邑職官志得趙登高事竊有異焉邑於天下實彈丸百官中令亦未秩耳
 然刑辟生殺實主之苟有挾囚以判者所關綦重則趙登高誠不可以等之恃勇輕生者而不
 傳矣登高盛京人里居及出身無考生而膂力過人順治二年任時草昧初啟城郭不完盜賊
 充斥登高擒數人置之獄其黨乘夜劫以出時漏下數刻矣登高聞變攬衣遽起赴其妻恐吏
 卒之未集也止之不聽至則力鬪而死賊與囚俱逸其姪與堦塋之東郭北原事聞不實將疑
 小民之賊登高也欲加豐人以罪有韓斗耀者率衆訴於上事雖白而贈恤亦不至予蒞豐之
 明年搜逸事以輯志得其概乃往拜墓下荒塚一邱率爲羊牛所踐履石碣僅記姓名嗚呼失
 囚不過鐫秩甚者落職已耳登高乃以身殉使其專制一方政由已出夫豈肯如明季守土諸
 臣一聞賊風遂攜其妻子財物棄城以遁哉矧乙酉丙戌間東南尙未盡奉順崛起一隅者往
 往有之登高獨不肯輕逸一囚是真以一城視一囚一邑繫一令其時治蹟必有可記者惜故
 老之無存而舊牘之盡湮也可勝嘆哉抑當日事起倉猝時有驛丞某者聞難赴義與賊戰於
 南關之東獄廟復爲賊所害斷其顛骨以去並軀脰亦不歸泉壤焉悲夫令與丞等死也或僅
 以姓名傳或抔土之不存則登高固不幸之幸如彼驛吏者空令人追溯焉而漣然出涕也

殷壯猷傳

吳慎

殷壯猷字鳴方邑之咸寧里人順治三年武進士第三人掣選三屯營參將改調臨藍營十一年張獻忠遺寇孫可望犯臨藍汛壯猷先期築城池繕甲兵爲守禦計逆黨侵界屢遭敗衄可望怒全力來攻圍困一月有餘勢不能支夫人李氏出簪珥衣飾犒軍皆振臂呼籲共死壯猷介冑坐堂上二子左右侍乃呼衆諭之曰若輩願共死死於寢非男子能從我戰乎則曰諾長子文曰援兵將至曷俟之壯猷曰嘻爾何知見危授命臣子大節濟則君之靈不濟知有死而已吾能俯首就縛哉乃率衆踴躍開關冒圍殊死戰力屈歿於陣夫人聞變急掣劍揮二子出二子俯泣不知所爲夫人厲聲曰痴兒後殷氏不血食矣次子質變色作夫人擲印與之疾趨去震礮雷轟矢石填門不可出復經故處則母與兄皆伏劍矣乳媪曰後園可匿也遂蒼皇奔深草中伏三日得免賊平

世祖章皇帝嘉壯猷忠賜勅書晉秩蔭拖沙喇哈番二世乾隆十年

今上旌李氏節祠節孝按壯猷產大興占籍豐潤舊志不載而大興又以爲豐人置之故畿輔通志皆不之及茲特博採故老之傳聞并核其家乘詳誌之以備他日國史之掌故云簡夫氏曰

人當患難死生之際輒選懦不能自主壯猷一介武夫據孤城當強寇而視死如歸豈不赫然
烈丈夫哉李氏從容就義而教子數言卒全殷氏之脉固女中之程嬰公孫杵臼也並祀廟堂
宜矣

李昌汴傳

吳慎

李昌汴字于遴號泰仲先世浙江餘姚金沙井人遠祖伯榮永樂初徙居北邊以軍功陞總旗
隸富峪衛後改興州前衛遂家於豐伯榮生順順生鑑鑑生仁仁生陵縣令時春時春生子六
其仲爲昌汴父馨先馨先生子六昌汴亦其仲也少而英特勁直不受人侮亦不以一毫侮人
其骯髒倣倜自爲兒時已度越儕輩甫髫年刻志下帷始入類行業文章每足楷模士林以恩
貢入成均初任三秦司理數平反疑獄後因捧表便道歸省值父病垂危乃告養朝夕左右湯
藥親嘗家居久之恭逢

大清定鼎詔求賢能宿望之吏監司交薦拔爲文安令時草昧初闢雀苻載道昌汴蒞任首嚴保
甲躬親捕緝獲大盜王小二等其黨悉潰境內廓清績列上而馨先訃至回籍治喪服闋復授
山西興縣令以廉介自持興爲山邑地磽而貧不以自奉累民日用率蔬素且勤宣德惠賦額

外凡火耗羨餘悉祭之興民相與扶携輸廩者如赴市邑有積豪趨起元挾制武斷昌汴政治不阿竟案以法頑梗讐服尤加意學校士之貧有志者爲設館穀置文會第其甲乙以振作之是科秋闈捷者四人文風爲之不變士民祝召杜歌薪樵聲績益茂無何而雲中難作賊鋒徧州縣姜寇遣其黨索篆昌汴抗節不屈罵賊以死事平

朝廷嘉其忠

勅馳驛歸葬加祭一壇贈按察使司僉事廕一子李爾瑗光祿寺署典簿先是昌澆殉前明難邑人曹鼎望爲之立傳昌澆者昌汴兄也一門兩節二難濟美而昌汴獨泯焉愚懼爲善者之久而或淹也爲序其大略如此云贊曰大節云姜砥柱者誰握拳透爪報國雙奇不忝同氣兄弟怡怡古而無死永介維祺

曹繼叅傳

吳慎

曹繼叅字仲相邑之咸寧里人系出宋武惠王明永樂中遠祖伯亮由豫章北遷始著籍焉父士直生子二長爲繼祖次即繼叅繼叅沈毅有大略爲諸生人咸期以大用卒不第以明經通判太原分署代州代固邊遠重地繼叅肆應咸宜上下皆倚重焉會姜鑲以雲中叛舊弁劉遷

將應之繼叅心知之而未發也而城中多遷黨警息狎聞人心洶洶適鑲偽牒至繼叅即斬其使並擒內應者戮城上衆心稍帖無何賊至立衝車薄城守陴者皆驚繼叅按劍止之呼次子雲望率健兒陳良等發三矢殪三人賊却走是時風聲恫疑奸宄煽惑全晉無完城而代歸然獨存繼叅之力也固守月餘援兵未集復遣雲望突圍乞師

敬謹親王統大兵至生擒偽帥及偽尙書總兵等圍始解賜官服鞍馬加僉事銜命轉餉寧武關藏火藥糧車中伏機輓車者見賊佯遁賊掠糧火發焚殺甚衆其出奇制勝類如此以功擢守袁州時袁當變後城中民僅十七戶勞來安集未期年四境雞犬相聞已而大兵進勦湖南雲集境上值歲旱困於征輸糧糗無出爲民求寬賦不得以憂鬱病卒子二首望雲望

首望字統六生而穎異倜儻不羣讀書明大義不事章句補博士弟子員以恩拔入成均考授中書舍人轉戶部主事差權蕪關廉謹自持康熙丙午以本部員外典試廣西榜發士論翕然尋陞禮部儀制司值廷臣有以改民間婦女粧請者

上下其議首望請當事奏寢之再擢工部通惠河有奇績以戶部郎中出守蘇州蘇賦役煩重當天下之半蒞任未期月賦清役簡若無所事致仕歸足不窺戶延師課子寒燠不輟子三長蚤

世次錕國子學正次鈐

沉重好學頗有父風

雲望字沛霖資稟奇敏讀書目下十行喜孫吳兵法弱冠從父任代州遭姜逆之變參贊方略請兵靖亂事在袁州太守傳中雲望博通古今善謀大事輕財任俠能得人死力雖神情間雅若書生而險阻當前出奇制勝故能輔成剿賊之功焉隨任袁州會父卒部署交替井井有條迨歸廬於墓側飲食寢處三年如一日師事朱清豐執經問業寒暑不輟清豐有二子相繼亡身老家貧雲望爲之買妾生一子至今存焉兄首望性甚峻事之唯謹以明經射策授州司馬未任歿有子五俱能無改父行云

錚字聲山由貢任沙河教諭修理學宮課士有方陞貴省甕安知縣地屬民苗接壤錚布德宣威皆帖然相安湖廣歉收民多就食川蜀路由甕安錚留養調恤之丁憂旋里甘淡薄濟窮乏邑侯吳修隄輸工五百名邑歛收民饑捐穀四十石

覃恩勅贈文林郎妻殷氏誥贈孺人乾隆八年大名道沈接

駕假館知夫婦八旬齊眉兒孫五代繞膝賜匾曰五世福門壽八十九終

曹鼎望傳

吳慎

曹鼎望字冠五號澹齋曹繼參之姪也父繼祖官別駕封中憲大夫舉七子鼎望其一也生而岐嶷天性孝友事祖父如事封大夫弱冠補邑博士弟子員甲午舉於鄉己亥成進士授翰林院庶吉士

世祖章皇帝以時召對

恩遇優沃既而改授秋曹請停嚴冬遣犯豁逃人連坐之寃決疑獄甚多曹中稱其能丙午典試三楚所拔多孤寒士明年出守新安協計勦婺源山賊平之辛亥大旱賑粥活饑民甚衆捐資刻朱子綱目新安文獻志等書日召諸生講學于紫陽書院嗣以不能事當路奪職家居旋起爲廣信守乃整頓殘破招復流亡請兵籌餉賊寇江機楊一豹等復乞蠲七年逋賦以憂歸復起爲鳳翔守開墾蕪地寬減科條請停防漢更番兵馬修橫渠祠喜雨亭以風勵後學郡中稱治丙寅以老乞休邑令羅景泐囑修邑乘採輯多所考核爲一縣信史卒年七十有六鼎望精究理學有濟世才未竟其用人咸惜之同母弟三人皆先卒爲幼弟謀婚娶撫教諸姪皆成立戚黨藉以舉火者甚衆與朋友交不設城府寬厚和平所謂有道君子者非歟仲弟民望以

恩貢授鴻臚寺鳴贊季斗望壬子拔貢善詩古文授正紅旂教習四人望邑庠生入成均考定州司馬因二親垂白決志不仕云子三人長釗次鈞歷仕有聲季鎰俱以克家名

曹嵩菴傳

唐壽鵬

予與曹子嵩菴交最久而相知獨深康熙壬辰秋將之大名學博任嵩菴謂予曰君與我俱五十古人所謂聞道之年也行矣勉之予瞿然其言既別思之不置後十年人傳嵩菴死矣予爲位哭之至失聲猶記庚午辛未間嵩菴始出與天下士接一時名流如何吧瞻李剛主龔孝水咸與周旋而獨于予爲性命交乃歲月幾何而何李死龔死嵩菴又死曹子桓追思曩游宛然在目歐陽子以哲人不常在爲可惜可勝歎哉嵩菴幼隨父任姑蘇讀書之外惟耽默坐間出其撰述老師皆歎不及父卒歸里屏弃語言文字冥心四子書思路斷絕則取先儒語錄証之其治經參用漢疏每多心得嘗作箴銘自警處暗室未嘗起一妄念嘗語予曰君文筆殊妙但日事此恐荒却聖賢緊要關頭也今已矣誰與予索癩針瘡者乎追思疇昔惘惘若失而遲久不爲之傳恐負良友于幽冥中也先是太守暨董太夫人各窆窆嵩菴力任合葬之事姻親劉某官湖廣卒嵩菴助金歸其柩焦青藜蒙師也有田數頃售他姓酬其值而還之人咸高嵩菴

之義而予之重嗇菴固在彼不在此也子源洙字景尼幼擅神童之譽迨弱冠酷嗜詩書性豁達有材幹鎖中丞奉使遼陽邂逅席談歎曰子經濟才行當列薦牘與天下共見之源洙以親老固辭免其事嗇菴也病侍寢門五月不出泊沒齋素三年居家慷慨好義邑令方公罷職假館謀課終年不倦張公虧倉穀三千石竭力籌畫補之京師蘇都統先世曾贈以撥補雄縣地若干頃雄民抗不輸租立券與之不受其值再如李姓未娶則贈以婢章姓已故則恤其姑其隱德尤難枚舉也人皆以爲嗇菴不死云嗇菴諱鈐字孝符貢生候選訓導未任卒

谷觀察傳

鉛山人 蔣士銓

公諱確字鷺侯豐潤人祖秉謙由舉人歷清平中牟令多異政父鵬以武科官徽州參將累著戎績公早慧未冠通經史能決疑難事尋以明經貢太學出任浙江杭州府海防同知先是海塘有數十里屢築屢潰咸謂有巨竈出沒齧隄爲民害公設祭投檄即夕於大風雨中銜尾去觀者神之繼攝德清令浙撫李衛深器之適以父喪去職邑人作清溪錄紀其政會西師大舉軍務需才李公特疏薦公幹練可用

世廟召見授宣化府保安同知公叩請終制

上曰君親一也汝其往公感泣即日去既抵任躬督糧馬赴軍營往來程期無誤課功擢口北道久之爲蜚語所中經都統補熙等勘問無他覆奏

今上素知公名改官雲南分駐開化郡郡則水土險惡番苗雜處頑獷難治公因革利導孩養馴習漸成上理安南犯邊大學士慶往討委公督餉安南怖求納款當遣官受降或慮夷情險譎相顧錯愕不能決公毅然曰食祿捐軀人臣分內事夷既讐伏則片言可止戈奚懦耶遂請行從一騎緩轡至安南營中數其罪責以大義揚天子仁威宣朝廷政令示以順逆禍福反覆開導夷垂泣羅拜誓不再悖因率其魁來乞能兵於是我帥解嚴而邊陲以定既而擢普洱知府府鄰緬夷先是土司刁某以悖逆伏誅別支承襲其孽子刁溫刁先給總兵崔某爲奴崔嬖溺之既而二孽乞歸掃墓因竄於老撾糾合舊黨數萬人作亂崔致討不利落職適公莅任憲檄領兵往勦公不爲動陰召土酋曹當齋刁輔國輩使禽溫先以自効越日果縛二俘至餘賊駭顧曰是單騎入安南營者耶各鳥獸散公以功歸崔官乃復滇人稱公長者辛未春公奉委巡邊染瘴卒於道死王事也

汾州太守魏公傳

薛宁廷

魏公元樞字聯輝號耀菴遠祖日來興在明洪武時有軍功以千戶世襲家江南邳州分防塞外小興州後遷興州前屯衛於豐潤遂家焉傳世至 國初失職始以儒顯有為即墨主簿者曰世道世道生諸生端端生諸生廷基工行草與隱士袁志學友善自號冷灰道人是為公之曾祖祖鏃增廣生父濱諸生名行具載邑志母劉氏生兄弟五人公最少早委身於學而家塾少墳典適書賈寄卷軸數千因得縱覽大義其視鄉里同輩鮮當其意以為不足師友獨扃戶誦讀達旦探古人奧蹟久之若然開解下筆汨汨其來時方樸山先生宰豐潤奇其文拔冠童子軍充博士弟子又數年食餼假館授徒以養父母泊乎喪葬盡禮均有聞於鄉人先是奉父母命兄弟析居父歿將已所分產盡讓諸兄而以舌耕為業其四兄早逝迎養嫠嫂終其身子女婚嫁悉賴焉其未第時內行已卓卓如此雍正元年春秋兩試皆捷遂成進士五年選河南靈寶縣令莅任月餘因公罣誤去官 特旨送部引 見以主事用明年補兵部武選司主事調刑部貴州司員外公感特達之 知勵精奉職折獄多所平反

上聞而嘉之 賜珍果茶藥同官皆不得預十一年遷江蘇司郎中會爭一獄不能即乞假歸里上聞而驛召限日行六百里至即入對 獎諭以血心辦事不肯隨人俯仰使復其任而堂上官

竟至降謫蓋

世廟之明日達聰幽遐畢燭而公執法不阿誠足以動天鑒也乾隆三年授甯武府知府府固

甯武關舊址至卽請創府學起鶴鳴書院延帥訓士風氣立變又請祠祀明死事總兵官周忠

武公諱遇吉以勸忠義纂府志八年始脫稿當是時吏治尙廉能苟無過知府未有三歲不遷

者遲則六年斷未有任九年者公悃悞無華不善唯阿往往以是忤上官意外示優容而內實

疎遠十一年適大同府屬之山陰應州渾源飢甚道府以是去職公忽得檄署雁平道篆並攝

同關同知印務而實委以三邑飢民也賓僚曰不可往蓋以吾屬亦有賑辭公曰不可事有緩

急救飢如救焚何可辭也遂慨然以賑務爲己任馳驛前往雨雪載途疏食飲水州縣供役皆

屏去與災黎朝夕相見所至民慶更生同時蒲州屬之廣靈安邑萬泉飢民復聚衆脅其長吏

起大獄大府以兵往勦並檄公同往遇諸途曰此飢民也非畔也何張皇爲如以兵往知府不

諳軍旅甯以規避罷官斷不敢將順殺人若不以知府爲不肖請單車往勘三日報命有事知

府一人當之大府曰老先生何以知其非畔公曰監獄猶完倉庫未動是以知之大府怡然曰

先生之言是也彼處事宜敬以奉煩某專候好音公遂盡屏大府所與防衛攜二僕馳往至則

衆情洶洶誠不可測先出示曉諭動以禍福莫不感泣首事者遂自縛請罪曰飢亦死罪亦死
今有官知我民飢願就死無悔公遂矯命聚飢民於城中先開倉人給斗穀爲十日撫恤四門
註冊出則縱之入則禁之而飢民萬人得穀不兩日皆散歸鄉井矣急以首事者馳報大府且
白擅輒開倉之意大府悅勦議遂寢 奏請撫恤一月賑濟兩月公以二麥尙早請再展賑兩
月皆得

旨准行是役也微公往其不至釀成大獄者幾希矣明年調汾州積案數百月餘皆爲審結仍修
西河書院祀先賢卜子振興文教懋遷遂未之俗蒸然不變至今科第不絕又明年年六十有
三慨然曰吾歷任中外二十年幸無大過今老矣宜早退上官諄留且曰即以河東觀察待君
奈何去公曰知府告退非邀榮也求去益力不得已 奏准以原官致仕囊無晉物行李一老
書生耳瀕行時遠近士民攀送街衢擁塞宿於郊徧加慰勞各取一果後車幾滿數日方得行
旋里後舊有讀書小齋曰尺蠖葺而居之破牀敝几日坐擁書課子不問外事自訂生平著述
十五種名曰與我周旋集蓋其介持本於天性形諸吟詠無矯飾焉顧薄於己而厚於物出俸
餘置義倉以贍宗族婚喪皆取給其中仿范文正公義田遺法刊碑瑩域刻所授 誥封二代

四品之文以榮其先又自爲墓表以叙其生平出處之義卒於乾隆二十三年戊寅二月十三日得年七十有三迹其幼學壯行晚而致仕優游林下復抵十年進退衷諸禮義君子韙之妻王氏繼以張氏劉氏子四禮焜禮焜禮焜焜禮焜焜張出餘俱劉出禮焜乾隆庚寅科舉人簡發山東以知縣題補署利津樂陵皆有善政

曹節婦傳

陳瑚

曹氏豐潤安丘少尹士直之女也幼沉靜有才智適文學董陞徵嫻於禮法內外稱之生二子曰瑄曰瑾崇禎壬午冬

大清兵入關董族大且饒陞徵從其族盡室南走行次山東即墨止焉其明年正月兵又至山東陞徵挈家人奔勞山兵及之陞徵及二子皆遇害曹大呼求死曰此吾畢命日也有營長者詢知爲豐潤董氏利其富不殺而置於別帳令二女子侍曹給之曰吾白頭一老婦將焉用之而禮吾如是若不過利吾財耳倘得夫與子之屍掩之家中有悉與若營長喜遣數卒尾之求得屍拭去血裹以布掘地爲坎藁葬之壘土石識其處當是時兩手拮据水漿不入口者六日矣兵行驅之北曹大呼曰死則死耳將焉往挾上馬投而下如是者數營長怒鞭之曹疲就不能

言以手指頸作索刃狀乃捨去會天雪曹取亂芻覆其身伏地臥絕而復甦乃匍匐浹晝夜達高密之村舍一老尼驚問何自曹知單中丞失女因曰我單女也尼聞於單具車來迎曹告以實時祭酒若魯方爲孝廉以其母夫人命迎入城辭曰夫與子暴骨中野未亡人何敢即安幸微大惠假金以殮得歸故鄉足矣適其僕董貴夫婦亦自難逃至命之覆苦而居呼天號哭者三月單哀之復假之金遂扶柩歸里擇宗人子爲後而主其喪以葬焉其弟之子太史鼎望紀其本末如此後三十有三年太倉陳瑚讀而歎曰嗚呼人當患難流離之際怵於生死在男子或有失其素履者矣况婦人乎曹氏以智脫以誠感百死不回卒歸夫若子之骨於數千里外妥其靈而續其嗣雖古烈丈夫何以加焉余聞安丘孝義有家風微獨其子孫才且賢即其女亦有大過人者余故錄而存之

姚孝婦傳

曹鼎望

姚孝婦者順天豐潤人幼事父母有孝行長適唐之演唐故著姓亦以孝行聞鄉里明崇禎時之演以事挈其妻遷遼左阻於兵不得歸歲甲申從

大兵入關抵故里廬舍丘墟已易姓矣其父物故久母則轉徙地方不知其處之演冒寒暑經歲

月行求得之乃迎歸於家與孝婦朝夕奉養甚篤丙申夏母得噎疾且不起孝婦竭力侍湯藥
禱於神一夕夢神告曰欲活而姑必羹爾肉孝婦覺欲割以進家人環視弗得間閏月七日姑
病急喉聲如鋸不復解人語孝婦乃給之演出又謂其婢曰若守此勿違左右於是潛詣廚下
嚙其左股割肉得六寸許作羹進姑姑咽之甘問何物曰鵠也食既汗津津下姑喜曰吾生矣
維時孝婦色如蠟殊不自勝之演自外至恠問之婦不道所以入室則血漬於地婦則暈而幾
絕矣移時廉得其狀之演歎曰生我者母活我母者妻也越二日婢洩於姑姑撫孝婦泣曰若
爲我幾喪生願再世爲若婦以報也於是鄰里始知其事曹鼎望曰簡編所載割股事甚少不
謂在吾邑也

今上以孝治天下若孝婦者其聞風而興起者哉

曹烈婦傳

駱在中

烈婦曹氏豐潤故太守首望女適玉田桑學使之子庠生宏人事上接下俱循禮法內外賢之
辛酉春宏人病且革曹閉戶自經嫂覺之急救得不死防閑維謹既而曰我之所爲以無子故
若爲夫子立嗣死何爲者舅姑從之卽以伯子汝廣嗣扶柩歸葬葬畢督家課子處之坦然家

人不復防矣一旦令嗣子往奠墓給小婢出卒以縊死時年二十有四距其夫歿僅百日豈非從容就義者哉時余署教諭於玉邑邑人上其事余爲請於當路旌表弗及舉國哀之今承修誌之役雖屬玉婦實爲豐女例得并書以爲兩地風焉

雙節孝傳

顧君錫

谷孝廉之王母馬氏燕君許氏大中丞嶠家婦孫婦也中丞當世廟豎讜議建徽猷奏膚勳載在誌林子以貢得少刺史兩發河陽之花獨航鬱林之石爰稽繼室馬夫人者出自名閥佐君子成令名所至勳與人而息馮厓宜其齊眉偕老也夫何奪所天以未亡人承節鉞箕裘撫諸藐孤於以睦宗黨馴婢僕拮据清白遺而俾家聲勿墜斯亦難矣垂三十年所爲其哲印配世胄許氏以薦蘋蘩可斑綵終懽也乃哲印且遠不及少刺史壽而溘焉朝露所遺孺者即孝廉元調甫七齡嫠宿相仍生產頓落瓶鮮儲粟室如懸磬嗟嗟姑若嫠零丁於淒風冷雨中手緝麻口授經復垂三十年所而孝廉賢書方薦臚唱未傳而嫠星相繼卽世莫不感愴歎冥冥莫問一至於斯也外史曰是不然天道不靳榮予人而愴清節昭世蓋榮名夫人而能之唯此慈孝清節門以內不數數見吾讀陳情表而傷彼祖母劉之慈愛深流澤遠讀荊襄記而悲其護

草堂之樹德宏發祥大千載僅一見不謂聯翩淑美出自一門功名之餘節孝復著詎非大中丞盛德厥貽孝廉曷傷風木哉指日登木天以兩尊人苦節入告

天子標諸金簡玉冊以報兩婺宿於無窮君錫守土臣也違敢僭史官筆亦以習見聞者真且久卽借以風末俗其誰曰不然是爲傳

金烈女傳

徐崇熙

烈女金氏者太學生谷邦之次媳孀童谷碩之聘室也谷姓爲溧陽望族科第簪纓接踵相望惟邦淡於榮利獨好田園山水之樂與氏父聚宅於邑之西鄉安樂莊碩生而岐嶷讀書晝夜不輟氏亦幼嫻姆教勤習女工足跡不出閨闈蓋其天性已然也於是二姓遂定朱陳之盟雍正八年碩以力學心精瘁懣不幸嬰弱疾卒時氏年甫十五耳聞訃挾婢至夫家哭奠哀慟誓欲從死邦及其父兄叔伯力勸乃易服成禮作未亡人朝夕拜祭哀慟鄰里宗人爲之擇繼嗣勉以事舅撫孤之義蓋恐氏之以身爲殉而不欲其傷生毀性也逾年達於院司皆賜額褒之自是之後氏總理內外家務彬彬有體儼如老成人蓋有衰年嫠婦所不能任者而氏皆咄嗟辦之邦喜寡媳之助愈增殤子之痛矣乾隆七年予奉調待罪茲土偶於勸農之隙道過邦家

邦坐予於室之東偏具雞黍菓酒而言曰某有媳未室而寡代邦夫婦操勞十三年於茲矣予嘉獎之不息口越三月予忽抱幽憂之疾程書委積不復能視一日邦與氏父來言烈女死矣時予輾轉床褥躍起出廳事廉知其以五月五日哭亡夫自縊於柩前也屈子自沉之日遂爲烈女完節之辰古今忠節若合符契可不謂異歟甲日子扶病往弔之邦族中諸生谷昂等坐予于喪次蓋卽氏所自盡處也方舉卮忽聞異香滿室馥馥如蘭麝歷數時方已予與諸生共駭之則詰邦曰若室有花卉乎對曰無之焚旃檀香乎曰農家以耕鑿爲業不知旃檀也嗚呼此可以知幽明相感之故矣明年常事者列其事於

朝建坊旌表豐之人至今嘖嘖以爲美談也猶憶前雍正八年予從儀部尙書何公世陞祀烈女鄭徐氏於衢州之鐵塔寺公與予同聞香氣習習撲鼻人以爲何公清德之感今事越二十餘年而復身歷此異予小子則何敢不自勉哉自念垂髮讀書以來頗以節義文章自命平日所著文辭忝爲海內知交所許今日擊氏之孤貞而可無一言以志之耶用是沐手濡毫頃刻而成豈予之敏於文哉亦氏之靈有以憑之也

曹節婦傳

吳慎

節婦姓薛氏刑部郎中曹鑛之窳室也其先爲溁陽望族久而式微節婦幼嫻女訓識大體家故赤貧與母紡績自給泊如也年十六歸于鑛輔正室部署中饋事井然就理鑛每稱其才然事上接下深自斂抑未嘗稍有矜色越三年而鑛病侍湯藥不少懈泊卒號泣如不欲生久之稍稍止長子永淳察其神色如常時拭淚語之曰若何欲節婦斂衽以對曰未亡人遺腹五月生爲曹氏之人死瘞曹氏之士於願足矣永淳曰果若所言則曹氏之福也謹如教屆期而生子永叔鞠育懷抱備極辛勤遇疾病輒痛心疾首及長則督課加嚴每從外塾歸機杼軋軋與啣唔相間寒風暑雨未嘗不淚漬枕席也屬望之殷哭泣之哀日遂失明節婦以雍正五年十月稱未亡人守節至今凡二十八年簡夫氏曰予輯志乘至貞節傳未嘗不低徊久之然節難矣節而在青年之妾媵尤難疇彼小星實命不猶而口血未乾見金夫不有躬者比比也若薛氏之一言矢志終身以之而教其子遂至失明則庶幾古人所云死者復生生者不愧也夫女之事夫猶臣子之事君父豈以孤孽貴賤而有異視哉故例得備書之以激頽波而砥末俗焉

吳節婦時氏傳

豐潤縣儒學
教諭文安人陳雲綺霞

節婦時氏增廣生吳啟蒙之窳室也庠生州同用舉孝廉方正名煊字文夫之生母也年十九

歸啟蒙事姑曰孝事嫡曰淑固周南魯論所謂宜其家室人無間言者也閱二年啟蒙歿節婦以八月遺腹爲吳氏宗嗣所賴乃抑哀順變矢志守節月餘生文夫潛心井水泣血湘筠撫孤成立文夫以弱冠補博士弟子員乾隆戊申督憲劉學憲金以節孝題而貞坊立嘉慶丙辰文夫由州同舉孝廉方正人益歸之節婦之義方曰文夫以遺腹子祖母耄嫡母殘病藉非節婦之以養以教則方成立之未能其能使經明行修上達 天聽哉嘉慶十九年仲冬哉生魄節婦年八十無疾而逝既葬其嗣孫千夫長字猷堂者乞雲一言以爲誌雲惟守節難守節在青年之妾庶尤難以妾庶而撫遺腹子足以振家聲延宗嗣成國器則更難乎其難以節婦生長寒門執巾士族幽嫻素著貞靜性成二年箕帚服勞罔歎衾裯薄命一旦藁礎抱痛能爲巾幗完人守身如玉教子成材可以立女箴可以維風化矣雲承乏溁陽忝任司鐸凡名教綱常所係罔敢泯沒焉爰書之以砥末俗云

王烈婦馬氏傳

王錫卣

王烈婦馬氏者吾邑四神莊民人王以堃之側室也年十三童養夫家十六歲侍夫恭謹事嫡尤勤慎以堃性嗜書且工畫婦童而習之頗得其妙而於書史所載古人事每聞以堃講解輒

默識而明其大義嘗慕代夫人摩笄事慨然與歎謂婦人從一而終夫死身殉必不可覲然人世也以塋心異之而未敢言光緒辛巳以塋病痰瘵日就沈痾婦衣不解帶者凡七越月嘗侍疾流涕曰君之病儻有不諱妾將爲代夫人之摩笄也以塋排解之婦漫應而已壬午以塋歿婦痛絕而甦蓋當以塋彌留之際已絕粒三日矣家人苦勸之乃起以釋羣疑請於嫡室盧爲夫立後繼以塋之兄子福貴爲嗣乃沐浴更衣吞服毒藥出拜嫡堂曰吾夫之望我者爲子嗣計耳今無以慰亡人將從亡人於地下矣少頃而歿距夫亡僅隔一日耳越日而殮面目如生笑容可掬嗚呼從容就義士大夫之所難而乃得之巾幗中也其自命爲代夫人者洵無愧矣歲癸未 旌表入祠建坊曰摩笄比烈原素志也卣居近里聞見聞真確爰誌一言以表烈婦之行而亦冀世俗之有所風厲焉

王孝女梁烈婦傳

劉世珍

光緒乙酉冬一日或告予曰近有孝女兼烈婦一人聞之乎曰未也願聞其詳得筆錄之邑乘亦有光焉或曰唯唯孝女王氏大城縣人父曾械任金華通判女十餘歲隨任所因父久病剖左臂肉和藥以進病若失金華守某聞其事約屬吏共獎以銀練俾束傷處嘉其孝也越數年

邑南坨莊光祿寺署正銜庠生梁蒙祥聘爲繼室梁中年而體不健氏憂之隱以節烈自矢嘗謂其母家曰異日若見銀練吾即死矣今冬梁得疾氏禱神願以身代不瘳易簣時告曰姑待妾將從君子於九原家人防之氏解銀練手寫書遣人送母家徐爲夫備附身物事畢舉動如常次夜得聞飲藥卒此十一月二十四日事也予聞之悚然避席曰古今來孝女烈婦多矣不謂若氏兼而有之也况其刲臂時齒猶樛未知矯激以沽名也非天性至孝爲父心迫烏能痛楚俱忘耶且爲孝女矣不幸而夫難偕老生爲未亡人誰曰不賢乃從容以殉既孝且烈巾幗內孰能如是兼美乎或曰王通判大城望族其女能是意者通判之訓勉有素歟顧予聞婦女之貞淑爲化行俗美之徵今氏之孝烈當不獨父訓使然抑亦由

朝廷之教化風厲非一日也因竊誌之

石城縣考

顧炎武

漢右北平郡之縣十六其三曰石城後漢無之蓋光武所併省也至燕分置石城郡考之通鑑及晉載紀得二事慕容寶宿廣都黃榆容清河王會勒兵攻寶寶帥輕騎馳二百里晡時至龍城會遣騎追至石城不及是廣都去龍城二百里而石城在其中間也慕容熙敗於北原石城

令高和與尙方兵於後作亂註云高和本爲石城令時以大喪會於龍城是石城去龍城不遠也魏書地形志廣興下云有雞鳴山石城大柳城此卽漢之石城矣魏太平眞君八年置建德郡治白狼城領縣三其一曰石城有白鹿山祠其二曰廣都水經注石城川水出西南石城山東流逕石城縣故城南北屈逕白鹿山西卽白狼山也又東北入廣成縣東廣成卽廣都城燕之石城在廣都之東北而此在廣都之西南是魏之石城非燕之石城矣隋書始無石城云北齊廢之而唐書平州石城下云本臨渝武德七年省貞觀十五年置萬歲通天二年更名有臨渝關有大海有碣石山是武后所改名之石城又非魏之石城矣遼史灤州統縣三其三曰石城下云唐貞觀中於此置臨榆縣萬歲通天元年改石城縣在灤州南三十里唐儀鳳石刻在焉今縣又在其南五十里遼徙置以就鹽官是遼之石城又非唐之石城矣今之開平中屯衛自永樂三年徙於石城廢焉在灤州西九十里乃遼之石城而一統志以爲漢舊縣何其謬與

賑粥紀略

鄭兆球

乾隆庚午夏淫雨爲災豐邑山水驟發趨擁於還鄉薊運等河下流壅滯漫溢西南鄉村落皆陸沉矣邑侯赴勘以八分七分六分災請賑報可越明年春復得

恩旨加賑一月地方稍稍有起色乃者時復亢旱東作難興民尙艱于覓食於是復謀賑粥之法

邑侯曰賑粥難于賑米事瑣人衆且爲日久措置稍失宜吏緣爲奸民受其病有三事在能從

我行乎一曰捐助視其力首縣令次文武各官次大戶旗莊次鹽當商或米或銀或錢或柴薪

煤炭鍋鐵車馬零星各隨所便書於冊一曰辦理審其人首紳士次商估次耆老次農民或司

財貨或司冊籍或司出納或司監督各職所長有願力役者聽之一曰男女昭其辨每於單日

賑男雙日賑女賑男并與次日之粥雙日賑女亦如之男女自十二歲以下隨同父母亦各賑

之詢謀僉同皆以爲可乃設粥廠於西南鄉適中之歡喜莊莊有關帝廟屋宇宏深基址空闊

有米局柴薪煤炭局銀局錢局零星雜物局一以紳士之優才幹者司之又有水夫火夫門夫

搬運夫即以農民之富年歲者充之廟後場圃設竈百區仿井田式爲之凡竈九監以紳士二

人米有額柴有額湯熟有度飯熟有度貯於甕出於庭凡一日之粥皆取給焉五更邑侯偕文

武官徧嘗之餽饒色惡臭惡者各有罰黎明蒞要衢災民自村西入領竹符至廟給粥從東去

有襁其子者有携其女者有父扶杖而子隨之者有母頽唐而女掖之者日約四五六千口有

奇自二月初八日始至三月初八日大雨民乃有事南畝于是止賑上下趨事如農夫之有畔

將士之有陣故不勞而事集弊絕而人心帖也計所用米一千石有奇柴薪煤炭等物各若干
勦事賢勞爲紳士曹希光曹式佑陳惠南王於濟張嗣悅張嗣勇王奕曾李元甲唐錕等奔走
稽查爲河廳李公鳳卜捕廳殷公玉振往來彈壓爲都閫珠公陵城守翟公世勇而運用措置
司其綱領者則邑侯姜公之瑜也

銀城井紀事

吳慎

豐治十五里銀城舖爲漢土垠縣舊址適當孔道叢沙爲壤不可以井汲飲者率走十數里外
居與行皆苦之予惟民非水火不生活必遠而致不勞且病哉爰審方度向於道北穿沙爲井
深七十尺其泉甘冽郭以壘石費工二千餘捐俸錢三萬士民贊助者書之碑陰始乾隆十九
年七月二十三日邑尉白世祿董之越三旬而井成銘曰天一之精孰爲瀾汜一八五八穴此
沙漠撻礮不籍胡易而渴而煩而滌我心則悅

修補城東來龍引

魏元樞

蓋聞葆靈孕秀光華發川嶽之精緯地參天旋轉露乾坤之手王氣全鍾冀北日捧長安文名
先讓畿東星躔箕尾納盡崑崙之脈匯爲滄溟之朝矧我溁陽邑稱豐潤金名永濟元日閩州

左原右溪直繪畫圖之上後屏前案生成名勝之奇地接兩京人有五陵佳氣形同三輔土噴
萬丈光芒甲第連雲韋杜去天尺五西山挾籙元白應象魁三雞鳴狗吠相聞山村花滿剝棗
烹葵爲壽蔀屋春長乃積乃倉菽粟有同水火如墉如櫛禮義治於鎡基睹華胥於堯封讓間
田於禹甸風流不遠誰回叔晚以中天主善爲師重暄和陽於勝地尋宗問祖引繩批根蓋由
風水相遭全非本來面目因知盛衰相嬗無復舊日衣冠巽龍左來衝決受損坤方水去直瀉
無情加以運甃丸泥鑿斷崩洪之脈抑且車馳馬驟流開官旺之方水城不完氣因風散地勢
不接連遂中傾識者爲之寒心居民誰不落魄田資移奪東陵幾種青瓜王孫牢騷上蔡或牽
黃犬金門射策劉蕢不許占鰲頭玉署攤書甯越空憐掛牛角閭閻庚癸科甲晨星砥以頽波
憑仗擎天有柱功還造物莫非煉石成丹大有同人共在鈞陶之內中孚无妄祈完補救之方
富以其鄰中心願也於食有福其剛勝耶緣督爲經請高明裒然領裊同舟利涉予小子疲於
津梁並無肥己之私憑仗大家之力因人成事事事勞心聚少成多益善築堤壅水曲曲
回環去無流借土培龍蜿蜿鬱蟠來無病人謀補生成之憾百姓與能地利有神鬼之通萬民
以濟變諧元氣符合化工行看楨幹王庭多士際風雲之會謳歌衢巷比屋興仁讓之風腰帶

橫雲近作三台華蓋秦山明月直籠萬井氤氳有慶自天於今爲烈於戲高山流水願吾邑在
在鍾期仗義疎財知諸公人人季布行將大作先此通知

董太恭人墓誌銘

浙江錢塘進士袁枚

董太恭人王氏直隸豐潤人生而婉嫺明淑不苟言笑年及笄來歸封公公繼先生其時尊嫜
在堂正妻劉恭人當室太恭人孝於姑順於嫡從禮無違勗帥以敬雖分居之族黨咸和若穆
羽之調生二子而封公卒其長卽今觀察也當是時太恭人年甫三旬觀察方八歲儻然一嫻
孀獨支門戶內陵外侮未免俯張而太恭人能持大體處之綽然檢校分書護持遺產爲子延
名師婚望族凡家務之犖犖大者無不畢舉旁人聞之疑封公之尙存也無何次子又殤太恭
人進觀察而密語之曰汝弟亡則吾與汝益孤矣趁此年華可不奮勉前進報國恩而揚先
烈乎觀察泣而志之遂援豫工之例得同知發皖江補安慶同知署赤緊州縣凡六處在六安
時有水旱災太恭人施繇衣百領爲紳士倡恤獄囚飢寒贍以錢米觀察訊貴池盜案其渠魁
不刑而服叩頭曰盜雖不良然疊奉太夫人恩所以供詞無隱不敢煩公心者即以報太夫人
也其盛德之感人如此未幾觀察陞廣西思恩府知府思恩瘴癘價興觀察以迎養爲憂太恭

人怡然不以爲意曰從子禮也生死命也汝何所依違耶遂同往二年歿於官署觀察起服後陞湖廣糧道調江安糧道三署布政使事嗚呼以太恭人之神明豈不知瘴雨蠻煙非高年所慣然決意趨車而相隨者慮觀察之乖離膝下將母心殷不能一意辦公上報 國恩故耳豈料身亡之後不過數年觀察所莅皆聲明文物之邦可以娛親而竟不能烹武昌魚飲建業水供板輿一日之歡此梟魚風木之悲古今同感宜觀察之每念及而不禁淒然泣下也太恭人天性仁慈待奴婢如子女然不忍笞督聞罪人呼號常廢寢食問決獄有所平反則喜溢於顏以故觀察之行事厚居心寬皆母教也卒年五十九子二長世明次世華孫二人以 覃恩誥封恭人以乾隆三十八年閏三月二十六日葬於遼郡城東北店莊銘曰月孤彌明松寒更清從古甘臨之吉皆由於苦節之貞悻悻恭人爲魯陶嬰劬躬薰後訓子成名天道似遠而非遠地道無成而有成必報者善動物者誠貽謀者遠聞風者興卜茲元宅安葬絲靈峨峨綽楔鬱鬱佳城儲休啟後永蔭孫曾

趙明府墓誌

張杰

趙公諱登高盛京人順治二年任縣事時值草昧初定賊盜肆行公擒數人繫獄賊糾黨劫之

公門而死遂葬於斯崇祀名宦祠後吳明府慎修縣誌爲公立傳蓋公百年後一知己也嘉慶二十二年秋杰署遵化州篆按部至豐往拜公墓見荒烟蔓草中殘碣猶存一杯將圯爲傷感久之公墓前有一小塚詢之土人僉云前任典史死而無所歸附葬於此其姓名里居與亡之年月均無攷噫該典史亦杰朝廷一命榮也其未遂首邱與公等悲哉子姓疇依姻親何託無以妥之更何以堪杰與現任杜明府名懷瑛商議共捐白金四十兩交鹽店生息每年計息可獲八金以爲公及前典史兩墓春秋致祭培土之資交本縣典史經理其事入於交代用垂永久庶可以少慰公之忠魂與前典史之冥魄也特續梓於誌惟望後之賢明府下車後隨時稽查勿使凌替曷勝欣幸之至

募置鄉會試公產引

鄭澂

豐邑近在畿輔沐 聖朝文教蒙先達餘澤家崇絃誦歷年於茲以故試京兆貢禮部獲售甲他邑顧士多寒峻隨牒入都往往艱於資斧得第後旅寓京華尤形支絀夫以攻苦多年一擊不中遂窘於再試即中矣而囊空羞澀將伯莫呼此續學之儒所以廢然而歎也澂嘗恍然深念人之敦尙梓誼誰不如我其子弟好修向上又誰不如我願令俊彥厄於計偕焉忍膜視是

宜急圖所以維持保護規諸久遠者以爲將來勸爰不揣固陋謬獻一籌竊欲廣諸同人尙德之心仿古先賢義莊之制捐置公產收歲租以資諸寒士鄉試人給二金會試人給三金其中式者各照 恩賜旗匾之數分給儻山川効靈有作狀頭者將全產交付以後另議續捐置辦悉如前約茲舉經營伊始約計需費三千金同邑宦外任者飛書相咨咸踴躍從事各登捐數如左更望林下諸君子協力同心各聯所知因親以及友十丈之裘佇成於集腋於以徧覆寒素俾文士各得從容獻藝彬彬濟濟鳳起鴻鶩鼓舞奮興庶幾更逾於今日由是父勉其子兄勉其弟謂吾邑人文之盛自某科始自某某鄉前輩作興始任恤之心油然而旁推孝友之行蒸然而日上則又不徒夸耀科名已也河間戈舟芥少僕聞之曰偉哉斯舉允宜踵此而篤行之吾輩拭目以竢樂觀其有成也然則吾邑首事者又烏可不勉哉敬具小引祈列台銜

心香書院議院在新軍屯

趙國華

日前枉過數領教言幸甚社誠爲美事此近人不經見之舉吾黨僻居村塾限於方隅各守其一塾之說積而相沿得此以振拔之不但士習有所宗亦厚風俗之一羽翼也前言未能曲罄其說積一日夜思之凡事造端不得不力爲行遠計確然有以見於後此事規模尤宜正大務

使士林有所景仰爭自勉勵而後教可行也古人最重師道其初遇即不可苟是以大學始教皮弁祭菜揆古人之意非以其文也爲之師者不敢毅然自據於師而奉其先師以臨之也今諸君所言社必有長理固信然而屬意於不肖如國華者肺肝自顧何以當此竊又不敢自外籌之至再而乃得一法焉夫鄉先生死而祭於社古也茲之社鄉社也社不可以無名擬名之曰心香書院歷取吾鄉國初以來迄於咸同其沒世而繫人望且文章與志行相符者即社爲位於朋集之時習禮其中瞻矚徘徊既資感發而社之長亦在是矣曩國華在京師見國史文苑傳吾鄉谷霖蒼先生是爲第一人蓋史多用年例先生舉鄉在順治二年寔出諸老之先雖大江南北名賢輩出有不能奪此席者擬首祀先生而配以曹澹齋鼎望魏耀菴元樞劉永菴所說魯叔和克寬周允廷士拔鄭秋浦激董恒巖榕楊怡青友雲劉雲巖燠董曉峯齊光張雲樵印塘張羽豐燕翼鄭月洲濂鄭竹筠長齡郁鍊之鎔芮曙樓永照吳仁波廷溥諸先生使諸生登其堂而穆然遐思不但講肄所以爲文有所稟承而往來砥礪先正之側百年耆舊如在一堂斯亦人生之所大榮矣既不忘乎先達亦有以風來者則斯社之師豈乏人哉至點定同人課藝國華已承教竭其心目不獲辭用敢覲述一切其有未協未備之處祈平酌而詳議焉

是在當事諸君子矣

縣城說

李榮喬

古人度地以居民設險以守國城之建所由重也閼管攬中原之大勢關中爲天下脊河南居天下中金陵則鍾山龍蟠石頭虎踞燕京則後連邊塞爲屏藩前倚黃河爲天塹自周秦以來歷代建都皆據山川之險峻而郡縣之建城亦往往因之卽如我豐潤之地前志序有曰枕燕山襟滄海拱京畿通關隘孤竹在其左漁陽在其右屹然形勝地勢實甲乎畿東然是說終屬概論尙未詳哉言之也余嘗讀懷帶山記而於縣龍之發祖始知所由來用是登臨絕頂憑高而眺望之見夫蓬勃之氣附勢南行左有陡河環流右有還鄉河繞送兼之峰巒壁立村堡星羅其山秀潤者民多儒雅而好文其山厚重者民多儉樸以致富縱橫起伏至城東忽轟沙坨團精聚氣自此已極而東西中之脈絡分焉爰考其西卽城龍入首昔稱來自巽方今已被水冲决惟震方尙有形迹聿觀厥東向西南奔赴城南三十里有山名車軸爲縣城前照山上浮屠畫閣高插雲霄助起離明秀氣山東北十里許清泉兩道發爲泥河下流則直入黑龍潭河俱以還鄉河爲歸宿所有西南村舍沿河者代有科名俗以文明河呼之而居其中者環繞城

郭土隴隆縣延不絕限隔東來之水由城外達河是河也依山則澄清靜深附城則鬱環曲折波光樓影上下交輝加以隄柳含煙檣帆蔽日畫圖一幅風景渾似江南信城西之佳境也西北則羣山拱揖西南則寶塢峻嶒大東有陡河界脉直注唐山雖異派分支靈氣亦遙遙相接至兩河交抱之間衆水分流俱由泊入海此境內山水所由孕秀鍾靈也然而坤方四陷羅明府曾以資生名臺巽地捐傷魏太守復爲修龍作引救弊補偏尤於邑人士有厚望焉

吳明府循良紀略

李榮喬

明府姓吳氏諱慎字簡夫四川夾江人丙辰進士沈毅博雅居官本儒術爲治術所至有政聲乾隆十八年由涑水調豐潤時縣志失修久矣雖經張羅兩明府續修多年未有成績公下車慨然身任屬筆於邑紳魏太守陳鄭兩孝廉相與旁搜遠摭釐訂舊志略者詳之闕者補之如劉刺史殷總戎李縣尹諸公皆見危授命城亡與亡者舊志不載耿耿精忠付之荒煙蔓草將何以勵人心而端風化耶至趙明府之宰斯邑也值

熙朝定鼎之初遭狂寇刼獄之警身蹈白刃刼遇紅羊卹典未邀於

廟謨忠魂徒埋於泉壤尤可哀已公乃搜遺牒得實情闡風徽於既往發潛德之幽光登諸縣志表

其中也親祭墓前慕其義也州牧張君稱公爲趙使君百年後之知己良非誣矣及縣志纂成彙爲二十八卷俾百餘年曠典闕如一旦燦然大備微公之力不及此信乎莫爲之前雖美弗彰莫爲之後雖盛弗傳也匪直此也邑西門內舊有岳忠武王廟年久傾圯城守翟公請移修於南甕城與營署鄰近俾士卒得以朝夕觀感公可之復捐廉助之縣尉白公亦請曰城東垠城舖爲漢土垠縣址瓦礫叢沙艱於井汲居民奔波數里外赴鄰村取水河魚腹疾其奈之何公瞿然曰民非水不生活是有司之責也卽日捐廉倡首穿浚孰意人定勝天地不愛寶耿公拜井湧出醴泉至今鄉人利賴之公之賜也他如設局留養軫恤窮黎雖州縣通行而布置周詳惟豐稱最自來龔黃召杜舉播循良以公視昔或者無多讓乎且白公獄官也不轄紳民不司文教凡建廟穿井立局數大事無不竭力襄贊相與有成至修志一役尤汲汲焉局設宏法寺館立文昌宮費用繁多皆如期籌備雖曰見義勇爲出於至性然未始不由於明府與人爲善僚屬同心而白公感深知己以盡心於公者盡心於志以此見仁人君子之用心侷乎其遠白公不可及我明府尤爲不可及已乃蒞豐不滿二年竟被吏議而去嗚乎豪傑不遇時大抵如此公之不幸實我豐邑之不幸也喬生公後百數十年見知聞知無能爲役去歲謬蒙 縣

尊諭令濫厠志局披閱舊志得悉公顯微闡幽之苦心好義急公之盛德而宦途坎懔黯傷者久之弱筆穉文不敢僭爲之傳又恐年湮代遠等於劉殷李趙諸公之蹟不遇我公幾於湮沒而無聞謹據實直書紀其顛末以俟後之君子有心世道者知公梗概大筆鴻文從而傳之贊之庶先生之風山高水長也夫

腰帶山紀遊並山頂議建望海寺記

環豐皆山也車軸唐山峙其前披霞陳宮枕其後右鴉鵲左牛蘭無不毓秀爭奇而東北諸峯勝蹟尤著望之巍然而高大者腰帶山也陟其巔約廿餘里俯視衆山拱列若兒孫焉是爲縣龍祖山舊志已載周圍五十餘里西有還鄉河縈繞東有陡河環流由山南盤旋而上不數里有泉甘冽不流不竭旁有石窟時蒸雲霧雖隆冬之候野花猶開傍崖則古木千章松柏蒼翠中有古寺額曰橫雲每天旱見白雲如練橫斜寺西必有大雨此腰帶橫雲所由列邑八景之一也原夫制都立邑鎮以名山豈僅標嶽奇紀形盛而已哉良以純固之體鬱勃之氣靈秀所鍾發邇見遠放生其地者人文之蒼萃民俗之敦龐物產之饒沃咸於是乎賴我豐地近畿輔風化所先文治武功甲鼎盛惟自嘉道以來仕途鮮通顯者據形家言緣祖山頂平之故欲

親履其地以證所聞奈困於脚力有志未逮悵然者久之適邑諸生張君翼麟好奇嗜博其居

距山祇二十餘里裹糧入山搜奇覽勝凡山中奇異之境曰分水嶺東水頭大仙溝

溝長六七里舊志載面破以此

小仙溝青陰乳洞海眼諸勝蹟無不歷覽而詳誌之登至絕頂奇花藥草多不知名秀氣盈裾
飛翠沾袂俯瞰山巘南下縣延五十餘里折入縣城漸向西南龍巖愈展無怪縣屬科名西南
較東北爲獨盛也頂上廟址宛然間存瓦礫詢之士人據云聞前人以山頂稍平建有望海觀
音寺起秀拔之勢歲久失修頽廢百餘年矣張公紀以示余余曰噫嘻盛衰興廢之故雖曰時
數豈非人事哉夫順康之時邑之先達膺顯秩掇巍科踵相接者以山之有此寺也嘉道而後
科甲蟬聯而陟崇階任重寄者曾不數數觀以山之無此寺也形家之言不信而有徵歟獨是
有其舉之莫敢廢也覩於前者不難開物而成務因於後者何妨踵事而增華縱乏鼇戴之能
詎愧蟄負之力依山掘石就地庇材下築石臺上構蘭若有不高出重霄下臨無地者乎當即
諾乞同人光分大有裘成腋集續奏膚公將見大觀在上必有達人斯山呵護之靈實有大造
於我豐也其在詩曰維嶽降神生甫及申維申及甫維周之翰吾於此有厚望也夫

峕

光緒十五年歲次己丑暮春之吉

候選訓導貢生李榮喬子宣甫撰

文苑下 詩 詩餘

漁陽太守張堪歌

漢無名氏

桑無附枝麥穗兩歧張君爲政樂不可支

刺讒疾嬖幸詩二首

北魏陽 固

巧巧佞佞讒言興兮營營習習似青蠅兮以白爲黑在汝口兮汝非蝮蠱毒何厚兮巧佞巧佞一何工矣司閭司忿言必從矣朋黨嚙嚙自相同矣浸潤之譖傾人墉矣成人之美君子貴焉攻人之惡君子恥焉汝何人斯譖毀日繁予實無罪勝汝詭言番番緝緝讒言側入君子好讒如或弗及天疾讒說汝其至矣無妄之禍行將及矣泛泛遊鳧弗制弗拘行藏之徒或智或愚維予小人未明茲理毀與行俱言與釁起我其懲矣我其悔矣豈求人兮忠恕在已

彼諂諛兮人之蠹兮刺促昔粟罔顧恥辱以求媚兮邪十側入如恐弗及以自容兮志行褊小好習不道朝挾其車夕承其輿或騎或徒載奔載趨或言或笑曲事親要正路不由邪徑是蹈不識大猷不知話言其朋其黨其結實繁有詭其行有佞其音蘧蔭戚施邪媚是欽既詭其妬以逞其心是位是任敗其以多不始不慎末如之何習習宰嚭營營無極樂邱寡知王鮒淺識

伊戾息夫異世同力江充趙高甘言似直監刁上官擅生羽翼乃如之人僭爽其德豈徒喪邦
又亦覆國嗟爾中下其親其昵不謂其非不覺其失好之有年寵之有日我思古人心焉若疾
凡百君子宜其慎矣覆車之鑒近可信矣言既備矣事既至矣反定不思維塵及

薊邱覽古

唐陳子昂

南登碣石館遙望黃金臺邱陵盡喬木昭王安在哉霸圖帳已矣驅馬復歸來

別馮判官

高適

碣石遼西地漁陽薊北天關山惟一道雨雪盡三邊才子方爲客將軍正渴賢遙知幕府下書

記日翩翩

薊北旅思

張籍

日日望鄉國空歌白苧詞長因送人處憶得別家時失意還獨語多愁祇自知客亭門外柳折
盡向南枝

宋徽宗過思鄉橋

沙巖寺裏樹蒼蒼塔勢陵嶒大道旁北狩至尊仍出塞西流溷水自還鄉看花古驛愁春雨駐

馬危橋泣曉霜五國城中寒月白魂歸良嶽總荒涼

燕山道中

金蔡珪

欸段乘涼未五更徐河十里霧中行前村烟樹望不見欲到忽聞雞犬聲

雷川道中

前人

扇底無殘暑西風日夕佳雲山藏客路煙樹記人家小渡數聲櫓斷霞千點鴉詩成鞍馬上不覺在天涯

燕山秋望三首

元潘伯脩

西山木落向高風萬壑千崖出梵宮翠幕遙看銀榜合金精虛逐火輪空杓欄靜立條條上冠佩飛行蕩蕩中何日龍船移權曉露房雲水四簾通

遼海東空鶴不歸平蕪遙際極涼霏寒天霜靜鵬鶯沒沙苑秋高牧馬肥落日美人歌玉帳西風獵騎擁金羈豪豬猛起當前立曾冒鳴弓脫曉圍

北落師門霄漢間陰雲粉拂夜湯山水聲亂趁龍門道月色斜窺碣石灣劍臥古臺星鬱鬱笳凝幽草夜斑斑千秋萬歲滄浪面長照君王入近關

奉題袁伯長開平百首詩後

王士熙

玉海雲生貝闕高，騎鯨人去采芝遨。
灤江一夕秋風到，瑟瑟珊瑚涌翠濤。

開平晚歸

七月一日授翰職

王惲

龍首峒邊野草深，秋風灤水動歸心。
百年蓬巷開圭竇，一日恩光照士林。
鬢有光浮鏡，玉家書封喜認泥。
金料應曉月，簾櫳底乾鵲飛來報好音。

過宏法寺

明馬中錫

白髮吳僧健，譚空坐講堂。
留人多啜茗，供佛祇焚香。
日落鴉爭樹，天寒鶴共房。
嗟予行役倦，風雨欲連牀。

晚發豐潤縣

張 寧

蕭蕭車馬度重岡，回首都城意渺茫。
斜日下時人望遠，孤雲飛處客思鄉。
黃茅矮屋山居小，白草浮塵石路長。
星月滿天行未歇，俯鞍還復候行裝。

花斑石

曹光祖

漣水之北山之轉，五色石上霞光絢。
天巧新搏碎玉巒，人工細切春冰片。
天生美石人爲器，石

生此地爲人累尋山老匠夜經營撼石壯夫日憔悴切磋瀘碭動經旬少不周完即損棄盡日
攻山石將斷野外人家無一片不知得此更何爲不得中夜發長歎我恐勞民不攻石遽意爲
民釀禍難願天莫生珍恠山願山莫產石斑爛不見醜石似奇鬼兒童拍手笑孱顏

邊夫

曹光祖

五月薰風天上吹征夫揮日赴邊陲邊工今歲急如火况復雜征又細瑄我爺修橋叔潞河昨
日邊夫又派我牽馬妻迎太僕點管糧兒向甲頭歛馬瘦妻殘手上皮糧遲兒命歷危險家家
有丁差難脫頭班剛滿三班撥食糧糶盡賣衣裙兒女賣時心如割富家多算只典田買田差
賦恐牽連富家多算只買屋草屋年久又無椽富家買女不買兒成丁又恐出差錢點檢一家
無可賣富家又催前年債千言萬語訴叮嚀富家性氣多豪邁馬蘭去歲工方住今年催上冷
水路年年辛苦不曾閑未審明年又何厝邊塞無泉日午渴撼石登山愁脚脫月暗風驚醒未
眠時防賊衆夜劫連賊知邊夫貧見骨意脅守將苦索錢守將愛夫如愛子扣軍月米急贖還
到家流淚聲先憤父母妻孥驚相問幸天賜我又生還不然身作他鄉塚願天塞上不生山生
山不峻易爲攀若使斷崖千仞立民力不用闔閭願天冬月不生禾耕田每與修邊訛甫能

完得田疇工遲違又被官譴訶怨天不早生良將頗收一人多屏障古有鎖鑰與長城未聞修
築策上上試聽斯言真可傷穆穆天子坐深堂我爲民牧曾無補空將天祿飽腹腸

遊觀雞寺

王愷

晴來遊古寺眼界十分賒市遠塵囂淨山幽景物華錦雞眠碧草白鹿動閑花偏愛僧房好燒
松更煮茶

豐潤行臺次韻

吳希孟

畫靜行臺寂松陰鶴舞花遠山响樵斧孤岫出雲霞草冷留荒砌林深見落鴉三冬驚客况何
日侍文華

晚發榛子鎮過豐潤途次遠眺

謝九儀

遼鶴春飛遠灤河夕渡移柳烟偏倚郭花雨况當時海曠羣仙島山高二子祠向來歛衿袂益
重古人思

豐臺閣工宿靈應寺

王納言

寂寂禪居瞰水隈五雲西去近蓬萊日移帆影千兵合風戰潮聲萬馬來估客獻珍同禹貢庶

民攻役似靈臺倦行坐借蒲團穩遣興何妨濁酒杯

豐潤院中兀坐

張惟恕

行臺留野興小院瑣寒花黃菊香凝露丹楓色染霞秋空排過雁晚樹定棲鴉坐裏閒觀處流光送物華

七家嶺道中書於豐潤行署

張惟恕

衰樹飛黃葉饑鳥怯曠寒征人侵露去遊子倚雲看石澗牽漁荇沙堤媚馬蘭衝泥聊駐節應見路行難

燕山

谷九鼎

燕山周屬召公土迄我皇明附明主中間人世幾變更奠位朔方自今古嶙峋列嶽東西橫豁衍巒嶸勢堪驚龍蟠虎踞雄塞北劍戟旌旗羅萬兵峻拔嵯峨排將卒低昂奔突若驥馱相向相背列陣奇前唱後和師以律天開疊嶂護邦畿恍疑雄堞狀國威北兵應自無南意偃息戈矛不用揮美哉險固中原定金城千里何足稱

過豐潤有感

周祚

雲幘行應遲星軺此暫留天晴一塔出秋暮野城幽角韻經霜壯風聲入夜稠邊人須慣聽遠
客不悲愁

公暇陪苟侍御遊薛道洞

楊樞

石洞伊誰鑿年深封白雲已聞跨鶴去似有臥龍吟路轉雙林出峯迴一澗深叨陪騶馬使暇
日此登臨

豐臺

馮珍

水國秋偏早開簾暑氣無湖平見遠樹夜靜覺飛鳧帆影懸新月潮聲擊敗蒲十年江海別風
景亦南隴

再經豐潤感懷

謝九義

沙磧烟橫漠將營銀城春悄隱千旌歛階石髮油油動照水雲芽汨汨明白雁羽書傳澣海青
萍霜鏘媿儒生六年曾握巡邊檄誰識長孺欲請纓

漁陽感懷

國朝梁清標

孤城落木盡茫茫碣石遙臨海氣黃殘照晚明燕嶠雪亂山寒擁薊門霜天晴亭障消烽火日

暮溪田避虎狼自古阡危邊郡地百年爭戰事遼陽

過豐潤留贈曹鼎望孝廉

陳之遴

鄉書當日薦賢良燕鵲曾隨鸞鷲翔不謂餘生重出塞敢因世好一登堂秋空忽見桃花色甲
榜翻分桂子香却惜匆匆驅馬去幾回迴首望溟陽

祐國寺

張如騫

招提依僻境萬木轉山阿棗栗垂垂發園林寂寂過屐闌花自落珮响鳥能歌祇樹何年種尋
幽到薛蘿

郊行偶吟

楊泰

放步郊行四望賒無邊景色翠於葩脩眉浮綠飛晴霧遠鏡生光映晚霞學種村童爭試犢荷
鋤野老戲簪花相看自是能消病買醉歌樓第幾家

披霞山

張如騫

尋秋秋盡躡秋山四野晴烟繞翠鬟林靜丹楓遙振響天高白雁一飛還乾坤尊酒親朋共杖
履遨遊禮法刪郭外忽看唧晚照籃輿歸去月初彎

題豐潤驛壁

朝鮮國人

柝聲傳永巷新月挂西樓千里東歸客寒窗一夜愁

過魏大年西莊

谷元調

處士山莊古臥龍西郊一帶水雲重閒將墨汁千尋汲好對爐烟四壁封琴上絃高歌白雪盃
中酒熟淬青鋒幾回欲過司空塢君杖青藜我枚筇

鎮海臺觀海

羅景泐

登臺極目望海氣鬱氤氳浪浴扶桑日潮通碧漢雲仙人尋鶴伴漁父狎鷗羣欲濟求瀛島風
聲不可聞

東郊別業有松四棵霜皮黛色交盤若屋顏曰松茨時或棲止其中不知身在人間世矣

曹鼎望

四松如高士卜築依左右翠蓋籠堦碱涼颺生戶牖我來坐其中滌盡心舌垢舒目上層臺岳
峙而川走發興賦新章開襟酌大斗倦羽不思飛愛止是林藪策杖時相過儼然成五友秋蟬
咽高林白雲幻蒼狗悠然遠市囂漸覺空諸有

曹使君有松茨別業爲賦新篇却寄并及眉菴賓及冲谷

李因篤

四松曾在浣花溪萬里漁陽對不迷解作龍麟舒老眼長聞鳳嘯記幽棲猶耽林壑推梁棟不
遣風霜入鼓鬢暫借一枝何處鶴迢迢時下白雲西

遙題松茨寄曹澹齋

湯右曾

種松舊記浣花溪雪壓風梳葉葉齊千載何人繼高躅先生得地樂幽棲雲埋百尺龍髯老露
下三宵鶴翅低知有六街塵不染長安桃李任淒迷

王化山泛菊

羅景渤

君不見青蓮好酒復好詩豪懷逸興傾當時又不見子長胸臆多奇磊西登崆峒東滄海若非
遊屐與酒卮下筆何能如雲鬢我生不文嗜啣杯每逢勝地亦徘徊常慚足跡猶不廣况遇重
陽來相催人生重陽能幾何肯使歲月笑蹉跎縱有三萬六千日屈指此日一百過中間風雨
與疾病或是喪慶或從政老穉再去三十年幾番重陽同嘯咏爲此不惜沽美酒爲此不妨邀
賓友攜朋載酒上王化競向菊花叢裏走射中奕勝詩爭成各各引滿不記斗此時我興已陶
然南望滄海迷雲烟上有嘒嘒長空之鴻雁下有潺潺石澗之流泉頓忘得失於斯世遑計是

非於當年獨恠句中多懷古吾亦不禁欲終篇君輩競道戲馬臺我昔曾從臺上來留戀彭城
棄百二東歸之日卽鞍垓又傳龍山有落帽主賓以文相嘲笑都督久蓄跋扈心參軍豈不知
其奧何如此際溫太真席上使酒故懷曠參軍或是做此意不使都督來相親若謂長房知福
禍登高豈若地一縮又云佩英可長生白髮何堪陪輦轂陶令無酒竹籬東白衣黃菊交不窮
王生作賦滕王閣西山南浦饒高風千載以來韻士二一是年少一老翁賦能依然羽觴飛移
樽絕頂對落暉須臾酒盡客亦散一鈎新月送予歸歸來贏得詩滿篋長憶龍門采石磯

翠峯寺感舊

唐壽朋

十載違茲地今疑去復還好尋昔日我猶對舊時山戀客馴禽下留賓恠樹欒故人餘老衲相
對話時艱

靈泉寺

唐壽朋

杖履來山逕蕭然澹所求苔衣鋪殿脚雲帽冒峯頭山迴晴含雨禽喧鬧作幽紅塵飛不到片
刻是瀛洲

過唐愷庵遙黛山莊

曹鈴

卜築誅茅另一村編籬插棘護柴門年來漸識爲農好老去深知養拙尊自撥新醅呼小婦閒
鈔舊句課兒孫春明更種南溪樹荷鋪人歸帶月痕

遙黛山莊和韻

魯璣

歸隱高懷卜小村屏山曲水護蓬門庭中自喜孤松直戶外羣推五柳尊雅比逋仙調鶴子興
逾狂客嘯龍孫個中佳趣憑誰識只有風聲共月痕

伏日同伯兄眉庵松茨消暑

曹鎔

何處攜尊酒東臯舊草堂雨殘沙路細風軟野苗香巢燕非時出山蜂底事忙老親憐弱稚勸
喜故相將

觀海

谷文張

高臺車馬駐陰氣鬱難開饒有望洋興慚無作楫才放懷時琢句舉火夜分杯莫訝偏風雨潮
聲送海來

燕山

唐居仁

萬里龍沙路透迤此地過陣雲東去盡烟雨北來多掌上山城月襟前瀚海波昇平何所事扶

醉望青螺

城西別墅二首

曹牧

我有西郊園栽花無餘地載酒時相尋敲詩只自記一酌赤我顏再酌適吾意連綿三五酌林木如相謂可知醉鄉中能忘身世事

我有西郊園可以藥俗塵每從花鳥邀同挽羲皇酒杯底浮雲過尊前笑語親適情乃見性况復醉更真安得江河酒日飲區中人

雨中錦溪亭獵魚

曹鈞

帶笠尋山佳興同近山靄遠遠菁葱亭臨洩水烟波上人在秋光暮雨中歷歷牛羊趨古渡蕭蕭禾黍下西風漁翁網罷傾尊酒醉眼模糊天地空

碧霞宮僧舍偶作

曹鈞

山遶孤村水抱堤柳陰深處隱招提雲衣製雨濃還淡麥浪掀風高復低馬渡板橋蚪蚪亂人歸桑柘布姑啼世間何事如閒好靜對松窗日已西

遊釣臺因至披霞山

曹鈞

此地曾傳有釣磯誰人終日坐忘機偶來選石臨流水特爲尋詩入翠微遠浦靜看雙鷺下斜陽遙伴一僧歸塵心久已消除盡擬向松根着板扉

秋日飲曹澹齋松茨即席和韻

羅景泐

徒倚東臯晚氣封雲橫遠岫鬱氛重幾番旅雁驚羈客無限寒蟬抱古松作賦琳琅推繡虎啣盃傾倒快登龍相將不避秋風冷萬籟清幽和石鐘

秋日遊翠華山

羅景泐

草木衰靡剩碧苔清光留客共低徊菴臨樹杪千尋矗山抱溪流百折來欲探奇碑爭覓徑暫賒黃酒此登臺興甯立就千言賦賦罷勸君更引杯

庵子峪

曹鼎望

鳥噪溪邊樹雲籠嶺上花長蘿接曲徑松下有人家

南庄即事

曹鼎望

清溪百轉繞龍沙隊隊遊鱗逐水花岸草已黃鴻雁去高枝夜夜噪慈鴉

世德堂紫白牡丹

谷元調

掩映珠簾富貴叢邊城四月鬪春風魏家色占西京後紛白何須一捻紅

登翠峯寺香鑪臺

唐居仁

曲磴崕龍天半開長風萬壑動鳴雷山崖斷處隨人入恠石逢時劈面來海市雲中人出沒霜
鋒尖上路盤迴紅塵已隔三千里嬾逐蝸聲走帝臺

題劉熙齋隱君城南別業

曹鼎望

花護幽齋草護庭先生獨坐一簾青有時細玩山川態無事閒翻道德經方外論交來老衲籬
邊移菊向空亭於焉已是柴桑里可許王宏共醉醒

西水頭和韻

唐壽朋

一逕逶迤破曉烟癖耽山水擠成顛危峯乍缺雲來補峭壁將崩葛欲連谷答鳥歌山按板葉
留蟲篆樹呈箋却憐朝市繁華瞬輸汝僧窻日宴眠

金窩山

唐居仁

奇蹟何年闢仙踪己不磨松梢羣鷺白洞口一樵過青嶂原詩侶黃金是道魔卽今天下瘠仙
意復如何

夏日遊天宮寺

曹鼎望

麥浪鬱蒼蒼相將到上方鈴喧鵲夢失雲臥塔尖藏樹古枝穿瓦窗虛月入床浮屠千載地日
日醉壺觴

雨霽過水西

曹釗

今朝天氣好欵步到河西雨沐山容媚風排麥浪齊一燈傳佛火雙樹護招提獨對蒼苔坐閒
將粉壁題

狐兒崖

曹釗

古刹依青嶂幽棲此一方驚濤奔虎兕廢隴臥牛羊松密晴還雨山深夏亦涼閒身輕似鶴杖
履任徜徉

草堂雜咏四首

曹釗

不解爲商亦不農荷鋤只合作花傭蓬蒿一任荒三徑閒看蜻蜓立瓦松
春色勾人急酒觴頻婆花發滿林香黃昏一片溶溶月淡點鉛華睡海棠
幾隊朱魚戲水花青蒲剪剪亦抽芽如梭亂織斜陽影老樹爭巢鬪乳鷗

柳帶條垂綠正齊花開次第到棠梨臨窻靜對南華坐夕照無人鳥自啼

靈泉寺

魯瑤

幸有靈泉可隱栖芒鞋竹杖自堪攜花簪峯頂形如髻雲接山腰勢若梯荒碣數行存廢寺奚囊半帙盡新題依稀不辨歸來路樵徑微茫醉易迷

唐溪雜詩

曹釗

信有桃源路微茫徑可通鳥巢蘆荻雨人坐藕花風踪跡烽烟外生涯雲水中柴門繫小艇晒

網夕陽東

其一

此地絕塵事長隨鹿石羣松陰藏佛閣展齒印苔紋大野平分暝危峯欲割雲

呼僮拾落葉虎跡自紛紛

其二

田家秋事蚤禾黍見西成遠圃聞人語高天落雁聲霜清桑柘

酒月上荳花棚野叟蒼然醉喃喃說太平

其三

編茆人境外松末見孤亭泉曲通流水窗開繞

書屏晚烟千樹紫歸雁數峰青賴有雙不借深山劔茯苓

其四

偶隨芳徑去愛此蔚藍天淺水

雙魚駛晴沙一鷺拳桃花紅中酒楊柳綠浮烟雜沓聞歌笑兒童鬪草還

其五

到此疑無路乾

坤浸巨波急風翻石燕怒浪拜江鼉客子倉皇臥榜人自在歌操舟與控馬南北竟如何

其六

登松林朝陽山

谷一柱

登臨凝眺遠萬慮頓皆空石掛藤蘿月松迴古殿風溪幽澄白練峯聳挿蒼穹最喜雙目豁河
山一望中

和韓相菴天宮寺紀遊韻

谷秉謙

古刹稀名跡斯遊亦足賢洞庭流淺港雲夢斷荒邊酒泐松風靜詩成塔影圓遺題銘去後功
不下燕山

登豐臺天尊閣

魯璠

傑閣俯層霄登臨白日遙雲流雙檻外人語半天腰北望燕嶠雪南瞻海國潮漁舟開晚市燈
火雜平橋

春山行

曹鼎望

芳草青浮地晴雲謫過巔山空塵意淨幽興欲逃禪

春晚登文昌閣

唐壽朋

北望羣峰走衆山南瞻大陸海雲間危欄陣陣和風入吹落一天春色還

小輞川

曹鎔

岸繞菰蒲水接天四圍桑柘一村煙兒童不識征徭苦雞犬猶耽自在眠堤柳似分隋苑色野
航疑泛越溪船前身可是王摩詰別墅人呼小輞川

白雲嶺下山居

曹鎰

萬事無如此閉關嶺雲溪月好投闌窗外遙黛晴堪數秋滿陳宮近可攀岸脚柴扉迎綠水林
腰茆舍倚青山移家絕勝桃源住歲歲花開任往還

翠華寺觀如鏡碑

徐文駒

家居苦愛如鏡月山行忽遇如鏡碑清光焜發常相照安知此身在天涯天涯有酒不皆醉天
涯有恨不彈淚主人心胸無纖塵對此碑月曾何愧獨惜古碑泥土封不似當頭明月逢酣歌
彷彿湖上曲令我長憶翠華峰

還鄉河

陳豫朋

赴海朝京淚漫長鴉鴻橋下遠泱泱如何喚作還鄉水却送征人去異鄉

板橋雨寒

陳豫朋

馬頭車岫失青蒼急雨輕雷草屋涼淒厲較於秋氣蕭板橋村似隴西羌

自注景似岷州

過家慕愚里居

陳豫朋

十年隴右惜分攜，鴉鵲山前訪故棲。
舊事杳憐花謝水，微名都類絮沾泥。
衡門柳映陶潛宅，老圃蔬荒庾信畦。

聞道楚南歌長吏，循聲清徹武陵溪。

自注慕愚曾宰武陵

腰帶山絕頂

魏元樞

九萬風斯下，倏然接上天。
奇峰雲際出，凍雨古崖邊。
海色蒼茫小，村星遠近懸。
昂霄攀白日，知界幾寒煙。

登無梁閣

魏元樞

一峰何處生，挿地如邱阜。
千仞根焉托，直從鼇背有。
峻嶒高未極，中涵造化久。
伊是何年人，建閣摩星斗。
塔勢並倚天，俯瞰雲霞首。
登臨四望開，惟與絳霄友。
南極瀟湘目，萬里可引手。
北眺百二城，雄關懸臂肘。
左右指虛無，日月穿戶牖。
長嘯動天地，沆瀣入吾口。
何須問蓬萊，大觀能不朽。

遊天宮寺三首

魏元樞

天官古刹隔煙村，曲逕通幽到法門。
樹裏鐘聲疑上下，雲間塔影失朝昏。
龍蟠寶柱無花雨，石

臥荒原有慧根忽過化城聞戒律令人却憶給孤園

髫年此地幾經過轉眼興衰慷慨歌臺上畫垣馳野馬亭邊春草臥靈鼃雲棲檐際因風入鳥

度林梢叫月多且喜遠公飛錫到方知蓮社即烟蘿

升高望遠叩禪扉樓觀參差聳翠微竹逕引泉僧洗鉢虛窻啄木鳥忘機橋通南北人勞憩興

愛烟霞客倦歸一味清涼何處覓紅塵隔斷是耶非

聞曹園梨花大放偕維二椒谿董大隆吉往觀即飲花下

姜之瑜

綠暗紅稠蒸白雲柴門別鎖一園春玉裁素魄檀爲蔬梅似前身月作隣詩筆芊綿繪事絕酒

波瀲灩洗粧新

自注淑溪詩有亂紅堆裏玉人扶之句隆吉詩有侯穆原來是酒人之句

九仙骨節誰珊瑚舉好結燒梨箇箇勻

自注用李鄴侯辟穀事

溇溪文石呈吳明府柬詩三首

董業棟

曾向嚴陵灘上行清泉漱齒玉玲玲雪泥鴻爪須臾事換取當年客眼青

自注明府子乾隆癸亥從閩歸道經嚴州

盤盆畫出無窮心眼能教百尺高聽訟剖疑須水鑑送君堂上察秋毫

高懷漫整等身書勺水拳山慰遂初悟得大千藏粒米錦江玉壘又何如

園亭閒眺

魯克恭

喜茲嘉樹林煙景無時缺花醉滿園春月坐一亭雪花月方澹然我心自怡悅解帶任輕風嗒焉忘言說

狐兒崖

董世霖

見說狐崖勝行來境欲僊萬山如帶合一水宛縷牽鳥語通虛牖鐘聲出曙烟塵緣此俱寂不待坐參禪

擬咏史樂府十二章

并序

吳慎

咏志乎何史之云田疇徐樂史而志者也石大川諸人志而未史者也下至匹夫匹婦一節之奇義不謬史而可作史觀者也昔李西涯以廿一史擬古樂府百篇王弼州稱其奇旨剏造名語疊出尤悔菴亦有明史樂府之擬荒落之筆不逮昔人明甚顧揮寫哀樂用資名教或亦廉頑立懦之一助而好古者欲繩以翁離上耶則謝不敏矣

非爾知

漢田疇

容悅已死知己何爲者彼國士雄才妙解守雌術高義猶能屈孟德天厭劉人何尤敗幽州成豫州秋風五丈死諸葛徐無千古哭田疇

相見晚

漢徐樂

昔聞賈生促前膝今見徐公奮直筆
眼光燭照三百年土崩瓦解茲其茁
茂陵劉郎帝者英後何憚矣前何明
漢家家法皆如此相見恨晚徒虛耳

石生墓

明石大用

士可殺不可辱囊頭今見司成屺
民生三事之一建言誰是陳東匹
書生淚漣漣赤手竟回天卻如孤
鶴唳雲際羽蹠躔君不見幽壙石
馬英靈老行人猶指青青草

鄧州刺史行

明劉振世

天狗墮賊勢橫中原沸鬼火磷翳
黑子如破罌經摧拉地爲賴孤臣
泣血淚傾死何惜苦我民魂歸來
猶酸辛

李莒州

明李昌濬

大兵南下鼓聲促志士全家沸天
哭五日代庖名義重臣力竭矣死
莫贖妻殉夫子命絕碎磔蒼頭心
似鐵嗚呼哀哉李莒州臨危仗節
天爲愁殷家孤竹漢無終真堪鼎
峙照千秋

書生策

明韓祥

平寇在養民養民在薄賦書生首獻策猶堪累卵補君不見龔遂治北海帶牛佩犢赤子悔曹
州出守末已見恨不柄權心之痲兩師雲集嘆已矣亡國孤臣欠一死不死而降覲然人 聖
朝安用失節士

安節先生 明李孔昭

老婦不再嫁書生求報罷非甘陔伏高不出成就愚忠亦至德硯田熟甘旨足我家乃在東海
之濱盤山之麓君不見突兀漾空雲松耶栢耶何嶙峋又不見扶桑吼雪浪滔滔清絕洗涎麟

知縣印 國朝李昌汗

天王下賜螭龍鈕南面專城爲職守無端小醜肆猖狂跳梁妄欲掣吾肘身可滅志不屈肉可
割罵不絕恨不攫身飛殺賊九原羞見司農實

鬪賊死 國朝趙登高

殺人者死重刑獄鼠輩磨刀恣劫屻我頭可斷不可續血污游魂僵不仆可憐白骨掩黃沙多
年遼海久無家依稀碑碣土花碧地下應羞諛墓筆

孝子歌 明辛大漢

雄姿歛發猛如虎力舉千鈞賁育伍經年不飽可憐生傭直資身誰活汝男兒恥爲鼠雀謀有
母啼饑叢百憂太倉空擁陳富又見朱門酒肉臭辛孝子辛孝子坐令槁項枵中死當時用
人可知矣

異姓人明王有德

如何異姓人能令同根泣木腐虫必生心疑讒乃入採風有餘悲爲補脊令什

婦德吟金李伯通妻周氏 明郭綸妻周氏 明董陸徵妾曹氏 國朝唐之演妻姚氏

從義不勇蕩爲身災投坑絕命曾不徘徊魂歸血汚子淚漣洏蠶績蟹筐汴水之隈一解兄烈

弟義蔚爲婦節巾幗貽謀代更凜冽誰懼劫灰千秋一日展書斯在其人欲出二解雷驚電掣

新鬼啾啾靡有子遺婦也白頭智脫何巧誠感何道一抔之土千里燭髑三解欲活而姑必羹

而肉七首霜飛脫之盈矧姑病既瘳婦容斯蹙痛定思痛吾爲若纘四解

車軸山看牡丹同珠都閩翟千兵白邑尉

吳慎

塵海茫茫欲問津十年此日偶閒身酒澆愁緒分花面碑洗苔衣見古人自注於土叢中得斷碣洗而讀之蓋萬歷間人題韻也

色到梵宮原屬幻香流淨域乃全真西樓晏後誰燒燭自注牡丹在唐時以蜀之天彭爲最即今之彭縣昔人當盛開時敲鐮成都張夜晏於西樓花色與燭焰爭輝歲中

嘗以為益曾子蜀人也故云車軸山前別有春

盆菊數種呈吳明府

魯克讓

素菊殿羣芳峻峻傲白璧既栽陶令籬還入羅含宅九月發孤光千秋同一夕我來逢澹友洗盡紅塵厄

魯搗謙惠菊并柬以詩即賦長句謝之

吳慎

黃土堆中葬紅綠獨蘊寒香有幽菊種將百本列階除坐到三更不點燭車塵馬足笑勞生夢境迷離猶繞蜀誦君詩句溷而清知君胸次真如玉嘉賓壽客集須臾自注曾端伯以菊為佳友張敏叔以為壽客一秋好事今年足

文廟古鼎歌

吳慎

三代鍾鼎傳者少古文欵識尤難詳明堂遠稽虞氏敦春秋已淪夏后璜宣和之中得商鼎安州所貢何人藏司徒南仲表勝國至今位置焦先旁此鼎云出於宏治競得鎔鑄由殷商古鼎有三牛鼎大其受一斛稱大烹又古陽韻有此字重五十觔高尺二有銘在腹耳則黃雷文回礪制奇古四十一篆文煌煌為尋偏旁推點畫鑿作彝器供烝嘗紀年甲午月值酉五代劉宋當武皇改

元孝建初卽阼禮先太室厥用彰奈何薄識妄臆測直以建丑疑成湯若使丑屬合牛首三鼎
奚及豕與羊古器摩抄自足賞休將時代輕論量伐石作鼓咏車馬辟雍講解來岐陽豈不輕
信滋聚訟靈文逸字終芬芳我來豐潤謁州序覩茲寶鼎陳堂唐重繙志乘事纂輯搜索期發
幽潛光學無廬陵具精鑿汲古所愧綆不長人事顯晦亦如此歌成撲筆增慨慷

蛩聲

魯鳳翥

殘雲掃雨明月出亂蛩牕外起我寐問爾前身愁幾何胡爲盡夜發悲歌

北平懷古

魯鳳翥

驅馬來孤竹城闈從碧峰榆闌迷塞雁灤水抱盧龍公子懸雙節將軍斬一封獨憐爭伯者戈
甲動相攻

遊披霞山

曹鈞

落日紅雲帶鳥飛重來登眺坐松扉秋林寒渚千村晚山寺鳴鐘月送歸

晚秋至觀雞山寺

曹鈞

秋深黃葉未飄零寺下青松夾路生最愛僧居塵世遠無言山水倍多情

山居

曹源洙

爲愛閒居好幽深味可親門來青鳥使戶少白衣人樹古含秋老峯鬼上月新不才慵世事僻性遂成真

遊西水頭

曹源洙

屏山環繞碧波流今日重來坐水頭拂面清風隨意綠回頭不是去年秋

洗心亭懷古

在遵化城東北

李遜

冰心一片有誰同亭下依然見此風北望關山翠欲滴西來流水杳無窮蒼松映座塵緣淡野鳥呼人俗慮空爲愛當年觴詠事幾回憑眺暮雲中

宛在園

曹杲

少志耽林泉結伴向溪路一線跨危橋神怯失安步窈窕宛在園蒼然媚雲樹千重楊柳風萬點桃花雨香氣襲客裾苔蘚濕芒履塵囂靜不聞禽鳥自來去清境不可得相對豁襟素

新秋即事

陳祥麟

積暑忽已歇清颺徹肺涼花香雨後發書味午餘長靜處澄心好閒中覓句忙空明漾素影愛

此一輪光

還鄉河畔

陳祥麟

綠影鏤紅日風光劇可憐
蟬翳高韻出魚暖小橋邊
美陰堪攜手微波好放船
分明圖畫裏月夜更屯躔

豐潤雜詩四首

方燦如

單僕屏驢簿畚車陳宮山下有蜂衙
軍裝細認前朝事自注有軍器數事皆勒前明葡撫名堡戍平摧大漠沙
雪虐尙

驚楓未老八月十四日雪春酣不放柳初芽
鄒生何在能吹律忍使寒鄉隔歲華

無復荊高舊慨慷碧眉紅頰冶遊郎
餓鴟箭叫南山獵雌鳳笙吹北里倡
泉湧墨香春漠漠石

留研古月荒荒墨香泉石研山皆邑勝跡成都縱有文翁在
爲問何人肯負墻

回回簿領一燈熒東去西還又載星
欵段馬騎雙墩畢逋烏起短長亭
書籤冷却方諧俗酒

盞疏時稱獨醒只有盤山山色好
往來相見眼終青

風捲邊沙十丈塵但論食物也關人
墻頭一過椒花雨楊誠齋酒名甕底應空麴米春以糜釀漉水爲之曰漉酒而色香味三絕殆冠

東京果擷頻婆分古寺飯抄雲子餉
比隣玉田米新水早李原無欠只是飄飄愧此身

題河西廟壁

魏元樞

城俯長溪溪抱樓每逢佳境快淹留
閒中習靜常棲寺物外忘機恣看鷗
漫說請纓能繫越誰言投筆便封侯
行藏由己原無定屐齒頻頻訪舊遊

初至千像寺

游盤山十八首錄二

鄭源璫

御園花塢話山農夾道松陰護客蹤
回首薊城烟樹裏巾車已入白雲峰

盤谷寺

前人

盤谷傳韓序名同不待猜松陰綠徑覆怪石倩誰堆
隨處山堪賞連朝雲不開遊尋情未已跋馬入崔嵬

春日偶成

鄭振鏞

村居鎮日絕喧嘩風裊茶煙一縷斜
小院戶扃人不到曲欄干護牡丹芽

還鄉河遙望

俞海

隔溪茅屋起炊烟楊柳依依繞岸前
遙望南村雲霧裏一帆風雨送歸船

開平卽事

二首

陳孚剛中

百萬貔貅擁御閑灤江如帶綠迴環勢超大地山河上人在中天日月間金闕觚稜龍虎氣玉階閭闔鷺鸞班微臣亦有河汾策願叩剛風上帝關

天開地闢帝王州河朔風雲拱上游雕影遠盤青海月雁聲斜送黑山秋龍岡勢繞三千陌月殿香飄十二樓莫笑青衫窮太史御爐曾見袞龍浮

自寶坻玉田至豐潤作

嘉興錢陳羣集齋

由來馮翊地山勢抱金湯舊壤連雲黑新痕上柳黃人偏常作客水自號還鄉有約春犂早家播穀忙

豐潤道中作

前人

犂确黃泥路偏宜簿笨車樵仍山採徑農熟水耕書問俗心雖切扶衰願未如清風一相遇搔首自躊躇

豐潤縣送梅怡園改官山西

黎城靳榮藩介人

溲酒酣餘別意長半生心跡付滄浪春風雁塢應談舊秋夜驪歌忽送涼三晉雲山君作雨大東邊塞我分疆田園蕪盡人歸晚卻藉離筵說故鄉

乾隆五十年 國慶恭預千叟宴敬和

聖製詩一首

董世霖

韶開 壽域炳弧躔

錫福彤廷列綺筵五色雲中

天咫尺萬年枝下叟三千曾叨頌

郡披圖舊欣許稱觴拜

賜駢寰宇昇平嘉瑞輯

聖齡億秭慶洪延

子陵釣臺

魯克恭

肯爲區區諫議來用人宜各當其才惜哉光武規模小空遣先生下釣臺

侵晨亭中即目

前人

景物新如此遊觀興不窮池飛雙鷺雨柳帶一蟬風竹露團來翠榴珠迸出紅何期林野趣都在小亭中

棠陰遺懷

前人

何事高燒燭婆娑繞徑行潛魚沈復起棲鳥定還驚地迴天心靜林深夜氣清就遊渾不寐常是到三更

過董總戎墓

總戎名果墓在邑南九十里蓮花沽

竇徵榴

驃騎佳城此地開
芊芊今見沒蒿萊
瑩封不作祁連象
姓字空留溟海隈
樹績樓蘭原自壯
謗興薏苡亦堪哀
總戎以台灣漏規追陪
功名利那場中事
過客酸腸定幾回

披震山冬眺

陶譽相

雪滿寒峰凍接天
披霞一眺杳無邊
塞雲低鎖邊城堠
曉日平開海市煙
三座瑤遙如在望
二龍山古詎無仙
荒碑剝蘚閒題句
驚起棲鴉半霎眠

題染綠軒

直省學政羅漢源

傍夜濃陰霧不開
且持高燭自徘徊
花神肯踐歸來約
囑咐東風莫浪催
香霏閣下倚欄干
採取韶光興未闌
不見花開別花去
膽瓶分貯一枝看

春日漫成

丁惟善
竹溪

涇水纔黃嫩柳枝
提壺盧喚賣餚時
祭烟自古原多事
新火而今豈待施
兩袖清風吟得得
一簾春日覺遲遲
踏青不去非吾懶
老眼羞看草色離

漁村道中

王巖

踏遍漁村廿里遙
短衣長策馬蹄驕
醉歸猶識來時路
疏柳寒煙舊草橋

東兵過境平賊有日

楊紉蘭 綺園

天威震怒屢徵兵電掣星馳檄遠營虎旅東來皆子弟龍符南下盡公卿已將高閣束殷浩會
見先鞭著祖生蟻聚蜂屯終掃蕩捷書轉瞬到 神京

天宮寺懷古

前人

浮圖高聳藉雲封聯步登臺石磴重絳闕卽今瞻白象青衣曾此走黃龍寒潭雁過原無影古
井蛇藏郤有蹤手撫殘碑尋往事興亡都付一聲鐘

資生臺題壁

前人

風雲一舉上高臺獨倚危欄倦眼開檐下尙留僧臘立門前曾見帝羝來西流湏水縈衣帶北
望燕山入酒杯太息干戈滿南極餘生猶得隱蒿萊

步綺園原韻

涿州人 蔡寶季 絨

十年五度此登臺眼界輸君久不開飛動龍蛇彈指去蒼茫烟雨破空來誰憐冤獄埋三字每
欲臨風奠一杯莫謂籠紗無福命靈光終不掩蒿萊

觀白菊

鄭濂

東 二 卷 一 四
祇憑皓質傲重陽，妝點秋容發素光。明月乍添三徑雪，西風碎翦一籬霜。問名正合晶毬潔，對飲偏宜玉液香。洗盡鉛華存淡泊，好同彭澤老江鄉。

雨後遊陳宮山觀雞寺

魯松

連日雨濛濛，觀雞古寺崇。樽開青嶂外，人坐白雲中。摘果僧家獻，窺泉井幹通。遼碑苔蝕字，漢樹葉吟風。草接巖腰碧，檐懸日脚紅。牛眠瞻北郭，龜負憶東蒙。俯仰悲遺迹，升沈問化工。隱囊如可辦，誦讀學陳宮。

齋中漫興懷凜齋弟

魏禮煜

綠鬢閒梳傍草堂，藜杖兀坐靜生涼。夢回池上人千里，月滿樓頭雁一行。年到晚來書有味，事經過去慧偏長。只緣李渤同心性，沽酒任教漫叟狂。

弔鄉社谷僉事應泰

原三十首錄五

趙國華

前朝開府舊榆枌，家世巾箱有見聞。緬想高軒著書暇，滿林嘯鳥括蒼雲。

董觀察榕

西江明月照吟卮，賓從當年世所知。儒雅風流足惆悵，夕陽下馬董家祠。

劉太守燠

師臬風鑑果無雙不負陽湖此過江紅藥階前鳳凰筆至今言誦滿鄉邦

張方伯印塘

聽事堂前牘背高飛霜執獄懾權豪當年大府真青眼六纛風來見我曹

常方伯發祥

攬轡來歌蜀道難崑崙關外馬蹏乾天涯莫盡從戎記留與巴潼說故官

溇陽雜感八首

湖南人賀祥麟麓樵

大東龍勢鬱蒼江溇水遙分紫氣長地靜邊塵無戰伐風清遼海有文章登臺感慨諸侯客擁
篲流連弟子行不負蒞邱驅馬出故宮碣石未全荒

徐公直筆壓枚鄒豈復燕臺劇樂壽吳國盛傳程盪寇隋家猶見漢楊彪賢王差幸功成霸飛
將偏憐相不侯嗟我攜壺乘欵段闕從市上狗徒遊

幽州討賊舉邊烽匹馬從戎劍氣衝信有宗臣扶漢鼎豈應義士賣盧龍哭祠變布拚收捕逃
賞包胥恥受封試向徐無山上望白虹遙貫嶺雲重

漁陽擊鼓舊兵屯莽莽黃塵四野昏邊月夜懸蕭氏塢塞雲秋鎖令公村沙泥剝蝕餘牛鼎俎
豆馨香感象尊莫向上垠尋幻事蜃樓荒忽不堪論

龍象莊嚴擁釋迦宋金曾此訂盟過北征將帥心無敵南渡君臣計有和大地豈容邊寇擾偏
安無奈小朝何思鄉橋上蒙塵路終古悲風捲白波

難將浩劫問恒河贏得風前擊筑歌何物能如遼豕貴此才應似鯽魚多金窰未許披沙揀石
研翻憐被墨磨惟有豐臺隄畔柳長垂青眼看人過

樵歌漁唱起遙村人語聲中古俗敲糜酒窖封牀底甕稻香濃浸水邊門城無鬧市民風蕭家
有區田世業存檢點食簞蝦菜足莫徒羨說牢盆

瘦馬羸童薄笨車荒城臨眺獨躊躇憑探石井真源水待訪靈山未見書黍谷已經吹律轉桃
源何用避兵居等閒自寫登高賦豔說從人笑子虛

弔田疇

孫贊元

仗劍從戎志斷金幽州討賊陣雲深勤王自有宗臣輔賣塞原非義士心應運幾人龍鬪野全
身大半鶴歸林子文辭祿胥逃賞持議差能契夙忱

弔乾癘上人

前人

思陵仙駕杳難追不赴禪關卻赴誰
賸有法身存別院忍將姓字著殘碑
平原棖觸江淹恨故國尤深宋玉悲
數能牟尼尸解去斯人弗出果何爲

道經豐邑作

光緒丙子喬帥遣成黑龍江

陳國瑞

行行重行行落花滿地驚問我起何早
惜君眠不成

其二

青青園中草灼灼隄畔桃春歸三月夢
煙雨鎖藍橋

遊甘泉寺

吳廷準
季良

萬壑千峰紫翠連中藏古寺號甘泉
凌風劇到青雲表和月曾歸絳帳前
汲水熟煎茶味出捫碑詳閱蘚痕穿
滿山羊棗思親日幾樹龍槐陰佛天
窗倚巒光晴靄入徑流花片暗香傳
數聲鐘磬僧寮遠一派笙簧鳥韻圓
道衲閒談全蜀地經幢尙刻大遼年
寂幽巖谷猶如此况立峯巖岱嶽邊

登陳宮山

前人

攜侶觀雞寺登臨興倍豪岡巒四圍繞雲漢一峰高萬樹含秋氣長松起暮濤徘徊情未已和

月下東臬

觀雞寺懷古

前人

松林西北觀雞寺面面峰巒引翠環幾簇人家青嶂外千尋鳥道白雲間止知孟德今無土誰料陳宮尙有山極目乾坤思往事浮生半日且偷閒

登腰帶山

劉世珍 備章

山橫北郭靄遙青

遠望此山橫亘天表

疊嶂勻排似列屏杖履登臨盤鳥道岡巒起伏作龍形

山為一邑祖脈

目窮渤

海蒸雲霧背俯溲溪晃日星

溲水繞其北

巖下兩三蕭寺古上人為我坐談經

與友人李子宣讀書甘泉寺

前人

琴筑泉聲出寺東塵襟浣淨萬緣空地幽志記元時代

邑志寺自元至正年修

碑古名題史總戎

萬歷末薊遼總兵邑人史宸重修

攜鉢僧收羊矢棗讀書人倚鳳棲桐

寺多此樹

興酣日落山銜月樽酒論文氣吐虹

田疇贊 補遺

明方孝孺

古之觀人不於用舍考其所存第高下譬諸龍駒垂首冀車豈以其賤斥之為駑齊侯千駟如

南面王仲尼之歎夷齊有光漢季分爭得國者操吾獨何爲田疇是悼操雖據國犬鼠之雄殺
后無君天下不容奚若田疇忠義蓋世委質劉虞身死靡二使授之命爲漢大臣殺操復漢必
不顧身鳴呼鄙夫爲利是就誰能爲疇我與爲友

玻璆光墨歌

曹 鈞賓及

二儀既立生萬類各物含元辨真僞松柏有心竹有筠蒼冰能結玻璆紋一片瓊光照滄海千
年萬年光不改桐鄉易水與漆園玉案猶復飛雲彩電魄燭天星斗晦煙霞直射蛟龍背百家
汗漫十牛車滿紙珠璣變奇態君不見李白昔稱作賦才七寶手捧葡萄杯桃花箋映青珠胎
龍蛇錯落鳴風雷河圖燦爛雲錦裁爾與鱗角實爲萬古之煙煤周鼎西彝功日月能使斯文
存氣骨數語遺燕勝甲兵寸心敢託通吳粵嗚呼秦帝昏昏迷大荒咸陽火起虹飛揚餘燼尙
存混沌之精芒請君一試玻璆光

連理歌

陶譽相

黃鵠鳴兮聲嗚咽烏鵲飛兮嘯碧血傷哉古來節婦多未聞生不同牢死同穴嗟彼董氏女絕
代有容光閨中早受聘許嫁張家郎聞道張郎年十五不讀文章性好武馬上能開十石弓三

箭已中園橋鼓歸來帽插泮宮花乘龍直入丈人家呵氣成雲容傅粉清冷潤玉人爭誇阿翁
霽顏兄弟樂共道絲蘿得所託筵前鼓舞訂婚期相約定入麒麟閣會有風雲際玉京辭親奮
武磨青萍誰知勇可冠軍武英雄難與數爭衡既不能奪錦天門底又不能執戟光明裏攬轡
歸來折寶弓嚴親一怒嬌兒死阿翁聞訃泣數行佳人繡能朱顏黃解我羅襦脫玉璫者此荆
釵麻布裳喚僕膏車拜父母兒將矢死張家堂父母一見氣先沮非禮之行女何誤大姊牽衣
返故闈小弟婉言息親怒違親既不肖毀耳人皆笑反復對琵琶羞煞彈別調氣化寒雲淚滿
壺皮金香剪附阿奴生既不能付舅姑死庶可以從吾夫今生不得結褵好來生期化交頸鳥
今生不得伉儷歡來生願作相思草草色青青萬古香鳥名千載稱鴛鴦傷心爲作連理曲此
恨山高與水長

孤竹君廟

張如阜

知子莫若父不無深淺分卓哉千古識惟此孤竹君愛子同高厚爲子計長久叢爾墨胎墟何
以垂不朽守土事商辛如火厝積薪王氣鍾西北明赫動神人深揆清聖志有死不能二天意
已歸周螳螂空奮臂卽辨邪與忠不與廉來同亦等五十國蕭然一掃空民人旣糜爛宗廟亦

塗炭哀哉此河山冤魂虛憤惋况爲百里君可以得天下恃此雄駿才抗拒西周駕南連青兗
州倡義景山頭百戰堅守死軍士益虔劉旄麾血漂杵斧破鴻遵渚不聞讎與頑名字鑿鐘虞
何如使求仁翕然各自得順天治萬民脫屣棄故國叩馬過孟津數語正人倫道同天不變義
舉克長伸兵力爭尺土人心留萬古社屋鼎可遷地維天有柱西山何巍巍日月爭光輝數世
故宮黍不如首陽薇至今幾千載廟貌仍不改仁讓既聯芳慈孝亦常在憶昔遺命時何人不
滋疑奇行成庸德今日乃知之試考西周策封國千八百世運屢更移伊誰有餘澤寶剏踞高
岑灤水清且深敷衽跪拜者如見古人心

夷齊求仁頌

前人

不知父命不知天伯夷烏得稱爲賢父既遺命立叔弟不立叔弟豈非愆叔齊既識天倫重奈
何父命反不用棄命棄國苦節貞矯廉祇等於陵仲况是三人作弟兄去國宜偕甲子行必攜
叔弟同高蹈胡不疑懟爾所生惟即孔孟求仁論追究同心無匿怨參諸事勢得其真不僅一
時稱善遜爲仁之道首親親由家及國亦興仁橫諸四海稱大順垂諸後世永無垠經德不回
非干祿變事知權克不辱無營無欲積真修可大可久成高躅商周革命本乾元父子兄弟亦

難言從周是父教子貳抗周宗社豈能存伯氏清操原天性才德皆足膺大命西岐積累已數
朝審時度勢難與競惟時西土止仁君三分有二服事殷殷雷之政行山側如燬之焚淡汝墳
舍郤孤竹叢爾國永就豐邑緝熙德大匡既詔三州侯程典亦協六州職從此再萃遠方才後
先疏附共追陪青兗與冀咸服化何人不樂登春臺獨夫雖積盈貫惡衆人不報世讐虐惠澤
漸漬兵燹消乃展求仁濟時略卽值錫齡帝命終孟津兵渡八百同叩馬數言回馬首不教漂
杵血流紅遲之數歲商紂死武庚改轍天禍弭協和各得兩無猜亦是求仁成厥美武王不聽
逆耳辭黃鉞既仗白旄麾恣國九十無橫草馘魔億萬盡伏尸素願知不可驟得立言世爲天
下則天地正氣不銷亡君父綱常賴扶植隱首陽山歌采薇易暴惟疵以暴非中野若同股祝
解求仁初念或無違上溯勳華禪虞夏實以均朱不善化用殄厥世救蒸黎免致征誅興類禡
吁嗟徂兮歎命衰命原天理未嘗虧祇緣氣數弗能挽干戈滿地不勝悲不食周粟終於餓弟
後兄先克唱和百世以下聞此風廉厥貪夫立厥懦史公作傳重於名豈能深識聖之清仁德
在心名在外徇人干譽竟何成謹守孤城延旦夕難與廉來辨黑白兵臨城下講天倫身敗名
裂無良策若論興讓在一時所讓之國讓與誰後人止倣夷齊讓爭端禍烈益繁滋哲人尙論

論其世探厥心源見真際所求所得非虛聲聖言判斷春秋例

遊薛道洞

楊紉蘭

翠柏被崇岡黛石嵌高壤攜杖訪招提
寒衣避荆莽松鼠下銜榛嶺猿聚拾橡
路轉復峰迴靈境忽開朗溼雲壓塏尖積
雪侵書幌昔有薛道人結茅此偃仰仙去跡
仍留古洞石門敞伏地臥龜蛇循牆立
蘼魍時人多好奇入洞窮探賞秉炬繫長繩
結伴有三兩僂僂折乃腰匍匐行以掌如穿
九曲珠婉轉下復上鍾乳四壁凝盡作瞿雲像
小憩坐石牀幻怪勞神想愈入愈幽邃氣悶
意惚恍颯颯生陰風潺潺聽泉響心怯返身
急昂首石觸鰲蛇行出探頭喜見朝陽晃此
非安樂窩祇可藏妖蟒何如桃花源令人心嚮往

牛鼎歌

用昌黎石鼓歌韻

賀祥麟

岐陽石鼓置太學昌黎以後多詩歌三代法物
晚近少士縱好古將如何此鼎傳自宋金出時
方講藝投干戈

舊志載金時建學有聲出土中循聲掘得之

經始鬻序辟榛莽長鑣大鋪相治磨神牛奮地
殷發吼迹聲所

至深爬羅至寶反受俗眼白猥以培婁視岷峨
雨淋風刮委牆角誰其朋錫珍我阿夜深虹氣
燭天宇六丁神將陰爲呵取易箴之卦遇鼎大烹
養聖辭非訛菜釋先師薦芹藻書分孔壁文

蚪蚪諸生以時入習禮旂連鳳鼓秦靈鼉園橋觀者億萬計光耀奚翅珊瑚柯神物位置已得
所日往月來拋如梭我來溁陽印泥爪散車羸馬行透沓廣文先生見如故時尹懋齋愈小園司鐸 昕夕樂
數義與娥手扛龍文道我識臨風感歎雙涕沱從來鼎象百不一圖繪博古留宣和牛鼎較大
受一斛其外羊豕難同科重五十觔高尺二銘四十字鐫詞多商歟宋歟紛聚訟謬謂背臚馬
即駝商書紀事曰某祀幾見甲乙編年過釋作宋器亦武斷盍於篆籀加劇磋埤雅輿記逞狂
喙客話漫錄沿流波問鼎不言鼎有耳應喙俗論皆偏頗赤文綠字自典重以古爲鑑違知他
斷斷時代劃畛域危言鈴說祇姘嬰平生慨想天廟器睹此竟欲手摩娑直如衝嶽對禹碣以
手捫讀長吟哦吁嗟人事有代絕轟馳青犢飛蒼鵝金鐘大鏞棄砂礫此獨用享受福那自非
天龍十萬護安得完好離坎坷神風聖日大福庇不知幾劫沙恆河物之顯晦乃如此側身天
地徒蹉跎

白鬚行

鄭家麟商年

溁陽董子人中豪氣吐虹霓百丈高相逢奇事直驚絕鬚邊一夜飛來雪時值嘉慶癸酉年寇
來倉猝如雲煙時爲貴邸座上客彷彿武城避寇賢禍至伊誰戀華屋公子叫天阿婦哭口噤

目眇不敢前風日淒淒天地崩阿娘老大膽較壯苦挽先生作保障千金重担一肩挑蜂屯蟻
附方相向知己相邀皆謝絕慷慨仗義表奇節推守要害細論丘咫尺休教營蟻穴禁叱合府
莫聲悲伏旗息鼓示無爲斗酒方肉賞健兒謹防黃巾與赤眉黃巾赤眉勢猖狂弄兵先欲擾
天潢三更粉字書壁去何人敢與抗戎行是夜賊首眞作惡持刀攘臂登雲閣暗施火器一炬
紅踰牆遁去鼠膽破須臾殺氣貫斗牛人喊馬嘶似水流自分先生畢此日仗劍來登門上樓
魁梧奇偉霹靂聲宛如石破撼天驚羣賊遙望驚嚇走忠誠不戰屈人兵困頓一夜白頭見興
嗣千字精心鍊朝起將鬚把青銅果然頃刻容顏變當途方略固多有抗敵乃出書生手烽烟
頓息歸故鄉賸有聲名滿人口元直還家爲老親借壽十日見天真高才恥爲擊劍士西席曾
爲捉刀人天上少微耀光彩魯連高風至今在壯心不與戎馬馳歲月已從滄桑改勸君且斟
燕市酒世事白雲幻蒼狗君鬚一白不復烏英雄落拓無時無

王家樓陪陳庭思明府看蓮

魯克恭

凌晨迷失舊遊路雨後薰風吹薄霧遙看比戶盡泥丸高樓人指王君處王君門徑竹青葱步
步將身入畫中畫中主人種竹者人家翻居竹根下到門愛我張華筵錯酬無律飛玉翠更種

雙清集 卷之六
池邊萬朶蓮花隱平橋一帶泉共道名花顏色好那知瞬息同衰草趁此夏正暢酒懷莫使空
尊噴人老滿座皆醉獨能醒小子何期眼辱青不識塗鴉容獻否詩酒爲樂良非偶仰天四匝
暮雲橫笑遣花神爲勸酒

按王家樓原係王氏別墅內有高樓一座樓下引泉種竹鑿池養蓮爲閒時遊眺之所王
後徙家於此故以之名村今樓已傾圮基址無存此詩其證據云

登小松山

山爲邑人安氏別墅原詩三首錄一

吳廷準

誰家芳樹小園亭曲徑彎環道屢經乳燕嬌鶯惜灑灑凝蜂戀蝶意惺惺花如留客腮凝粉柳
欲依人眼轉青翠繞珠圍扇領取况當山色敞銀屏

遊郭家峪果園

岩壑幽奇處誰家小有園野花欹石放山卑壓枝翻徑遠人初到林深鳥自喧太平居此地飲
啄亦天恩

車中望腰帶諸山

趙國華

斜陽大道白沙明鈍馬單車過縣城鴻雁北來晴有數亂山東去老無名謀生安得田夫子誓

死曾聞戚總兵絕塞由來關鎖地何因坐放虎狼行

九日登披霞山二首

王化岐鳳岡

欲上青雲未有梯披霞登眺不嫌低尋碑野寺苔黏屐酌酒禪林菊滿畦遙望燕山羣拱北俯看漚水獨流西醉餘陡起詩豪膽糕字拈來率爾題

山橫北郭地靈鍾健步登高石磴重雲盪宵襟隨去鳥峰連腰帶指來龍茱萸徧插詩朋集壘塊頻澆酒氣濃遊興不因遲暮減歸時古寺已鳴鐘

過龍灣山

前人

白雲深處聳高峰車過重岡馬力慵怪石斑斕驚臥虎寒潭蟠曲久藏龍登臨時聽泉聲咽祈禱頻霑雨澤濃邑士嶄然頭角見從來靈秀此山鍾

乾癯上人贊

董崑

秋風黃葉寺金粟老僧身根露胎難脫丹燒骨不塵逃名留本面舉首望何人自問非遺臭前修可轉輪

染綠軒觀海棠

沈赤然

名葩知是何年植染綠軒前歲歲開穠艷有情留粉蝶因緣無分嫁紅梅飽看便是居香國小
酌憑誰進酒杯寄語東風莫相妒春陰曾乞護花來

螢火

魯森

賦形雖腐草隱耀復含貞察察能自照冥冥不墮行風搖光有定雨濕燄還明惟伴孤寒士詩
書過一生

梅影

前人

妙似梅魂見諦觀假亂真搖時原峭潔瘦處越清新月下曾來汝山中亦住君未如燈燭裏斜
照一枝春

弔田疇補遺

晉陶潛

辭家夙嚴駕當往志無終問君今何行非商復非戎聞有田子春節義爲士雄斯人久已死鄉
里習其風生有高士名既沒傳無窮不學狂馳子直在百年中

冬夜宿豐潤卽事浣溪沙

明司馬西陂

一溪流水萬重山茆屋人家只數間古樹棲鴉暮復還 盧龍紫陌應難賣叩馬清風誰易攀

千載令人有厚顏

白露兼葭天雨露西風吹雁正南翔坐來明月照竹床
銀燭生花頻弄影瓦罍煑藥細生香
行人無寐夜偏長

觀司馬公題壁有懷仍用前韻

許宗魯

冀北遼陽一髮山經年踪迹道途間凝眸佇望幾時還
晶晶秦雲停思久青青岩桂與誰攀
風塵空老壯夫顏

歲晚東征犯雪霜鳴笳風急旆旌翔停驂時復據胡床
天末音書鴻未至壁間塵土墨猶香
今宵歸夢爲君長

飲冷心亭調金門

國朝曹 釗

芳菲節桃李亂將春洩柳絮紛紛飛似雪遠山青欲嚙
酒債尋常慣揭惹得鶯兒訴說拚取
醉鄉深處歇夕陽看又跌

飲城西溪山一覽樓山花子

曹 釗

香夢梨花近午天方塘荷葉小青錢紫燕啣泥飛上下畫樓前
千尺柳絲斜帶雨四圍山翠

豐澤縣志 卷之四
淡浮烟笛聲吹出橫牛背夕陽邊

遊大宮寺

行香子

曹釗

春到蘼蕪花滿浮屠尋幽伴步出僧廬憑高極目翠黛紛鋪見西溪外波淡宕柳扶踈疏松陰
籍坐相將泥飲君休笑故態狂奴誰人似我一事全無踏歌歸去明月上照糝糊

春日得雨即事

點絳脣

吳愼

雨意瀟瀟綠遮階砌花裊濕捲簾小立領取香風襲遙稔田間添得農夫啞青堪挹盈疇粒
粒管教倉箱溢

重過近林亭同謝三元吉羅二椒谿吳三聖雨姜十二六銘

臨江仙

董業棟

西郭園林曾彳亍今朝又復勾留酣酣日脚紫煙浮花將愁掃去誰賞釣詩鈎錦撿雲攢紅
欲雨果然絕世風流名姿生怕燕鶯揉歸來腸幾轉好夢在枝頭

日內已春和矣夜忽得雪寸許有感却寄何五太旃馮十四鏡堂

江南好

羅堃

風料峭六出雲時飛質庫有裘嗟已敝鐵衾無夢不成歸膈膊數聲雞
簾倒捲觸景發長噫熱鬧誰儲嚴冷味摧殘獨聳雪霜枝底事耐人思

資生臺懷古壽山溪

董崑

銅琶鐵板高唱層臺右何處大江東正對著山明水秀胸襟一闊桑梓哲人多誰堪師誰堪友
川岳鍾靈厚 豐功偉績歷世如雷吼獨有後來人恨不得親承趨走長河西去流盡英雄久
一杯酒一翻手來向溷溪瀏

飲資生臺上買坡塘

前人

想人生美景良辰多被匆忙奪去得閒須到高臺上况值飛花舞絮春將暮費幾許躊躇難使
春常住流鶯滿樹直喚起壯年乘風破浪豪氣籜雲步 爭奈得鬚髮卷如白鷺蛾眉早經人
妒顏顏還恐招人怒此意與誰共訴欲傾吐又覺道田君徐子皆黃土莫能把晤東望更關情
斜陽碧草正是石生墓

輓邑侯夏公滿江紅

前人

夏公字小笠宰豐時王蘭莊居民爲之樹德
政碑後調正定卒於任蘭之民多哭於碑下

報道先生今去也神驚氣結想當日恩流稻浦吏胥奸抉惠德猶同溷水溢仁風轉播常山嶽
到如今慈父頌黑髯聲無歇 人心痛思廉潔天心酷摧英哲竟奪我使君陽春脚折堂上金

萱悲白髮階前玉樹嘯紅血歎羊曇何日到西州空酸咽

送別

秋波媚

暮蟬衰柳咽殘秋腸斷送人舟半林黃葉兩條碧岸一曲吳謳
清樽且向臨流醉歸日倩誰
謀忽然惹動別前舊恨別後新愁

陳室未婚守志王貞女歌

陶譽相

北山有孤竹移栽傍七樹上有孤宿鸞悲鳴歷朝暮豈無日月光照單不照雙豈無雨露恩生
節不生根吁嗟王貞女可憐陳仲舉誰傳埋玉文竟夢折釵股海竭恨艱填天傾哀莫補九死
餘一生數語足千古父母不能留翁姑不能阻心逾金石堅操比冰霜苦無淚不成花有裙可
包土盡孝捧盤匱食貧力砧杵金線歷年年機絲鳴縷縷廿載甘貧寒一鐙耐風雨奇行難盡
言芳名振大府朝議雖待旌鄉評已如許繡玉輝在山懷珠媚在川光輝詎能掩如雲之麗天
大節垂宇宙豈止書形編盛世有元音終當被管絃以之勵臣心臣心皆忠賢以之勗子職子
職克純全我愧學蟬噪萬一曷能傳唐生有高義聊以塞責焉

邑人唐風古爲之徵詩故云

風水歌

丁起岳

乾坤有六子三女並三公中男坎爲水長女巽爲風風水長相渙渙散自成空法言垂大易無吉亦無凶何人厝先靈動欲覓吉地尋一堪輿人指點隨其意可以富田園可以登科第可以爲將臣可以爲文吏舉凡古與今神靈與奇異求之風水中無不周且備噫噓唏悲哉世人誠可哀誰不趨吉祥孰不避凶災堪輿亦猶人豈惜買地財以此覓祖基興也自如雷安受無窮福何事奔塵埃人偏昧不察競言風水有試看風鑑人多是饑寒否

皇清縣志

卷之四

